

NATIONAL ASSEMBLY OF SEYCHELLES

Tuesday 4th October, 2022

The Assembly met at 9.01am

National Anthem

Moment of Reflection

Mr Speaker is the Chair

MR SPEAKER

Bonjour tou Manm Onorab. Bonjour nou staff ki pe asiste nou. E bonjour nou telespektater e oditer ki pe swiv nou, byenveni pou nou travay lasemann.

Bon dan komunikasyon mon annan en *Right of Reply* e sa i sorti kot Minis Sylvestre Radegonde, lo en *statement* ki Onorab Loze ti fer dan Lasanble. Mon pour lir *Right of Reply* Minis Radegonde.

“Mr Speaker mon le egzers mon *Right of Reply* anba Lartik 102(6) Konstitisyon Sesel, pour reponn e koriz serten alegasyon ki konsern mwan personnelman, ki'n ganny fer dan Lasanble Nasyonal.

Pandan deba lo Mosyon *Supplementary Appropriation* dan sitting Lasanble Mardi le 27 Septanm 2022, Onorab Johan

Loze in fer en amalgam en *statement* ki mon ti fer dan sa menm Lasanble Mardi le 12 Septanm, ler mon ti vin reponn PNQ konsernan *logo tourism*.

I ti fer sa deklarasyon swivan parmi lezot. E mon sit deklarasyon *statement*.

“Mon a akont zot en zistwar, *for years* Polisi Minister Zafer Etranzer se ki en *graduate* avan i ganny poste dan en Lanbasad, i travay en *minimum* 3an in *country* - 3an. E zot LDS zot konn sa tre byen.

Dan dernyen Lasanble zot in lager la anndan pour sa bann keksoz. *Over and over* zot in koz lo la. Ou konnen ki'n arive ozordi, garson Minis in ganny poste *New York* i pa'n zanmen travay en zour *in country*.

Son prop garson ki li in entrodwir dan deba, in ganny poste in *New York*,” eksetera. Fen sitasyon.

Mr Speaker mon oule enform Onorab Loze, Lasanble Nasyonal e piblik an zeneral sa bann fe swivan:-

1) Enn dan mon 3 garson k i ti Langletek kot nou ti pe viv, ti *apply* pou en job avek Departman Etranzer isi Sesel, ler i ti fini son premye degre letid iniversiter. Son letid ki i in pey li menm. I ti fer *panel interview* par *video* avek

management Department Zafer Etranzer an Zen 2018.

I ti reisi baze lo son prop merit. E i ti ganny ofer en *post* koman trwazyenm sekreter. *Post pli junior* dan *cad diplomacy*. I ti vin enstal li Sesel, e komans son *job* avek Departman Zafer Etranzer le 1 Oktob 2018. Sa Mr Speaker ti byen avan sanzman Gouvernman, e avan ki mon ti ganny apwente Minis.

2) Mon garson in viv e travay Sesel kontinyelman dan sa menm post ziskan Septanm 2020, ler i ti pas en konkour parmi lezot kandida Seselwa, pour en *Scholarship Chevening*, e i ti retourn Langleter pou al kontinyen son letid, pou en dezyenm degre, en *Masters*.

Son letid ti ganny antyerman finanse par Gouvernman Britanik. *Management Zafer Etranzer* ti mentenir son lanplwa avek Departman, parey i leka ler en travayer i al etidye aletranche, e selon Polisi *in training*.

Ankor enn fwa Mr Speaker sa ti avan sanzman Gouvernman e avan mon apwentman koman Minis. A lafen son letid mon garson ti retourn dan son post Sesel, an Oktob 2021.

Se an Zilyet 2022, swa preski 4an dan son *post* ki mon

garson ti ganny poste dan en Lanbasad Sesel aletranche. Rotasyon *staff* dan Lanbasad depi Anbasader, e lezot diplomat i fer tanzantan, apre bann egzizans profesyonnel diplomat, e selon sirkonstans. I pa'n zanmen annan en Polisi lo kantite letan ki en dimoun in bezwen travay *headquarters* avan i ganny anvoy-e lo en *posting*.

3an i ganny parfwa servi koman gidans, me i pa'n zanmen Polisi ferm. Vi plizyer kontrent, *posting* Anbasader e lezot diplomat in toultan ganny fer selon priyrite pei, latitud, kalifikasyon, konpetans e lezot *skills* sak endividé.

In annan ka avan mon lapwentman, kot zenn diplomat in ganny poste deor. Apre bokou mwens ki 3an pase dan *headquarters*.

Mr Speaker i regretab ki Onorab Loze pa'n fer son resers pou rod sa bann fe, e laverite. In plito prefere fer *polemic* baze lo fo lenformasyon, rimer e propagann. Par son aksyon olye edifye nou pep, in servi son pozisyon e platform ki'n gannyen, pou fer bann deklarasyon ki non-selman *misleading*, me ki san fondasyon. Ki malonnet, *mesquin* et mansonzer.

I kler ki in fer li avek en sel bi denigre mwan, e sali mon repitasyon e abes en zenn diplomat Seselwa, ki pe esey progrese dan son karyer e ki pe travay avek devouman pour nou pei.

Mon garson, pa'n zanmen rode e i pa'n zanmen ganny okenn faver avek personn isi Sesel. I annan en drwa parey nenport Seselwa, pour li ganny trete lo menm baz ki tou dimoun. Lefe ki i piti Minis, pa donn li okenn privilez.

An menm tan i pa devret non pli perdi son drwa avanse dan son karyer zis akoz i piti Minis.

An sa ki konsern mwan, mon fyier ki anba mon *leadership*, sa Departman Zafer Etranzer Relasyon Enternasyonal e Diplomasi, nou pei in fer en progre remarkab depi sa pti gin letan ki mon'n la. Progre ki ganny resanti e apresye par mon staff; progre ki a ganny rekonnet e aplodi lo lasenn enternasyonal.

Bann zenn dan mon Minister ozordi, pe ganny tou motivasyon, gidans e sipor pou zot grandi e al pli lwen posib dan zot karyer. Sa i reste mon *focus*. Avek mon remersiman e mon meyer ve.”

Sinyen Sylvestre Radegonde.

Sa i *Right of Reply*. Mersi.

Sa dokiman in ganny sirkile pou bann Manm pour zot kapab etidye li pli lwen. Bon, avan nou al dan nou travay labitud mon bezwen donn en leksplikasyon lo enn de pwen ki konsern *Order Paper*. Akoz i konsern *Order Paper*. Manm in remarke ki nou sesyon, kestyon ozordi i pa parey labitud. Annefe i annan zis 2 kestyon, pour Vis-Prezidan Ahmed Afif. Mon demann konprenezon, *Assembly Business Committee*, ki mon'n bezwen fer sa desizyon, apre ki nou ti'n fer *Order Paper* semenn pase.

Mon'n pran konsiderasyon ki bann Minis i angaze, dan en rankont avek bann Anbasader e Zofisyen Linyon Eropeen, dan en prosesis ki zot apel *EU Dialogue*. E sa prosesis i pas an revi tou bann Lagreman proze ki annan avek *EU* ek nou Gouvernman. Plizyer Minis i bezwen fer prezantasyon dan sa miting. Alor mon'n ranvoy bann kestyon, ki ti annan lo *Order Paper* sa semenn pour semenn prosenn.

Byensir *Order Paper* i a ganny revize, revwar ler *Assembly Business Committee* i rankontre sa semenn. I annan

osi en sanzman dan *Bill* ki lo *Order Paper*. E sa se akoz Minis Rangasamy in fer en pledwari, ki i deborde avek bann aktivite *Habitat Week* e ki fer li vwar i pa kapab pran *Construction Professionals Bill*.

Alor mon'n sanz sa e met *Employment (Amendment) Bill* dan son plas. Bon, mwan mon regret retar ki sa bann sanzman in fer pou travay Lasanble. E lenkonvenyans ki'n koze pour bann Manm. Sirtou bann ki ti'n prepare pour zot, demann zot kestyon. Mon le eksprim mon regre e mon konsyan ki nou devre a tou pri, sey eseye pou pa ki i annan sa bann lensidan ankor.

Me lo size kestyon, Onorab Lemiel *Chief Whip* lo kote *US* in demann laparol pou eksprim en *matter of privilege*. E mon rekonnet ki i annan en *privilege* la, e mon pou donn Onorab Lemiel laparol.

HON SYLVANNE LEMIEL

Mersi Mr Speaker. Bonzour tou nou bann Manm koleg Onorab, tou dimoun ki pe ekout nou lo radyo e lo televizyon. Mr Speaker mon santi mwan ki mon privilez li menm e privilez Lasanble, mon santi ki'n ganny afekte par sa desizyon, ki ozordi nou ti pou annan nou de Minis, ki mwan

menm mwan koman *Chief Whip US* e *Chief Whip LDS* Onorab Sandy Arissol, nou ti'n fini tonm dakor lo la.

Mon rapel nou ti'n tonm dakor enn, apre nou'n vwar in tro pti git kestyon annou met de pou nou kapab *tackle* lalis. Me i domaz, ki nou'n zis - parey ou'n dir apre ki nou'n fer nou travay sak *Caucus* - i domaz ki zis nou'n vwar lo *Order Paper* ki se *VP* ki pe vini pou reponn de kestyon, ki mon panse pa tro lontan in antre lo lalis kestyon.

So mwan mon santi mwan dezapwente e nou *Caucus* osi i dezapwente avek en tel desizyon. Mr Speaker labitid ou koman nou *Chair of ABC*, ou lyez avek bann *Chief Whip*, kot i konsern lekel Minis ki pou vini, lekel Minis ki nou pou ranplase. Mon pa konnen si *Chief Whip LDS* ti okouran e in ganny kontakte pour met *VP instead of* en lot Minis.

E mon santi Mr Speaker, ki sa pe vin enn pti pe kouran sa zafer Minis pa pe vin reponn kestyon dan Lasanble, e menm *COGA* osi nou pe ganny menm problemm.

So mon pa pou al lo *COGA* la, akoz toultan letan nou pou ganny en *hearing*, la nou pe al annan enn Vandredi, ou tann dir pa pe kapab vini. Akoz zot *crop up* avek bokou travay. Mon

ti a kontan fer resorti Mr Speaker, ki avan sa akoz i vin presedans sa. Nou ti annan *LDS*, lo sa kote latab, e zot ti toultan met presyon, lo nou bann Minis. E menm sesyon Lasanble in deza arete pou fer serten Minis vin dan Lasanble, vin reponn kestyon. E ozordi nou vwar ki i enposib pour nou kapab fer keksoz parey *or* i pa fasil pour nou ganny sa Minis, si *EU* in vini in santi *EU* i son priyorite.

Alors Lasanble li menm i pa zot priyorite, mon santi sa i en mank respe. Pour nou koman bann Manm Lasanble,

(APPLAUSE)

HON SYLVANNE LEMIEL

E mon ti a kontan plede Mr Speaker, mon ti a kontan plede ki sa latitud i dis-kontinyen. Annou nou tou travay ansanm. Minis annan respe pour Lasanble, akoz Lasanble mon santi ki nou annan respe pour L'Egzekitiv.

So mon panse ki L'Egzekitiv osi i merit donn nou sa menm respe letan i konsern ki nou demann zot pour zot vin isi dan Lasanble pour ekliersi keksoz, reponn kestyon, tir dout dan latet piblik la deor! Mersi Mr Speaker.

(APPLAUSE)

MR SPEAKER

Mersi Onorab Lemiel. Parey mon'n dir ou mon rekonné ki i annan en priviléz ki enplike ladan. Zis lo size respe, mon pou dir mon krwar poudir sa i pa'n fer par mank respe. E mon santi poudir Minis i annan respe pou Lasanble parey nou, nou respekte bann Minis. E nou pou eseye pou fer sir ki sa bann dekalaz pa ariv ankor.

Bon pou *deal* avek en lot pwen ankor e mon pe donn bokou konprenezon bann Manm lo Lopozisyon. Ti annan en Kestyon Irzan, lo *Order Paper* ki mon pa'n mete.

E mon'n eksplik sa Manm Onorab Cosgrow mon rezon akoz mon pa'n met son kestyon. Me selman mon pou donn li laparol pou en *matter of privilege*, pour li les Lasanble konpran poudir i ti annan son *Urgent Question*. Onorab Cosgrow ou annan laparol.

HON WALLACE COSGROW

Mersi Mr Speaker. Bonzour Mr Speaker ankor. Bonzour tou Manm Onorab e bonzour tou dimoun ki pe ekout nou. Mr Speaker, an lakordans avek seksyon 34 nou *Standing*

Orders, mon ti submit en Urgent Question ki lir koumsa Mr Speaker;-

Eski Gouvernman i kapab donn Lasanble en leksplikasyon, akoz ki serten bann dimoun ki sipoze pe benefisyé avek sa lasistans finansyel tanporer R500, pa ankor resevwar sa lasistans pou mwan ki'n fek pase?

Annefe ou a note Mr Speaker sa i mon dezyenm Kestyon Irzan ki mon anmennen dan sa laliny. Mon ti fer enn avan nou ti pran *recess*, e tou lede ti konsern sa larzan R500 ki sirtou bann dimoun ki lo bann benefis sosyal, bann dimoun ki lo *retirement benefit*, e osi bann lezot benefis sosyal zot, zot pa vvar li aparet lo zot kont, e zot pa konnen si zot pe gannyen si zot pa pe gannyen.

So mwan mon krwar, mon santi ti en keksoz ki devret vin dan domenn piblik. E ki Gouvernman i devret enn fwa pour tou donn nou en leksplikasyon, donn sa bann dimoun deor ki pe ki annan dout en leksplikasyon, pour zot kapab *at least* met zot lespri an pe, akoz dayer sete Gouvernman ki ti anons sa pour zot.

E zot kapab zot osi konnen letan i ariv lafen dimwan, ki pou ekspekte *from* sa ki zot sipoze

ganny transfer dan zot kont. So se sa rezon Mr Speaker ki mon'n met sa kestyon. E mon swete ki sa kestyon i ava kapab ganny pran o pli vit posib. Pour ki nou ava kapab met laklarte deor e dimoun i a kapab *at peace* avek sa *issue R500*. Mersi bokou Mr Speaker.

MR SPEAKER

Mersi Onorab Cosgrow. Lo kestyon Onorab Cosgrow, mon annan en pwen prosedir ki mon bezwen zis pran lokazyon pou repeate ;- Kestyon Irzan i devret ganny donnen avek Lasanble avek 24er notis avan *Question Time*. E sa pa ti leka dan se ka.

Me selman i pa zis akoz sa ki mon'n soz. Mon'n eksplik mon pozisyon lo Kestyon Irzan. E mon pa pou repet mon lekor la. Zis mon a dir ki, mon'n ofer Onorab Cosgrow possibilite ki i kapab prezant son kestyon ase vitman, ler Minis konsernen i vin dan Lasanble. Mersi.

Avek sa nou ava pran en pe, tir biznes lo *Order Paper* avan nou prosede avek *PNQ*. Nou annan Prezantasyon Dokiman Madanm Deputy Clerk.

MADAM DEPUTY CLERK

Bonzour Mr Speaker. Mersi. Bonzour tou bann Manm Onorab, tou staff Sekretarya e

tou dimoun a lekout.
Prezantasyon Papye i comme swivan: -

S.I. 101 of 2022 Control of Rent and Tenancy Agreement (Rent Board Rules and Procedures) Rules, 2022

S.I. 102 of 2022 Public Health Authority (Amendment of Third Schedule) Regulations 2022

S.I. 103 of 2022 Public Health Authority (Emergency Use Authorisation of Vaccines and Medical Products) (Amendment) Regulations 2022. E finalman;

Report of the Auditor General on the Covid-19 Relief Fund Account. Mersi Mr Speaker.

MR SPEAKER

Mersi madanm Deputy nou osi annan en *First Reading* pour en *Public Bill*. Ki mon a demann ou pou fer.

MADAM DEPUTY CLERK

Mersi Mr Speaker. *This Act may be cited as the Agency for National Human Resource Development (Validation and Repeal Act) 2022.* Mersi.

MR SPEAKER

Mersi. Byen, mon a demann rapporter pou apel Minis pou *Private Notice Question*. Onorab

Pillay mon'n vwar ou lev lanmen si ou ti oule adres Lasanble a se pwen la, ou ti'n devret demann mwan, pou kapab adrese.

I konsern ou *PNQ*. Wi be nou pou adrese, mon adres ou *PNQ* apre ou a kapab poz en kestyon si ou bezwen.

Bon bonzour Minis pour Later e Labita, Mr Billy Rangasamy. Bonzour egalman e byenveni dan Lasanble, Mrs Muriel Morgan PS pour Later e Mr Denis Barbe PS pou *Housing*. Mersi pou zot partisipasyon. E bon sipor pou *Habitat Week* ki zot ladan. Bon wi annefe, mon'n atann larive Minis pou mwan fer en pwen lo sa *PNQ*.

Avan nou komanse, mon bezwen met en pwen enportan a latansyon bann Manm. E apre Nouvel yer swar nou tou nou konnen ki sa kestyon i konsern Sef Ziz Ronny Govinden. Mon met latansyon bann Manm, lo *Standing Orders* 59(5).

Ki mon quote briyevman. *“The conduct of the President, the Vice-President, Speaker, Deputy Speaker” and so on.* E i osi dir *“members or judges of superior court and magistrates and all constitutional appointees and their families, shall not be referred to except upon a motion moved for that purpose”*.

Donk mon vwar ki Onorab Pillay in *phrase* son kestyon byen, i pa'n fer referans avek kondwit Sef Ziz. Me mon pe demann tou bann Manm pour osi port sa a zot latansyon.

Alor mon demann zot pou reste lo kestyon ki'n mete lo *Order Paper*, ki lo prensip in ganny swiv dan sa tranzaksyon. E pou evit kestyon lo personnalite oubyen kondwit Sef Ziz osi byen ki lo okenn alegasyon.

Me mon a met lanfaz osi lo dernyen fraz, sa *Standing Orders*, “*except upon a Motion moved for that purpose*”.

Savedir si Manm i le lev kestyon kondwit, en zofisye i bezwen anmenn en Mosyon dan Lasanble e i lib pou fer sa. So sa posibilite i egziste. Onorab Pillay ou annan en kestyon lo ki mannyer ou *PNQ* pou ale.

HON SEBASTIEN PILLAY

Bonzour Mr Speaker. Avan mon koz lo sa pwen, mon ti a kontan zis avek ou permisyon lo non tou dimoun lo sa kote latab. E mon pa'n tann personn fer. So lo non Lasanble mon le swet tou bann ansennyan, en bonn fet *Teachers Day*, en bonn lasemenn ansennyan.

Koman en ansyen ansennyan mwan menm, ler mon ti komanse an 1997, en

long parkour ki mon'n fer dan Minister Ledikasyon. Mon konnen ki zot travay en travay difisil, me en travay tre nob. E tre enportan.

E mon'n sorti dan en fanmir kot in annan bokou ansennyan. Mon manman, mon madanm ozordi menm mon fiy, pe etidye pou vin en ansennyan.

So mon ti a kontan swet zot tou en - mon swete ki zot tou zot pas en tre bon moman, e ki reste asire ki nou pou kontinyen reste konekte e nou pou kontinyen fer nou mye pour fer pase zot bann konsern ki zot gannyen, oubyen ki zot annan, pandan letan ki zot pe fer zot travay. Mon ti le zis met sa lo rikord Mr Speaker.

Dezyenmman Mr Speaker mon le zis fer sir ki mon pe ganny en *commitment* avek ou, ki ou pe *allow* Kestyon Siplementer, me ki ou pe dir Kestyon Siplementer i bezwen reste *within the ambit of 59(5)*.

MR SPEAKER

Absoliman.

HON SEBASTIEN PILLAY

Ok se sa ki ou pe dir, so nou pou annan siplementer.

MR SPEAKER

Absoliman.

HON SEBASTIEN PILLAY

Mersi Mr Speaker akoz mon pe met sa lo rikord, akoz pou ler ou antann Mr Speaker...

MR SPEAKER

Mersi Onorab mon'n fini reponn sa. Lo ou premye pwen *Teachers Day*, mon aksepte ou bann ve ki ou'n anvoye. Me selman mon demann ou osi, pour la prosenn fwa sinal mwan ki ou le fer sa kalite deklarasyon. E nou a fer sir ki i antre dan prosesis. Mersi.

HON SEBASTIEN PILLAY

Tou sa ki mon fer napa byen, so i ok.

MR SPEAKER

Nou pou'n pare pour *PNQ*. E *by the way* mon'n dir mon'n esper Minis antre ek son delegasyon pour mwan met zot latansyon osi, lo sa *Standing Orders* ki mon asire zot okouran. Onorab Pillay ou kapab poz ou *PNQ*.

HON SEBASTIEN PILLAY

Mersi Mr Speaker. Mr Speaker mon *PNQ* i lir koumsa: -

Avek bi onor langazman Lasanble Nasyonal pou rod leklersisman lo bann size ki konsern pep Seselwa, e retir spekilasyon apre ki serten dokiman in ariv dan domenn

piblik konsernan en transfer en later *parcel H8312* kin ganny otorize par Gouvernman resaman, e ki'n osi soulev bokou kestyon parmi nou popilasyon, eski Lasanble i kapab ganny en leksplikasyon lo:-

Ki bann rezon deryer laprouvazyon pou transfer sa *parcel* later? E

b) Ki pozisyon Gouvernman an sa ki konsern Polisi ki sak endividé i annan drwa aste zis en *parcel* later? Mersi Mr Speaker.

MR SPEAKER

Mersi Onorab. Minis ou respons silvouple.

**MINISTER
RANGASAMY**

Mersi Mr Speaker. Bonzour Mr Speaker *Leader Lopozisyon*, *Leader Zafer Gouvernman*, tou bann Onorab MNAs, tou piblik ki a lekout. Ki Bondye i beni nou ozordi, dan nou tou travay e tou bann Seselwa dan tou landrwa kot nou ete.

Mr Speaker, mon note ki kestyon ki'n ganny demande par *Leader Lopozisyon* i fer referans avek en kare later nimo *H8312* - an Angle *H8312*. Parey ou'n fer resorti Onorab in *smartly* pa

mansyonn non okenn dimoun. Mon sipoze sa i akoz i tonm anliny avek *Standing Orders* 59(5) Lasanble Nasyonal. E par respe pou regilasyon Lasanble Nasyonal mwan osi, koman en profesyonnel e dan pozisyon ki mon pran, mon pou montre tou respe. Mon pou donn leklersisman lo lenformasyon ki kestyon i demande.

Premye parti kestyon, i demande ki bann rezon deryer laprouvason pou transfer sa morso later? Mr Speaker sa transfer later in vin apre en pe letan ki sa aplikan ti pe tranzakte, avek Minister lo son ka. Baze lo rikord sa aplikan ti'n fer aplikasyon, avek Minister an 2018. Pandan ki i ti a pe rezourd serten problem personnel.

Ansyen Gouvernman ti'n donn - mon repeate ti'n donn en langazman pou rod en solisyon anliny avek sa ki ti'n arive. Boner 2021 mon Minister ti resevwar en nouveau demann atraver en let, pou li aste en morso later. E sa aplikan i en Seselwa. Apre ki i ti'n fer serten resers, lo bann kare later ki en pe vid oubyen pa'n ganny devlope dan diferan parti Sesel.

Sa morso later ti ganny idantife e mon bann teknisyen ti fer zot analiz. Me la pou

rezourd problem e mon'n anmas sa bann dosye e alors avek tou senserite nou'n travay. Anliny avek langazman Gouvernman presedan - mon repeate anliny avek langazman Gouvernman presedan, sa laplikasyon ti ganny konsidere parey nou konsider, okenn aplikasyon pou en morso later.

Tou prosedir ti ganny swiv e apre bann korespondans apropriye Gouvernman, pa ti vwar okenn rezon akoz alokasyon pa ti kapab ganny fer. E se a sa moman, ki sa morso later ti ganny transfer, an swivan menm konsiderasyon, ki tou Seselwa i swiv, letan zot pe aste later Gouvernman. E sa ti boner dan premye kar 2021.

Prosedir pou fer bann tranzaksyon avek Biro Later, Biro *Attorney Zeneral*, i bann prosedir ki ase long. E finalman transfer ti ganny konfimen sa lannen. Finalize (eskiz mwan).

Mon bezwen fer resorti ki sa morso later, ti ganny vann lo en pri pli ba ki en later prive, oubyen parey nou dir *market value*. An swivan Polisi Gouvernman kot i annan en sibvansyon lo later Gouvernman. *Of course*, tou bann Onorab, ki'n aste later Gouvernman i konn sa tre byen. Akoz bokou parmi zot, isi

prezan in pas dan sa menm prosedir. Sa i osi aplik pou lakaz ki Gouvernman i konstrir, ki ganny vann a en pri redwir.

Lide se pou ed nou Seselwa, nou bann frer ek ser Seselwa. Lide deryer sa, se otan ki posib en Seselwa i ganny en kare later oubyen en lakaz, pour li kapab elve son fanmir e fer grandi son zanfan.

Sa i lanfaz ki nou pe mete, espesyalman la, dan semenn ki nou pe selebre labita pour nou pei. Nou pa pou kit personn deryer. Me i enportan pour note, ki kontrerman avek later *land bank* kot Gouvernman i fer semen e met delo ek elektrisite, dan sa ka Gouvernman, ti zis vann sa later ek sa devloper ki bezwen fer sa. Tou konstriksyon semen pou arriv kot sa later, tou devlopman son teren, i son responsabilite.

Mr Speaker mon'n deza osi mansyonnen dan mon *interview* ki mon'n donnen avek *SBC*, avek *TeleSesel*, avek Nasyon ki sa kare later in enn onnetman, enn ki vreman difisil. E ekout mwan byen. Depi 2008 plizyer dimoun, in al vizite e in al vizit. E *PS Barbe* a konfirm sa, li ki arpanter ki ti arpant sa later 2008 dan bann lentalval dan lekip. I konn byen, personn pa'n pran sa later, tou dimoun in refize.

Zis pou azoute ki dan konversasyon avek sa endividé, akoz Gouvernman i annan en proze *land bank* a kote dan sa landrwa, sa endividé, in depans li anviron R300mil pou fer semen.

E preparasyon son sit, sa kare later 92, pou konstriksyon in kout li apepre R1.2-R1.3milyon;- savedir R1.6milyon, in bezwen depanse. Gouvernman pa'n depans en sou ladan, in son responsabilite.

Mr Speaker kontrer avek sa bann propagann ki pe ganny sirkile, mon le enform zot avek tou senserite ki Prezidan Ramkalawan pa a okenn moman, enterfer dan sa tranzaksyon, oubyen fer okenn faver pour sa endividé. Me sa case antye in ganny okipe par zofisyé mon Minister ziska ki transfer ti ganny fer.

E mon pa - mon oule *remind* zot pwen boner ki mon'n fer resorti, ki sa ti en langazman Gouvernman presedan, e koman en Gouvernman serye nou bezwen oner bann langazman.

Mon'n fer sa resaman lotrozour ler mon fer zafer *wayleave*, bann langazman ki'n ganny fer oparavan. Mon pa kapab dir Gouvernman i vini nou kas langazman. Dosye in

progrese e nou'n konplet dosye.
Senp.

Sa dosye i pa'n zanmen ganny anvoy-e kot Biro Prezidan pou okenn konsey oubyen desizyon, Mr Speaker. Mon espere en fwa pour tou mon'n fer sa bann pwen kler lo sa size. Mon'n fer 2 *interview* lo televizyon. Mon'n eksplike e mon espere la ek larepons ki mon'n donnen tou dimoun i ava annan en lendikasyon byen kler, poudir ki sa proze, sa demann i date 2018.

Gouvernman presedan ti'n fer en langazman, sa kare later i en pes en kare later 995met kare. I difisil, i en teren agresiv, depi 2008 pe asize. I pa dan en proze *land bank*. E tou sa bann faktor in ganny pran an konsiderasyon. E novo Gouvernman, in oner sa langazman, *full stop*.

Dezyenm parti sa kestyon i demande ki pozisyon, Gouvernman an sa ki konsern Polisi, si sak endividé i annan drwa aste zis en morso later? Mr Speaker, lentansyon Gouvernman i reste touzour parey. Ki en endividé, i devret kapab aste en zis en morso later Gouvernman.

Alor letan okenn laplikasyon e transfer pe ganny konsidere, sa i reste prensip ki gid nou. Tou bann verifikasyon

ki ti ganny fer, pour asire ki en endividé napa okenn later anrezistre lo son non avan ki okenn transfer i ganny fer.

Tou sa bann verifikasyon in ganny fer dan en fason *strict*. E PS Morgan i a konfirm sa. Mr Speaker i enportan sepandan pour dir ki annan bokou labi dan lepase. Kot nou vwar serten O Zofisyé dan Gouvernman ki'n annan plizer morso later Gouvernman ki'n ganny transfer, lo zot non.

Nou Minister ozordi pe travay pou asire ki sa zanmen i arriv ankor, e napa transfer ki ganny fer pour ki en endividé i ganny de bout later Gouvernman anrezistre lo son non.

Me Mr Speaker, i osi enportan pou mwan donn serten legzanp, kot en dimoun i kapab deza annan swa en lakaz, oubyen en morso later Gouvernman lo son non.

Souvan premye akizisyon i lo en koup. Me apre pou en serten rezon, zot relasyon i kase. Alor Lakour i donn swa sa msye, oubyen sa madanm, sa lakaz, oubyen sa later. Sa enn ki pa ganny sa byen, i souvan retourn kot Gouvernman e fer en aplikasyon, nou vwar bokou sa bann ka Mr Speaker.

Sa bann sirkonstans i arrive dan lavi. Dan bokou sa

bann ka parey mon'n dir, e kot lakaz oubyen later, i konsernen later i ganny vann dan sa bann sirkonstans. Me a tou moman letan sa dimoun i ganny sa morso later, sa novo morso later oubyen sa lakaz, napa en dezyenm lakaz oubyen later ki lo son non.

Savedir i bezwen fer sir e konplet sa tranzaksyon avek Biro Lanrezistreman Later, e i pa pou ganny sa prosedir konplete toultan i pa'n fer sa. Sa bann ka parey i ganny konsidere, pour son prop merit e desizyon apropriye i ganny fer.

Alor mon anvi met lanfaz lo lefe ki letan sa later ti ganny transfer lo sa endividé, ti napa okenn kare later lo son non e alors sa alokasyon ti ganny fer.

La mon oule azoute ki annan bann lenstans kot en laplikasyon later i ganny fer pli vit ki lezot. Par egzanp, dan en ka kot en zanfan i anvi aste en kare later, Gouvernman ki baliz avek later son paran, Gouvernman i pran sa pli vit. Akoz nou pe regard sipor pour lafanmir.

I kapab osi dan serten sityasyon kot en dimoun i annan son larzan petet pou devlop serten fasilite tel ki semen, lenstalasyon elektrisite ek delo, ki pour deblok lezot kare Gouvernman, ki pou

benefisyé Gouvernman e lezot Seselwa, nou osi pran sa an konsiderasyon spesyal.

Gouvernman i la a dispozisyon tou Seselwa. E nou fer nou mye pour asiste tou dimoun, pour benefis zot fanmir. Nou pare pou ekout tou propozisyon lo ki mannyer nou kapab bouz pli devan dan sa lespri.

A tou moman, mon Minister pou ekout kritik e propozisyon konstriktif. Mon travay nwit e zour mon Minister. I annan en kantite presyon lo nou. E nou fer tou nou mye posib, pou nou met a dispozisyon later ek lakaz pou nou Seselwa.

Apre tou nou la pou servi lepep, nou la pour servi sa pep, nou la pou servi tou nou frer ek ser Seselwa. Avek tou nou abilité, avek tou senserite, e avek tou imilite.

E parey tenm ki'n ganny swazir pou selebrasyon Labita sa lannen, "Nou Pa Pou Kit Personn Deryer." Mon le remersye ou Mr Speaker. Mersi.

MR SPEAKER

Mersi Minis. Wi mon pou pran kestyon siplemanter, bann Manm otan ki mon kapab dapre letan ki pour permet.

Pour sa lokazyon Onorab Pillay, mon ti a kontan komans

avek ou siplemanter. Akoz mon anvi ekliersi ou kestyon avan mon pas dan bann lezot Manm. So mon ava apel ou pou poz ou siplemanter. Mikro.

HON SEBASTIEN PILLAY

Bonzour tou dimoun ki a lekout e bonzour tou koleg Onorab. Bonzour Minis ek ou delegasyon e bonzour Speaker ankor enn fwa.

I pa labitud ki mwan mon komans siplemanter avan. Me mon ava pran li akoz ou demann mwan. E pou benefis dimoun mon pa pe vin fer kankan pour ki mon pa kapab demann bann kestyon ki dimoun in dir mwan, nou bezwen met devan Gouvernman pou demande.

Me selman i enportan ki dimoun i note ki sa pe ganny fer ekspre, pour ki mon ganny koupe, ki sa kestyon i ganny kontrole, i enportan pou dimoun konnen poudir sa kestyon ti pres pou pa ganny mete lo *Order Paper*. E nou bezwen lager pou met li lo *Order Paper*.

I enportan akoz zot kapab kasyet me i laverite, *Ok?* Premyerman Mr Speaker, mon ti a kontan demann Minis pou klarifye en keksoz avek nou. Minis in dir ek nou koumsa poudir in servi sa mo lo en baz

konpasyon, pou sa endividé. I pa mwan ki'n entrodwir karakter sa endividé dan kestyon. Se ou Minis ki'n entrodwir dan ou larepons.

So mon bezwen *go according to larepons* ki ou'n donnen. Eski sa endividé an kestyon ti'n deza ganny lezot *plot later Gouvernman*, ki'n swa vann oubyen in *dispose of* dan en lot fason? Eski i ti'n deza ganny en lot bout later Gouvernman?

Akoz Polisi Gouvernman se ki si ou'n deza ganny asiste en fwa, ou pa kapab ganny asiste en dezyenm fwa.

E Gouvernman *LDS* ti fer bokou tapaz lo la, pandan letan ki i ti Lopozisyon. Ki ler zot pou vin dan Gouvernman zot pou arete avek sa pratik ki pou annan faver ki ganny fer pour serten dimoun. Sa i mon premye kestyon.

MR SPEAKER

Onorab ou'n mansyonn non faver pour serten dimoun. Fer sir ou pa al dan direksyon alegasyon okenn desizyon ki pa annord. Mersi.

HON SEBASTIEN PILLAY

Mersi mon dezyenm kestyon ki mon ti a kontan klarifye. Sa transfer in ganny fer lo en *market value* en pe plis

ki R1milyon. Me peyman in ganny fer lo en pe plis ki R100mil. Konbyen *stamp duty* in ganny peye lo sa tranzaksyon? E eski *stamp duty* in ganny peye lo *market value* parey Lalwa i egzize? Oubyen eski *stamp duty* in ganny peye, lo pri ki sa dimoun in peye?

In *which case* sa i reprezent *almost to an amount* tou en akt koripsyon. Pa koripsyon Mr Speaker, sa i reprezent en keksoz ki pa regilye, pa regilye.

Mon trwazyenm kestyion Mr Speaker, anba Lalwa *Judiciary Act*, akoz sa i an relasyon avek sa size endividé, e son travay e lenformasyon i dimoun i gannyen dan domenn piblik.

Tou bann dimoun ki tonm anba sa Lalwa i ganny en alawenns mon krwar pres R25mil par mwan, avek Leta pour lwe lakaz.

So lendividi an kestyion pa ti *destitute*, pa ti dan problem pa ti dan okenn sa. So eksplik nou Minis kwa ki ou pou pe dir par konpasyon. An relasyon avek lezot aplikan, ki'n *messenger* mwan yer swar, e ki'n dir mwan ki'n anvoy mesaz pour mwan, ki'n kontakte mwan ki'n dir mwan. Akoz ki Gouvernman pa ti met sa kare

later an kestyion, vi ki personn pa ti oule lo *tender*?

Akoz plizyer dimoun i dir mwan zot ti ava'n pare pou zot vin devlop sa kare later.

Mon lot kestyion Mr Speaker akoz ou'n dir mwan demann avan. Sa bann later kot sa dimoun in ganny later, i ti bann later ki ti ganny pran par Gouvernman avan avek en msye, lo demann Lopozisyon LDS Lasanble e enn bann Manm ki ti koz fortman lo la, se Onorab Flory Larue, avek en Mr Suleman si mon pa tronpe, pou fer tir bann kare later pou bann *graduates*.

Konbyen *graduates* ki'n fini ganny kare later dan sa rezyon H8312 i ete ozordi? Mon lot kestyion Mr Speaker pour Minis reponn nou.

MR SPEAKER

Ou a tenir avek sa enn.

HON SEBASTIEN PILLAY

Mr Speaker ou ki'n dir mwan demann avan.

MR SPEAKER

Demande be selman ki kantite kestyion ou kapab annan?

HON SEBASTIEN PILLAY

E *relax*, zot lekor zot.

MR SPEAKER

Silvouple, *Order!*

HON SEBASTIEN PILLAY

Mr Speaker Minis in dir nou poudir Prezidan pa *involve* ditou dan sa tranzaksyon. Be anba nou Lalwa Sesel, se Prezidan Larepublik ki donn *final approval* pou en transfer later.

So eski ou pe dir mwan poudir sa enn *approval* pou sa enn transfer, in ganny fer kontrerman avek prosedir etablir anba Lalwa? E eski ou pe dir nou, ozordi Mr Speaker, ki *when it's comes to* en endividé an relasyon avek (b), *when it's comes to* en endividé ki'n annan e *commitment* ki'n ganny fer par Gouvernman presedan.

Ou Gouvernman pou onor sa bann *commitment* pour tou sa bann dimoun ki'n annan en *commitment* ki'n ganny fer, kontrerman ek sa ki pe arive ozordi, kot i annan dimoun ki'n prezant let e *commitment* ansyen Gouvernman, ki sa bann *commitment* pa pe ganny onore?

Eski ou pe dir nou poudir sa pou arive. Akoz ou ki'n dir nou ou bezwen ler ou pran Gouvernman ou fer sa?

MR SPEAKER

Mersi ou a permet Minis reponn silvouple. Minis.

HON SEBASTIEN PILLAY

Ok.

MINISTER **RANGASAMY**

Mersi Mr Speaker. I annan pa mal kestyion be mon pran sa enn, mon a komans ek sa enn dernyen. Konnen sa dosye ti'n vreman byen avanse Mr Speaker, sa dosye ti'n preski konplete si ou kapab dir. Alors i ti zis en desizyon pou pran, pou finaliz li.

So parey mon'n repeete dan lepase, Gouvernman pou ed tou Seselwa, napa politik pou antre dan nou bann fason panse, tou i baze lo merit. So bann ka ki pe vin ...

MR SPEAKER

Minis poz enn pti moman silvouple. Onorab mon'n vwar ou ou'n lev ou lanmen konstaman. Ou pa pe met li ater. Eski...

HON SATHYA NAIDU

Yes-yes Mr Speaker. mon le raise *en point of order*. Mon privilez koman en Manm pe ganny afekte. I annan Onorab Johan Loze, depi zour mon'n antre dan sa Lasanble, toulezour ler in ganny en moman pou ensilte mwan dan

en fason ou en lot. Swa i fer atraver lo *floor*, ou pa pe tandé.

Me selman mwan mon tandé i afekte mwan. Menm an deor Lasanble Nasyonal, mon'n ganny ensilte.

And I can't take it any longer Mr Speaker!

MR SPEAKER

Ok. Eski, ekout mwan. Mon pe dir bann Manm, mon pa kapab toler okenn dezord dan sa sesyon. Bann Manm ki enteronpe, mon pou demann zot pour sorti dan Lasanble pour sa *sitting*. Mon fer sa kler.

Onorab Naidu mon pa'n tann remark Onorab Loze. Mon ti ava apresye, mon ti ava apresye si ou prezant en konplent lo sa size avek mwan an ekrir. Mersi.

HON SATHYA NAIDU

Pa en problem Mr Speaker.

MR SPEAKER

Mersi. Fotespere tou Manm. Onorab Pillay dan son kestyon mon le osi fer remarke, in mansyonn en mo koripsyon. Ki mon krwar mon pe envit tou Manm, mon pe endik tou Manm, pou zot evite akoz mon'n dir mon pa oule okenn alegasyon.

Byensir in retire apre, me selman e in byen fer pour retire.

Me selman mon pe *remind* bann Manm lo limit ki mon'n mete, mannyer nou tret sa kestyon. Minis eskiz mwan pour sa enn enteripsyon. Mon a demann ou pou kontinyen prezan.

MINISTER

BILLY

RANGASAMY

Mon apresye on lenthervansyon Mr Speaker. Ler mon ti pran sa desizyon pour mwan sorti kot mon pe travay pou vin travay pou Sesel, mon ti pe vin fer sa ek tou senserite.

E mon vreman mon anvi fer Onorab dan sa Lasanble konpran sa. E mon vvar parfwa zot pe kestyonn mon bann desizyon. E fransman verite parey mon'n dir, sa dosye ti vreman byen avanse. I ti zis pou konplet sa tranzaksyon. Sa mon pe fer li kler.

I annan plizyer dosye kot ale vini pa'n kapab pran en desizyon e stratezi ki mon'n dir sa bann dimoun ki travay akote mwan - mon de PS, met lavi rezourd sa bann problem, pou Lepep Seselwa silvouple!

(APPLAUSE)

MINISTER

BILLY

RANGASAMY

Sa mon pe fer li konpran, Onorab. Mon vin travay mwan pour sa pei. E dezyenm pwen, aprouvasyon mon ti repet ou Mr Speaker atraver ou, mon ti fer kler Onorab Pillay ki tou prosedir ti ganny swiv.

Mon teknisyen la i ava reponn pwen lo sa size pri e mon ava donn li laparol pou apros sa pwen ki rezon sa pri eksetera. Me selman tou prosedir ti'n ganny fer. Parey mon'n dir ou, ti'n preski fini sa dosye. Ti zis en *matter to complete* li. E se sa ki nou ti fer.

E lo sa bout *stamp duty* mon ava demann Mrs Morgan pou eksplik sa pwen osi. Me sa i pa tonm dan responsabilite Minister Later ek Lakaz. Sa i en lot Departman. Selman i a klarifye sa pour nou e si nou napa larepons nou ava rod sa larepons.

Akoz sa later pa'n al lo *tender?* I en bon kestyon. Me par kont dan sa loptik pou rod solisyon, e sa ti enn bann solisyon ki ti pe devlope letan sa dosye ti'n avanse. Nou ti en fwa pour tou konplet sa pour nou regle sa sityasyon. E nou le fer resorti, ler sa endividé ti apros nou ek sa opsyon, i ti en opsyon ki nou ti analiz li byen pros.

E parey nou'n fer resorti i en dosye, en teren ki'n kout i pe kout anviron 1.6milyon pou

kapab fer li, prepar li pou ou kapab devlop li. So ou annan devan ou, ou annan en *Minis* devan mwan, mon kapab regle en problem, bouz devan pour mwan kapab, met mon lenerzi e regle tou sa bann lezot dosye ki la.

Mon bezwen kapab pran kouraz pour desizyon. E se sa ki mon ti fer sa letan, avek gidans mon Departman Teknik.

Lo sa size konpasyon. Konpasyon mon pa'n zanmen lev sa pwen la dan mon larepons. E ouvertman dan bann kestyon ki ti vin avek SBC ek *TéléSesel* mon ti fer resorti sa pwen. Me la an tou respe pour sa endividé, mon pa'n fer sa pwen dan mon larepons i kler mon pa'n mansyonn sa ditou dan mon larepons.

Me pour sir, mon frer i sagrinan ki nou pep e nou pei i annan en kantite problem divors. I en fe ki nou pou bezwen konpran. Konmsi mon kapab get zot tou dan zot lizye dir mwan si zot pa konn detrwa dimoun ki pe pas dan sa bann sityasyon? So...

Gouvernman oparavan in analiz sa zot osi, e nou Gouvernman in konplet li. Sa bann ka parey i sansib. E parey mon larepons in dir, mon krwar i pou neseser pou annan en bon dyalog fran. Fran e direk pour

nou analiz sa sityasyon, akoz kot nou Minister nou inonde avek sa kalite ka. E toulstan bann ka i ganny analize dapre merit. I annan plizer ka kot i ganny solisyon parey in ganny fer oparavan.

Wi sa msye ti'n ganny, sa endividé ti'n ganny asiste koman en koup oparavan. Wi, i ti ganny lotorizasyon Gouvernman oparavan pou relev konstriksyon pour li vann en kare later. Sa i bann fe. Me ler nou'n fer tranzaksyon pou rann sa morso 993met kare ti napa later lo son non.

Sa prosedir ki ti ganny swiv, e i pou toulstan reste prosedir ki nou pou respekte. Mon konpran ki'n ariv sa sityasyon antre zot. E i kler ki i pa ti fasil, e alors en desizyon in gran parey mon'n fer resorti. E i en morso kare later ki vreman ti difisil pou devlope.

Mon krwar mon'n preski reponn tou bann kestyon Onorab. I annan sa de pwen lo sa zafer Suleman ki mon a les PS reponn e lo *stamp duty*.

Non, ou ti mansyonn Onorab ou ti pe dir poudir nou'n.....

(Off-Mic)

MINISTER **BILLY RANGASAMY**
Ou'n mansyonnen Onorab.

(Interruption)

MR SPEAKER
Order! Order! Minis reponn se tou. Si ou'n fini ...

MINISTER **BILLY RANGASAMY**

Ok, ok eskiz mwan Mr Speaker sa kare later i pa dan sa proze *land bank* pour sa non ki ou'n mansyonnen. I pa tonm dan sa kad sa proze. Sa proze i annan son bann teren ki mon a les PS eksplike son bann kare later ki pe ganny, ki pa ankor konplete, par kont i ankor anba konstriksyon. En proze ki pe kout Gouvernman bokou larzan. E i en proze ki sipoze ganny konsewar en pe letan pase.

E nouveau Gouvernman pe sey konplet li pou enn fwa pour tou, pou nou kapab ed bann lezot aplikan. An se moman les PS Morgan donn bann fe lo sa proze. Me mwan ki mon le fer resorti kare later *H8312*, pa tonm dan sa kad sa *land bank project* lo li menm sa nouveau proze.

E alor nou pa pe anpes okenn nouveau Seselwa ganny en

kare later an konsekans. Mersi Mr Speaker.

MR SPEAKER

PS ou kapab ekliersi sa bann pwen.

PS MURIEL MORGAN

Mersi Mr Speaker. Mersi Onorab. Sa kare later i ganny trouve akote nou proze *land bank* Sorento. I en proze ki in ziska la vreman, vreman difisil pou devlope, baze lo teren. Me nou annan en lekspektasyon lo kote Departman Later nou'n plizoumwen fini *survey* bann *plots*. So nou pe gard nou aepre en dizenn plot ki pou ganny *allocated*. Me nou *still* ankor, nou annan finisyon sa semen pou nou fer. E enn bann gro problem osi ki nou pe gannyen i en problem drenaz lo sa teren li menm.

E zis pour mwan adres lo kote pri, so tou later Gouvernman ki ganny vann *at a subsidized rate*. I ganny vann lo menm *subsidized rate and* son *average* i aepre R125 par met kare. Rezon akoz nou met sa *subsidy* an plas, se ki sa i *allow* nou pour nou kapab met sa restriksyon devlopman avek lavant lo bann later.

So as much as possible parey toultan nou'n dir, nou anvi ki dimoun i benefisye, i pa

pe deswit oubyen dan enn pti moman letan, revann sa later pour en pri ki egzorbitan. E se pour sa rezon ki nou met sa restriksyon lavant pour 15an.

Lo kote *stamp duty*, mon napa sa lenformasyon deswit devan mwan. Me selman mon a kapab pas sa lenformasyon avek ou Onorab. Me zis pour mwan konfirmen poudir wi *stamp duty* i ganny pran lo valer marse sa later, e pa lo valer *subsidized*. Unless ki *stamp duty* in ganny retire pour bann dimoun ki fer premye fwa ki zot aste en later avek Gouvernman.

E normalman, pou nou kapab bouz devan an term *stamp duty payments* se lo kote Biro Rezistrar ki fer zot neseser baze lo evalyasyon, pour zot donne ki kantite ki *stamp duty* i ganny met devan. Mersi.

MR SPEAKER

Mersi mon pou pran kestyon Onorab Cosgrow prezan.

HON SEBASTIEN PILLAY

(Off-Mic)

MR SPEAKER

Ki *point of order* Onorab?

HON SEBASTIEN PILLAY

Mr Speaker ler mon lir *Standing Orders* i akord mwan en privilez. En privilez ki ou pa

kapab pran, ki Lasanble pa kapab pran. Ozordi bomaten mon pe demann en kestyon, pou rod leklersisman pou lepep Seselwa.

E sa bann larepons ki nou pe gannyen Mr Speaker, bann larepons pa akseptab. I inakseptab akoz nou pa pe ganny larepons konplet. E mon le met devan Mr Speaker, ki ler mon demann en kestyon mon'n swiv tou lord ki ou'n donn mwan.

Menm si nou'n sey manouvre zis pour mwan satisfer sa ki Lasanble pe donnent. Par mwan ki'n anmenn ni maryaz, ni divors okenn dimoun dan Lasanble. Sa in ganny fer par Minis. Prezan mon le met devan ou Mr Speaker ...

MR SPEAKER

Onorab. Mon pe dir ou...

HON SEBASTIEN PILLAY

... eski ou vwar li normal ...

MR SPEAKER

Onorab ekout mwan. Ou'n konpran mwan byen, ki mon'n dir ou mon evit diskisyon lo personnalite, oubyen kondwit. Savedir ou pe respekte ou kestyon lo prensip tranzaksyon ki ou'n mete dan ou kestyon orizinal.

E mwan mon santi poudir Minis in reponn ou kestyon. Alor mon pe dir ou fini avek ou *matter of privilege*, ou *point of order*. Akoz mon le pas lo serten kestyon lezot Manm. Mersi terminen silvouple.

HON SEBASTIEN PILLAY

Mersi Mr Speaker. Mon *matter of privilege* i relye ek lefe ki Minis ler ti prezant son Polisi Later dan Lasanble, i ti dir avek nou koumsa poudir Polisi Later Gouvernman, se pou asiste bann aplikant zanmen in deza ganny asiste avan.

Dan konteks sa enn tranzaksyon. Lasanble ti ganny dir sa e ti *endorse* sa. Don konteks sa tranzaksyon endividé an kestyon, in deza ganny en later ki'n vann, in ganny enn dezyenm ki'n arriv dan en sityasyon. E la in ganny enn trwazyenm.

E sa enn trwazyenm prezan, nou pa kapab ganny dir dan Lasanble, lo ki *rates stamp duty* in ganny kalkile. E mon ganny en konpran ki mannyer ou koman Speaker Lasanble Nasyonal, ou pa santi poudir i enportan pour nou konnen si sa *stamp duty* ti ganny peye lo sa *market value*.

E menm si in *waive*, sa dimoun pa ti en *first time buyer*. In deza aste later. E mon pa

konpran ki mannyer nou pa ganny sans... Gouvernman lo sa size. Mr Speaker ...

MR SPEAKER

Ou a terminen silvouple. Nou a terminen. Lo *stamp duty*, lo *stamp duty PS* in dir i napa sa lenformasyon avek li. Si i kapab gannyen, i a donnen. Si i ti vreman esansyel pour kestyon, ou ti a met li dan ou kestyon orizinal. Mersi. Prezan - Onorab Georges ou annan en *point of order*. Kwa?

HON BERNARD GEORGES

Yes Mr Speaker. Mon ti anvi zis aport a ou latansyon, e latansyon Lasanble, latansyon Manm ki'n donn sa kestyon. Order 36(1)(O) ki dir ki ou pa pou demann en kestyon ler lenformasyon i aksesib dan domenn piblik.

E lenformasyon *stamp duty* i aksesib dan domenn piblik. Mersi.

MR SPEAKER

Mersi pour sa leklersisman. Mon a

HON SEBASTIEN PILLAY

(Off-Mic)

MR SPEAKER

Mon a... non! Non! mon pa pe pran lot *point of order* e Onorab

Pillay mon pe demann ou swiv lord Lasanble. Onorab Cosgrow ou kapab met ou kestyon.

HON WALLACE COSGROW

Mersi Mr Speaker. Minis, Polisi i se ki en dimoun ki'n deza ganny asiste avan, i bezwen pas dan laliny parey tou lezot dimoun, ki pe espere. Sa aplikian i vin alor teknikman *a first-time home owner, home buyer unless sa in sanze*, ou ava dir nou Minis.

Alors akoz e mon le stress lo sa zafer *market value* ek *stamp duty*. Akoz ki i pa'n pey sa later lo *market value* e osi lo *stamp duty*. Akoz lenformasyon ki mon pe vvar *stamp duty* i apepre R6140. E mon asire zot bezwen annan en kopi sa lavant later pour zot kapab donn nou sa lenformasyon.

Dezyenm Minis, eski i pou pratik normal pou *fast track* en alokasyon dan en ka kot i annan divors. E si wi dir nou ki kantite ka zot in *fast tracked*, ki kantite ka i annan la ozordi ki zot pe *fast track*.

E si nou kapab donn garanti bann dimoun ki annan aplikasyon ek zot lo sa baz divors, kan zot *fast track* pou pase e kan zot pou ganny later ek Gouvernman?

E dernyen eski Minis, i kapab dir nou si Lasanble

Nasyonal anba *Access to Information Act*, i request sa file pou vvar bann tranzaksyon, eski Minis, e son Minister i pare pour *make available* sa file pour nou ganny bann lenformasyon ki dan sa file? Mersi.

MR SPEAKER

Mersi. Bann Manm pou bezwen limit zot kestyion en pe, akoz mon annan lezot Manm ki le demann kestyion.

So mon pou limit li pour de. Onorab Cosgrow, mersi pou ou kestyion. Minis ou a reponn silvouple.

MINISTER

RANGASAMY

Sa mersi Mr Speaker Onorab Cosgrow. Sa *access to information* ou'n fer resorti ki Lasanble i annan sa pouvwar pour demann sa. Mon'n aprann ki sa i posib, e mon napa problemm pou fer ou ganny sa dosye. Pou fer Lasanble ganny sa dosye Mr Speaker. Mon kapab konfirm sa, akoz nou napa nanryen pou kasyet. Mersi bokou lo sa enn.

Lo *fast track cases* mon krwar dan mon larepons mon ti fer resorti. I annan bann ka, konnen mon'n donn Minister Departman Later pour li deblok o mwen 100 ka par mwan. 100 ka, sa bann ka ki'n *back log* tou

sa letan. Pa divors, tou bann ka later ki'n anpaye. Swa en dimoun in demann enn pti bout later akote.

Ou konnen *land bank* i diferan. *Land bank* ou annan bann *land point system* ki ou bezwen swiv. Me bann ka later, bann pti tirayman, kot petet pa dir tirayman bann pti demann, kot en fanmir i deza annan en bout later prezan son fiy pe demann en bout akote pou fer son pti fwaye.

Bann ka *encroachment*, bann ka, pou fer avek regulariz serten difikilte ki'n arive dan lepase. An tou ka i annan en Departman Later i annan en ta demann. Demann sorti kot diferan Minister, demann sorti diferan Departman. So sa zot target.

So nou pe tap tou pou tou pour fer sa. Bann ki senp e *straightforward* mon met divan anba lezel nou bann dimoun. E nou debloke. Par egzanp parey mon'n dir, ou nou'n osi fer resorti, later akote paran. E sa bann ka ki mon'n mansyonnen oparavan.

Ok i pa, i pa neseserman *fast track*, i ki kantite lenerzi ki nou met ladan, kantite zefor nou met ladan pour nou konplet sa bann problemm -en? E se sa, bi nou Minister parske nou ganny bokou kritike lo

bann ka ki pran letan kot i annan trenn lipye.

Alor nou met en lenerzi spesyal, pour *clear* sa bann *backlog*. E sa, *once* ki nou *clear* sa bann *backlog* ek lagras Bondye nou a kapab *focus* nou lenerzi pou nou vreman devlop later Leta. E met zot a dispozisyon nou pep pou devlopman, pour lavenir nou pei. Mon vwar nou anpaye lo sa bann pti ka, en bann pti ka isi en bann pti ka, bann ka ki vreman pran bokou nou letan.

Get zis sa ka ki kantite letan i pe pran kan mon ti kapab, pe fer en ta proze pour nou pei. Be mon bezwen sey regle sa bann problem pour nou kapab bouz devan.

Alor lo sa, mon'n reponn ou pwen lo *access to information*, lo *stamp duty*. Sa i parey nou'n fer resorti, i en lot departman. I Departman Lanrezistrem Later e sa i ganny kalkile par zot. Par kont sa kestyon in leve, e koman en Gouvernman responsab nou ava analiz sa dosye byen o pros lo sa problem *stamp duty*.

E pour kwa pa, nou pa travay an *silo*, nou a verifye be ki'n arive. Si in ariv en konfizyon, nou a fer mannyer nou a regle. Mon le refer sorti sa pwen, i pa en desizyon e en kalkilasyon ki ganny fer par

mon Minister. I en lot Departman, *altogether*.

Mon krwar mon'n reponn ou bann kestyon spesifik Onorab. I annan ankor enn, *remind* mwan enn pti kou silvouple.

HON WALLACE COSGROW

Ok, wi Minis mon premye kestyon sete i Polisi ki si en dimoun, i ganny asiste in deza ganny asiste. Avan i bezwen pas dan laliny, ok sa dimoun i bezwen pas dan laliny. Alors sa aplikan i vin teknikman, teknikman i vin en first time home owner, home buyer.

So eski sa in sanze? Eski sa in sanze? Alors akoz sa dimoun pa'n pey sa pri, *the value of the land market value* e in pey en lot pri? So i teknikman in vin en *first time home buyer*.

MR SPEAKER

Bon nou'n konpran ou kestyon Onorab. Minis reponn silvouple.

MINISTER **RANGASAMY**

Bon mersi Mr Speaker. Lo ki mannyer bann Departman Teknik i analiz zot bann ka, akoz tou keksoz i ganny fer par Departman Teknik e Minis i ganny enplike ladan, dan zot deliberasyon.

Me selman to Departman Teknik, tou prosedir rod tou fason mannyer zot analiz zot bann ka i ganny fer par Departman Teknik Later lo sa ka. So alor mon a demann *PS Morgan* pou eksplik en pe, donn ou repons lo sa pwen Onorab Cosgrow.

MR SPEAKER

PS Morgan ou pou azoute.

PS MURIEL MORGAN

Mersi Mr Speaker. Mersi Onorab. Lafason ki nou travay, se i depan lo lafason lakantite zefor ki en aplikan i met ladan. Mwan dan mon term, depi ler mwan mon'n antre dan lofis nou annan ka ki nou'n ouver, e nou'n fermen *very straightforward*.

Rezon akoz nou'n fer li, sa aplikan in idantifye son kare later in met son zefor, in deside fer son *survey* lo li menm. Nou nou'n fer bann konsiltasyon neseser. A lafen dizour, sel fason ki nou pou kapab fer dimoun rантre dan en *queue*, se ki nou pe donn zis *land bank*.

E lefe i reste ki nou pa pe donn zis later, nou pa pe vann zis later *land bank*. Nou osi pe vann later ki an deor *land bank*. So ki *speed* son aplikasyon i bouze i pour tou depan sa aplikan a lafen dizour.

Lo kote valer sa later, parey mon'n eksplike, tou later ki Gouvernman i vann, nou vann li lo sa pri redwir pour ki nou kapab annan sa devlopman, sa restriksyon devlopman 5an. E sa restriksyon lavant 15an ki nou met an plas.

Si nou vann li lo valer marse;- (1) nou pe fer sa later pa *attainable* pour 99 poursan bann aplikan ki lo nou lalis.

E (2) i pou anpes nou met sa bann restriksyon, ki vedir ki i pou fasil pou en dimoun zis fer sa ki nou dir aste revann lo li menm. Mersi.

MR SPEAKER

Mersi. Mon a pran kestyon Onorab Sandy Arissol.

HON SANDY ARISSOL

Mersi Mr Speaker. Bonzour Minis. Bonzour avek ou delegasyon tou Manm Lasanble ki pe a lekout. Tou dimoun ki pe ekout nou. Mr Speaker mon ti a kontan demann Minis anvi ki Lasemenn Labita e ou'n dir moto se pa pour kit personn deryer.

Mon ti a kontan, demann ou anvi ki nou pe koz Lasemenn Labita e pour tou Seselwa laba deor, en kare later avek en lakaz pou li i en gran keksoz. Parske i bezwen anmas son

fanmir e soutenir son lekor, espesyalman pour son zanfan.

Alors sa ki mon ti a kontan demann ou, anvi ki nou pe koz lo sa ka spesifik, lo sa endividé, eski ozordi la letan ou pe koze, sa endividé li i ti'n deza aste later avek Gouvernman parey nou pe ganny dir. Esaki i tro tar pour ou Minister, Gouvernman fer sa dimoun pey en lot sonm larzan, pour ki sa later ki in aste, i vin en pri i tonm dan sa zone parey nou dir, i ganny son *real market value*?

Esaki i tro tar pour Gouvernman fer li pey en sonm an plis pour ki, sa bout later i vin *the market value* parey tou dimoun pe koz lo la?

Pour ki sa larzan ki nou ava gannyen, nou ava kapab devlop plis morso later pour ki plis dimoun i ganny later enkli bann zabitan Bel Ombre, ki pe ekout nou bomaten?

Mon dezyenm kestyon ki mon ti a kontan demann ou, i annan en size ki Onorab Wallace Cosgrow in koz lo la an term Polisi Minis. Esaki Minister i krwar poudir nou devret annan en dyalog avek Lepep Seselwa, oubyen menm avek Lasanble Nasyonal atraver en deba, pour nou ed Minister pour nou revwar en kou bann Polisi ki'n egziste pou plizyer lannen.

Ki mon dir Mr Speaker, parey sa ki nou'n tann dir se bann Polisi letan en msye ek en madanm i marye. Ou Sesel ozordi lamazorite bann madanm ki ganny tou keksoz, msye pa ganny nanryen li.

So letan sa msye ek sa madanm i kite, mazorite letan sa msye i retourn kot son paran, sa msye i *end-up* dan bwar, sa msye i *end-up* North East Point. I pa pou *end-up* anba en pon, me selman i ganny kite li tousel. Parske nou ganny dir, ou'n deza ganny asiste ek en lakaz, ou'n deza ganny asiste ek en bout later, alor demerd ou!

So eski Minis ou krwar poudir i enportan pour nou annan en deba nasyonal lo sa size ki nou pe koz lo la ozordi, pour ki dan sa menm tem ki ou'n koz lo la.

Pa ki kit personn ater pour ki okenn endividé dan nou pei ki ganny en problem dan son maryaz, i pa ganny kit ater akoz senpleman in deza ganny asiste.

Me Gouvernman i ava gid li an mazin bann ki lo lalis deza, ki mannyer nou pou asiste li, pour li kontiny son lavi olye zis abandonn li e kit li tousel. Mersi bokou Mr Speaker.

MR SPEAKER

Mersi Onorab Minis ou repons.

MINISTER **BILLY**
RANGASAMY

Mersi Mr Speaker. Onorab, mon apresye ou propozisyon ki ou'n met devan. Mon a komans ek sa *challenge* ki ou'n met lo mwan, pou al revwar ki mannyer nou kapab petet konsilte a lintern, e vwar ki mannyer nou kapab re-apros sa endividé.

Parske mon krwar ou annan en bon pwen, e nou a, e later in fini transfer so i konplike teknikman. Me pour kwa pa, mon pou pran ou konsey seryezman e mon'n demann mon koleg PS la pour nou lans sa dyalog. E vwar ki posibilite parey ou'n fer sorti, dan loptik pour nou kapab ganny en pe plis reveni, pour nou ed lezot ki dan bezwen.

Polisi,;- wi mon toutafe dakor Onorab pour sa dyalog i neseser e sa deba Nasyonal i neseser. Parske parey mon ti'n fer resorti, enn pti pe boner oparavan, i annan telman kantite ka ki nou pe rankontre lo sa size, divors bann fleo sosyal, bann fakter sosyal ki pe afekte nou.

E nou resours i limite, parey ou'n fer resorti i annan dimoun lo lalis. Nou resours i limite, me avek sa bi ek sa

stratezi, ek sa dezir pou pa kit personn deryer. I enportan ki nou pa, nou rod fason ki mannyer nou kapab diriz sa bann endividé ki pas dan sa sityasyon.

Akoz sa i lefe, nou pa kapab abandonn nou bann frer ek ser. E poudir parey mon refer sorti plizyer ka, sa ka la in eksplode parske petet sa endividé en dimoun ki prominan dan sosyete. Me i annan differan ka divors dan bann ka parey ki Minister in rezourd, pa zis dan sa ladministrasyon. Me dan ladministrasyon oparavan.

Lenportans se ler nou'n fer sa transfer, nou'n fer sir ki sa dimoun napa en later, oubyen en lakaz ki lo son non. Sa bout ki nou'n met lanfaz lo la, e ki nou pe fer. Me, me sa deba i neseser.

E mon envit Lasanble e Mr Speaker mon pa pou dir ou ki pou fer. Me mon krwar i tre enportan ki sa i ganny pran serye. Apre nou a kapab revwar sa, nou a tonm dakor ansanm. Nou bezwen rod fason ki mannyer nou pou al devan e nou ava met nide ansanm, nou ava fer sir nou vin ek en Polisi lo sa size, ki delika.

Dan en fason, ki i transparan, ki kler e ti ou dimoun i a dakor. En fason Minister i a ganny bon direktiv,

bon kriter pou nou servi, pou nou bouz devan. Alors mon vreman ankouraze par sa. E mon bi pou toulstan parey, zot konn mwan senserman zot konn mwan koman sa Minis ki responsab pou Later ek Lakaz.

Nou bi se rod solisyon, fer developman e anmenn nou pei devan. Alors si sa i ed nou kapab rezourd sa bann problem vit, Annan en bon direksyon, mannyer nou pou fer, nou a kapab met nou lenerzi pou ouver later, pou fer developman e lakaz pou nou pep frer e ser Seselwa. Mersi Mr Speaker.

MR SPEAKER

Mersi Minis mon a pran kestyon Onorab Aglae.

HON EGBERT AGLAE

Mersi Mr Speaker. Bonzour Minis ek *panel*. Minis mon ti a kontan pete ou ekliersi mwan premyerman. Si dan sa novo Polisi ki zot pe met an plas anba ou Gouvernman, i annan okenn mansyon ki fer referans avek Seselwa vizavi a son stati, ouswa zot pe tret tou Seselwa parey.

Kan i annan okenn bann tranzakson, later ouswa lezot tranzakson ki annan pou fer avek Gouvernman. Sa i enn.

Dezyenmman Minis, ou'n fer referans osi avek komitman kot ansyen Gouvernman in fer vizavi sa enn tranzakson.

Eski osi zot pe mazin osi, vwar akoz Gouvernman lepase in annan bokou bann komitman ki'n fer. Avek bann endividé ki ankor pe espere later. E eski osi sa bann ka parey osi i ava ganny met enn pti pe laklerte lo la. Pou kapab adres sa bann lezot komitman ki zot in dir ansyen Gouvernman osi in fer fas a Seselwa? Mersi.

MR SPEAKER

Mersi Onorab. Minis.

MINISTER

BILLY

RANGASAMY

Mersi Mr Speaker. Mr Speaker mon pour reponn sa kestyon *comme swivan*; - Mon ti fer en lapel dan Lasanble semenn pase. Mon ti dir zot tou bann Onorab e Onorab Lemiel in komanse in anvoy mwan, Onorab Arissol anvoy mwan, Onorab Roucou anvoy mwan. Konmsi bann ki mon mazin deswit, deswit.

Preski zot tou zot in komans saboul mwan, be selman mon'n demann zot tou ed mwan fer mwan konnen sa bann ka. Parey mon'n dir mon'n vin travay pour sa pei, mon pa

pou get kouler politik, ni ou larelizyon *whatever*. Nou pe rod solisyon e pour tou Seselwa.

Tou dimoun parey i ganny trete, solman ed mwan, donn mwan sa bann lenformasyon. En fason mon a met kad mon a met en pe presyon lo mon *PS* ek mon lot *PS* laba, pour zot kapab ed mwan debloke. Akoz zot konnen kekfwa, mwan mon pa konnen.

Be zot ed mwan met sa bann ka devan, nou a rod solisyon ansanm. Parske lekip i pli dinamik, e nou pe travay dir pour nou fer sa. Mon a dir ou enn pti keksoz Onorab. Ou konnen konbyen ka ki nou'n regle, si mon konmsi mon ti a voudre vin ek sa dosye. Konbyen ka nou'n regle, me dimoun pa zanmen dir ou mersi letan ou regle son ka.

Parey dan labib i dir letan Bondye ti ed sa bann dimoun, zis enn ki ti vin devan dan san, 99 ou pa tann zot. Bokou ka in ganny regle. Fransman verite target ki mon'n donn sa Departman, pou regle omwen 100 ka par mwan.

So ou kapab mazinen deza in ariv li pres 12 mwan dan sa pozisyon e son target i ou e mon *PS* la kot i konsern later, lakaz osi i annan pour li, zot bezwen *achieve targets*.

Selman letan ou'n ed sa bann dimoun, personn pa vin devan. Zis bann kekfwa ki ankor ganny en pe retar ki fer tapaz. Be gid mwan ek sa bann ki zot tou bann Onorab. Mon get zot tou en par enn. Les mwan konnen. Pa vedir mon pou al rezourd sa, mon napa en baton mazik, pou al rezourd li *overnight*.

Be nou a kapab relev sa bann ka fouray dan bann dosye e rod solisyon. E parey mon'n dir donn mwan letan pour mwan travay pour mwan kapab met later a dispozisyon e kan resours i arive, lakaz nou pe debourye.

Lakaz Departman Lenfrastriktir pe fer en ta proze, pou met pare. Planifikasyon pe ganny fer, *design* pe ganny konplete, *Planning approval* pe gannyen. I tousala in akimile.

Apre mwan dan *Cabinet* mon met presyon donn mwan larzan, nou pe al fer lakaz. Nou a tap laport deor, nou ganny larzan, nou fer lakaz. Nou a ouver teren, nou a met bann prodwi a dispozisyon nou bann *graduates*. Nou a fer bann proze, *self-finance midrange condos* ki mon'n koz lo la bokou yer.

So nou pe travay, fransman verite nou pe travay lo sa pep, nou sipoze fer sorti

Onorab, ed mwan ek sa bann ka ki ou konnen petet ti annan langazman dan lepase. E sa i aplik pour tou Onorab, ed mwan anvoy sa bann ka kot mwan, epi zot menm zot ava dir mwan ki lavites ki nou pe travay.

Selman mon kapab konfirmen, pou met lavi regle sa bann problem. Premye sours ki nou annan, e dapre abilite ki nou annan pour nou kapab deblok sa bann ka. Presyon i for lo Minister, en kantite presyon.

Me selman nou la pou vin travay, nou ganny nou lapey lafen dimwan. Nou vin travay nou tou. E lo sa lot pwen mon pou zis repet mon lekor, personn pa pou ganny kit deryer e tou dimoun pou ganny zot ka i ganny analyze parey Onorab.

Napa faver, napa faver ek mwan pa ek mwan, napa okenn bann zafer mon dalon, mon anvi ki ou travay drwat. E mon Minister mon met lanfaz lo la.

So sa de Speaker zot kapab, sa de PS i kapab pran laparol dir sa ki zot anvi dir e sa i lapros ki nou pe pran, parske later Leta i presye. Annefe later Leta i pour tou Seselwa. Sa dimoun ki ganny en morso i en privilez ki in gannyen. Lakaz parey. So ed mwan, ed mwan

zot tou anvoy zot pti *email* donn mwan zot lalis.

Bann ka ki zot konnen ki pe tarde nou a fer nou zefor posib pour nou regle. I pa fasil. Demann i o mon konnen, me selman lentansyon i la. Nou leker i la pour nou fer en bon travay pour sa pei. Mersi Mr Speaker.

Mr SPEAKER

Mersi mon a pran kestyon Onorab Larue.

HON FLORY LARUE

Bonzour Mr Speaker. Bonzour Minis ek ou delegasyon. Bonzour tou dimoun dan lakour e tou Manm Onorab. Mr Speaker mon ti a kontan demann Minis. Lefe ki Polisi lo *website*, i date 2018 kan ki nou pou vvar nouveau Polisi ganny mete ki LDS pe met an plas pou fasilit later pour tou dimoun?

E mon ti a kontan osi demann Minis, si letan en kestyon ki mon, ki Onorab Aglae in demande, me solman Minis pa'n klarifye, si dan nouveau Polisi nou determinen lo ki pozisyon en dimoun i annan dan lasosyete, ki determinen ki mannyer, i ganny akse avek later? Mersi.

MR SPEAKER

Mersi Onorab. Minis?

MINISTER
RANGASAMY

Mersi Onorab Larue pou ou kestyon. Mersi Mr Speaker. Onorab mon ok lo size revizyon bann Polisi. Mon'n fini donn lenstriksyon mon Departman Later ek Lakaz pou revwar tou sa bann Polisi. Bann Polisi mazer, zeneral i ti ganny prezante avek Lasanble en pe boner dan lannen. Si mon pa tronpe PS non?

Ti an Zanvye, me sa lannen eskiz mwan nou ti pe travay lo la. Me nou ti met ater, me i annan en kantite lezot Polisi siplemanter pour nou travay lo la. E zot annan en kalandriye travay pou revwar sa bann Polisi, zot pe fer sa dan zot letan *on top of* bann ka ki nou lekip pe regle.

Me tou lentansyon se moderniz sa bann Polisi, met zot anliny avek stratezi Gouvernman e stratezi ki nou al diskite dan Lasanble tou dimoun i a tonm dakor osi parey. E reviz sa bann Polisi. E enn parey ki'n mansyonnen parey Onorab Arissol pli boner.

Sa Polisi ki tous lo sa size divors, e bann ka parey. Ki larealite dan sosyete, bann problemm sosyal ki nou rankontre, nou a kapab vvar sa e ganny en konversasyon onnet

BILLY

e fran ansanm avek, pour nou kapab met lespri e donn bann propozisyon ki fer sans pou pei.

MR SPEAKER

Onorab ou'n demann 2 kestyon? Ou pe al klarifye oubyen.

MINISTER
RANGASAMY

Mr Speaker PS i annan en lot pti bout pou azoute ou kapab. Si ou permet mwan mon a demann li ed mwan.

MR SPEAKER

PS.

MINISTER
RANGASAMY

Mersi. Mersi Mr Speaker.

PS MURIEL MORGAN

Mersi Mr Speaker. Mersi Minister, mersi Onorab. Alor wi lo nou *website* Polisi i sa enn ki vye. An se moman nou *website* pe pas atraver *update*, kot wi nou pou annan novo Polisi.

Me okenn dimoun ki anvi en kopi sa Polisi, i fasil zot anvoy nou en *email*, nou *email* zot en kopi. Ouswa zot pas anba kot nou lofis e zot kapab ganny en kopi sa Polisi dan zot lanmen.

Lo dezyenm kestyon pozisyon pa en fakter ditou, ler

nou pe regard ka en dimoun. Annefe en ka i ganny regarde baze lo son sirkonstans, plito ki baze lo non sa dimoun an kestyon. Mersi.

MR SPEAKER

Mersi Onorab. Mon santi ou kestyon in ganny reponn ki ou pe al fer la, klarifikasyon? Yes ale.

HON FLORY LARUE

Mersi Mr Speaker. Mr Speaker lefe ki nou pe lo en pwen, en pwen ki nou pa pe ganny kler lo la kote *state land* avek *land bank*. Eski sa Polisi i met kler ki bann kriter pou akse *land bank* e ki bann kriter pou akse *state land*?

E mon ti a kontan demann Onorab Pillay atraver ou kan i pou anmenn *PNQ* pou sa 40 bout later ki *US* ti pran pou Minis silvouple? Mersi.

MR SPEAKER

Onorab nou a *drop* sa dernyen kestyon pou e en lot size. I annan en kestyon lo *policy* Minis, si ou kapab donn en repons vitman.

MINISTER

BILLY

RANGASAMY

Ok Mersi Mr Speaker. Mr Speaker, i en kestyon teknik

alors mon a les *PS* Morgan eksplike. Mersi bokou.

MR SPEAKER

PS ou adrese.

PS MURIEL MORGAN

Mersi Mr Speaker. Mersi Onorab. Alors okenn aplikan ki pe rod en kare later endividyle i egzakteman parey, anba nou Polisi. Sel diferans ti lo pri, lefe ki Gouvernman in bezwen envestir dan lenfrastriktir pou ouver *land bank*.

E sa i form parti nou stratezi pour nou ed maksimonm dimoun o pli vit posib. Bann diferans i annan pou fer plizoumwen avek later, akote paran. E sa parey nou ti eksplike, ler nou ti vin prezant Polisi, pli boner sa lannen i annan bokou pou fer avek akse, avek finansman e facilite ki paran i kapab donn son zanfan. Si i aste en later ki atase avek pour li. Mersi.

MR SPEAKER

Mersi. Mon a pran kestyon Onorab Vidot.

HON AUDREY VIDOT

Mersi Mr Speaker. Minis ler ou'n dir ki ou pa pe kit personn deryer, eski ou kapab dir ek sa Lasamble konbyen sa bann dimoun ki'n vizit e refiz sa

morso later, ki sorti dan distrik Roche Caiman?

Prenon kont dan nou distrik nou napa later *land bank*. E sa bann dimoun ti ava kontan ganny privilez, e loportinite lo baz konpasyon zis parey sa endividé. Mersi.

MR SPEAKER

Mersi Minis.

MINISTER

RANGASAMY

Mersi Mr Speaker. Mr Speaker lo konbyen ki'n vizite mon personnelman mon napa larepons e mon lekip napa sa larepons. Parske sa depi 2008, diferan ka. Si oule mon fouraye mon bezwen al perdi letan pour mwan al fouray dan sa dosye. Me mon ava fer sa legzersis, mon kapab dir ou.

So an prensip i kler depi 2008 i ti'n arpante, bann teknisyen ki travay Departman Later in alert nou sa leka. E plizyer me lakantite egzakt fodre mon al vreman akoz ou kapab konpran tou bann i pa. Napa en dosye ki zis lo en kare later. Tou dosye i lo bann endividé so nou pou bezwen al fouray lo tou ki bann endividé ki'n apros nou dan lepase.

E sa lenformasyon i lo sa dosye. Me i kler, ki sa kare later ti'n ganny arpante depi 2008 i

konplike parey mon'n fer resorti. I son fe aktyel, sa endividé i pe depans li dan rezyon R1.5-1.6milyon pour li kapab zis komans konstriksyon son lakaz pour prepar teren 1.3milyon, pour fer semen R300 mil.

So environ 1.5-1.6milyon en gro depans avan ki menm i kapab fer avan ki menm i kapab konstrir son lakaz. So se sa rezon zeneral akoz bokou dimoun parey nou ti fer resorti i an prensip dan mo Kreol nou dir ti plito en kap ros en kantite ros e teren ase agresiv. Mersi Mr Speaker.

MR SPEAKER

Wi ou pou klarifye i annan en pwen ki pa'n ganny reponn?

HON AUDREY VIDOT

Petet Mr Speaker. Pli boner letan Onorab Pillay ti fer resorti petet akoz pa ti'n *tender*. Ankor sa i montre poudir i mank loportinite pour bann distrik parey kot mwan Roche Caiman pou en sans ganny enn. I ti kapab annan en dimoun ki kapab kalifye pour li kapab kalifye pour li aste. E i perdi en loportinite.

MR SPEAKER

Mersi. Ou le adres en remark lo la. Lo zafer *tender* Minis. Wi in

lev pwen *tender* ki i pe dir ou pa'n tro byen klarifye. Si sa ti'n kapab ganny *tender* akoz son distrik osi kekfwa ti'n kapab annan dimoun ki ti a kontan antre ladan.

MINISTER **BILLY**
RANGASAMY

Mr Speaker sa i en pwen, ki Onorab in partaz ek nou. I en bon pwen, me sa laspe *tender* li menm. Finalman en dimoun ki annan en apresyasyon pou konstriksyon, i pou vwar i pou kout lo bokou pour li fer sa. Akoz Gouvernman in dir nou pa pe fer semen, ti annan en bon grander semen pou konstrir. E pour tou dimoun, bann si mon pe get kad bann portfolyo nou bann zabitan dan diferan distrik.

Par egzanp Roche Caiman, lamazorite i pou lakaz, pa neseserman pou later. Bann pou later i kler ki nou annan bann prodwi apropriye ki nou pe met ater, ki nou santi i ava ideal pour zot.

Sa enn kare later mon kontinyen repet mon lekor, i enn ki ti konplike. I pa sel kare later ki ti konplike ki'n ganny tranzakte dan lepase, i annan plizyer kare later in ganny tranzakte dan pe rod solisyon.

Annou pa zis perdi nou lenerzi ou konnen, mon koz

konmsi mon komans en pe santi nou pe pran tou nou lenerzi nou pe met lo en sityasyon ki, ti'n fini regle zot.

Depi lansyen Gouvernman ti zis *literally pretty much approved*, zis i pa'n ariv sa pwen. Mon'n bezwen pran en desizyon. Mon bezwen travay. Mon anvi vin fer en lot louvraz pour sa pei, mon anvi devlop pour distrik Roche Caiman Onorab.

Mon anvi devlop proze, pou tou zot distrik. Si mon pou al perdi tou mon lenerzi zis pour reponn kestyon lo sa ka, mon *might as well give up* les zot kontinyen. Mon anvi travay mwan. Seryezman mon anvi travay.

(APPLAUSE)

MINISTER **BILLY**
RANGASAMY

Onnetman mon anvi travay e nou Minister i determinen, konmsi mon sagren. Ou konnen tou le swar mon pe dormi mwan minwi, ou konnen poudir mwan koman en endividé mon en sityasyon, mon pe anter mon garson dimoun pe demann mwan kestyon later, lakaz, mon pe pran note.

Sa i nivo ki mwan mon ale pou mwan sey travay pour sa pei. E fransman verite, mon'n

vin pran kouraz e mon pa pou les personn derout mwan dan nenport kote latab.

Mon pe vin travay pour sa pei, e tou lede kote latab mon pran ankouraz zot donn ou sa sipor. E sa Minister pou al devan. Zot menm zot pou vwar rezulta dan detrwa mwan, dan detrwa lannen ki vini devan nou. Mersi bokou Mr Speaker.

(APPLAUSE)

MR SPEAKER

Mersi Minis. Nou'n arriv 10er edmi mon pe termin sa sesyon kestyon la.

(Interruption)

MR SPEAKER

Onorab mon napa letan pour lezot kestyon tou Manm, en kantite Manm lo sa kote ti lev lanmen ansanm.

(Interruption)

MR SPEAKER

Onorab! Onorab! Onorab Loze ou a gard lord silvouple! Mersi mon pe termin sa sesyon kestyon la. Mon pa pe pran okenn kestyon, oubyen okenn lot *point of order*. Mon pe remersye...

HON SEBASTIEN PILLAY

(Off-Mic)

MR SPEAKER

Onorab Pillay les mwan terminen. Si i pa'n donn ou lenformasyon ou pou bezwen aksepte son larepons. Se tou.

(Interruption)

MR SPEAKER

Onorab aret *argue* ek mwan silvouple. Aret *argue* ek mwan. si ou kontinyen, mon pe dir ou. Aret *argue* ek mwan ! Si ou kontinyen, mon pe dir ou aret *argue* ek mwan.

Mersi Minis ek ou delegasyon mon dir ou mersi pour zot partisipasyon. Mersi Manm pour zot repons. Nou a pran poz la e nou a repran Lasamble 11er. Mersi.

(BREAK)

MR SPEAKER

Nou a kontinyen avek nou *Order Paper*. Madanm reporter mon demann ou pou apel Minis, apel Vis-Prezidan Ahmed Afif ek son delegasyon. Bon bonzour e byenveni Vis-Prezidan Ahmed Afif.

E osi dan delegasyon avek Vis-Prezidan Mr David Andre Sekreter Zeneral *Seychelles National Institute for Culture Heritage and the Arts*. Ms

Cecille Kalebi *PS* dan sa Lenstiti e Ms Julienne Barra *Executive Director* dan sa Lenstiti.

Mersi pour zot partisipasyon dan kestyon. Mon ava envit, mon ava envit wi ou annan en pwen en *point of order* Onorab Pillay?

HON SEBASTIEN PILLAY

Mersi Mr Speaker. Mr Speaker mon annan en *matter of privilege* ki mon le *raise*. Mr Speaker mon'n fer li mon devwar pou al regard sa dokiman ki montre sa *stamp duty*. E mon annan sa dokiman, la.

E sa dokiman i montre ki *stamp duty* ki'n ganny peye lo sa later, ki nou ti pe koz lo la, i lo sa pri ki in ganny peye pa lo *market value*. *Ok?* E dokiman i montre sa klerman. Savedir poudir Lasanble pa'n ganny lenformasyon korek, bomaten.

E sa i kler ki in annan en *attempt* pou kasyet serten lenformasyon ek Lasanble Nasyonal, ki Mr Speaker mon krwar i pa normal e i pa byen pou pei.

MR SPEAKER

Ok. Ok stop, stop Onorab. Mwan dan mon re-koleksyon Minis ti donnen sa sif baze, lo valer ki'n ganny vann. Me selman mon memwar i demann

reflesir. Alor mon pou regard *verbatim*, pou gete mannyer Minis in reponn sa kestyon e apre mon a kapab adres ou *matter of privilege*. Mersi.

HON SEBASTIEN PILLAY

Mr Speaker, dokiman i montre poudir ... in ganny peye pa sa ...

MR SPEAKER

Mersi. Mersi Onorab.

HON SEBASTIEN PILLAY

... pa R50mil.

MR SPEAKER

Onorab. Mon'n dir ou ki mannyer mon pou fer. *Ok.* Mersi. Onorab mon ti ava apresye ki ou aret enteronp mwan, letan mon donn en *ruling*.

Mersi. Mersi Vis-Prezidan e delegasyon pou kestyon Onorab Bernard Georges i loter bann kestyon ki devan nou. Onorab.

HON BERNARD GEORGES

Mersi Mr Speaker. Bonzour, Vis-Prezidan, bonzour Sekreter Zeneral, *PS* e madanm Barra. Mr Speaker avan mon demann mon kestyon ek ou permision, mon ti a kontan zis reasir, Manm Lasanble an partikilye *Chief Whip* Lopozisyon ki'n soulev sa pwen bomaten, ki

mon pa'n demann mon kestyon, pou pran okenn priyrite. Mon anvi ki tou dimoun i konn sa.

Annefe sa de kestyon napa okenn irzans e i ti napa okenn lentansyon pour pran zot ozordi. Sof ki dapre sa ki mon konpran, sel akoz sa kestyon i ganny adrese pour Vis-Prezidan. E sel Manm Gouvernman ki pa dan sa rankont ozordi avek bann Anbasader EU se Vis-Prezidan.

Se pour sa rezon ki mon kestyon in ganny sa priyrite. Me i pa ti ni mon lentansyon, e pou annan okenn, pou pran okenn privilez pou pran okenn irzans lo sa kestyon.

Mr Speaker avek sa detrwa mon ti a kontan demann Vis-Prezidan, eski Vis-Prezidan i kapab eksplik Lasanble leta Arsiv Nasyonal ozordi e plan pou reabilitasyon sa lenstitisyon enportan pou listwar nou pei? Mersi.

MR SPEAKER

Mersi Onorab. Vis-Prezidan, ou repons.

THE VICE-PRESIDENT AHMED AFIF

Mersi bokou Mr Speaker. Bonzour Mr Speaker, *Leader Biznes Gouvernman*, *Leader Lopozisyon*, tou Manm

Lasanble, e tou dimoun a lekout.

Mr Speaker Arsiv Nasyonal an se moman pa pe fonksyon a 100 poursan. Depi ki batiman Libreri Nasyonal ti fermen e Arsiv Nasyonal ti bezwen bouz dan detrwa lokasyon anvi mankman lannen prosen.

An se moman lofis Arsiv Nasyonal, i sitye Ile Du Port *Helena Building*. Me i osi annan en brans *Providence, Record Center*. Enn dan sant lavil kot vye Lakour, e 2 storage facilities kot nou kit bann dokiman.

Pour lemoman tou servis i ganny afekte, dan en fason ou en lot, vi ki tou dokiman ki ti dan *repositoire* arsiv, serten i ankor dan bwat. Me par kont staff Arsiv pe fer zot mye pou donn zot mye malgre sa.

An se moman Arsiv Nasyonal, i enn pti sant resers kot *Helena Building*, ki pa kapab pran bokou kliyan anvi mankman lespas. Alors nou pe ankouraz Manm piblik, pour telefonn Arsiv e pas zot demann pou dokiman ki zot pe rode, byen davans. Pour donn nou bann Zofisyen Arsiv, ase letan pou rod sa bann dokiman.

Mr Speaker malgre nou'n komans, *digitalized* nou bann dokiman i bon note ki, lamazorite arsiv i ankor dan

leta fizik. Arsiv Nasyonal pe fer fas avek plizyer defi, *comme mankman resours imen, ek resours finansyel, bann lekipman scanning spesyalize pou akseler sa travay digitalization nou bann dokiman.*

Lo en note pozitiv, se ki bokou bann lorganizasyon lokal pe osi *digitalized* zot bann servis e dokimantasyon. E sa fer ki zot donn nou kopi zot bann dokiman, dan en form ki deza nimerik. E sa i permet nou konsantre plis lo nou bann dokiman, dan larsiv an se moman.

Mankman *training* pour *staff* osi i en lot defi, vi ki lokalman napa en lenstitisyon ki kapab ofer *training* spesyalize dan larsiv. Mr Speaker pli gro defi ki Arsiv Nasyonal pe fer fas avek an se moman, se i napa en lokasyon spesyalize, pour kapab prezerv nou bann dokiman arsiv pour lefitir.

Alors pour reabilitasyon ki nou pe fer, pour sa lenstitisyon? Mr Speaker i en plezir poudir ki dan Bidze lannen prosenn Gouvernman in tret sa sityasyon arsiv koman en priyorte nasyonal.

E pour met finansman neseser pour konstriksyon en batiman avek tou facilite neseser pour ki Sesel, i ava

annan en Arsiv Nasyonal. Sa proze pour ganny antretenir par Lazans pour Lenfrastriktir. En bout later in fini ganny idantifye pour sa proze. Me plis detay pour sa proze i ava ganny donnen e anonse pli tar an mezir ki plan i ganny finalize. Mersi bokou Mr Speaker.

MR SPEAKER

Mersi Vis-Prezidan. Onorab Georges ou siplemanter.

HON BERNARD GEORGES

Yes, mersi Mr Speaker. Mersi Vis-Prezidan pour ou respons. Mr Speaker koman en dimoun ki servi larsiv bokou. E ki resaman mon'n ganny loportinite pour vizit *Helena Building* e koz avek bann staff.

Mon ti a kontan rekonnet, devouman sa bann travayer dan sityasyon parey in ganny dekrir, ki vreman pa normal. Me malgre sa, e malgre ki i lefe e zot travay *Helena Building* Ile Du Port. Me zot bezwen al rod, dokiman Providence, travay double, mon ti a kontan demann Vis-Prezidan, anvi sa sityasyon ki pe kontinyen e anvi sa sityasyon ki'n dekrir, eski i pare pou donn en garanti, ki son Gouvernman pou *speed-up* sa prosesis, refer batiman Arsiv Nasyonal, lo sa *plot* ki'n ganny

idantifye dan en fason pli vit posib.

Pour ki nou selman bann travayer i a kapab travay dan meyer kondisyon, me bann itilizater *archive* i ava kapab kontinyen, itiliz zot dan meyer kondisyon. E ki osi enportan bann dokiman ki sipoze dan *archives*, ava ganny prezerve pou bann zenerasyon fitir. Mersi.

MR SPEAKER

Mersi Onorab Vis-Prezidan.

THE VICE-PRESIDENT **AHMED AFIF**

Mersi bokou Mr Speaker mersi Onorab *LGB*. Mon kapab asir ou, ki Gouvernman i atas en gran lenportans avek Arsiv Nasyonal e parey mon'n dir i annan plizyer lannen ki i pe fer son fonksyon atraver diferan landrwa. E i pa ideal ditou. Me mon kapab donn ou lasirans osi ki nou lentansyon pour sanz sa sityasyon. E met li azour, met li alaoter lekspektasyon dimoun, parey ou menm ou'n mansyonnen.

Dimoun ki anvi servi en larsiv i en lenstitisyon trez enportan pou en pei. Parske i gard ou listwar i gard bokou, bokou keksoz ki bokou dimoun ki pe fer resers sirtou ti ava kontan vvar, konnen.

E nou pou fer tou sa ki nou kapab pour nou fer sa ariv osito posib. E parey mon dir nou annan en Bidze deza ki'n, met de kote pour lannen prosenn. E osito ki plan i ava pare lokasyon finalize, nou ava fer le neseser pou mont sa larsiv. Mersi Onorab.

MR SPEAKER

Mersi Kestyon Onorab Aglae.

HON EGBERT AGLAE

Mersi Mr Speaker. Bonzour Minis ek ou *panel*. Minis premyerman mon ti a kontan petet demann ou, ki zistans ki nou'n arive avek sa prosedir *digitalization*, ki ti komanse en pe letan pase?

En pe lannen pase kot nou ti pe osi ganny sipor, avek serten eksper ki ti pe komans travay kot a kot ek arsiv. Dezyenmman kot i konsern *staff training*, Minis, eski zot annan en plan, anvi ki zot annan plizyer *staff* dan sa departman ki pa zis siport bann endividji ki pe vin rod bann dokiman.

Me osi ed zot avek resers ki enportan. Sirtou kot i konsern bann lepase pei. Eske zot in annan en plan pou kapab kontinyen donn *training* sa bann *staff*? Mersi.

MR SPEAKER

Mersi Onorab. Vis-Prezidan?

**THE VICE-PRESIDENT
AHMED AFIF**

Mersi bokou Mr Speaker vi ki kestyon i al en pe dan bann detay. Kot larsiv ek ou permisyon, mon a demann *PS* Kalebi pou petet donn detay. Mersi. *PS* wi.

**PERMANENT SECRETARY
CECILE KALEBI**

Mersi Mr Speaker. Mersi Onorab, pour sa kestyon. Premye lo zistans nou ete ek *digitalization*. Parey Vis-Prezidan in anonse, nou'n komanse sa prose. Lannen pase nou ti ganny en pe larzan dan nou Bidze, kot nou ti kapab *tender out* avek de lakonpannyen osi, pou ed nou akseler sa prose.

Me parey nou'n fer resorti, nou annan sa mankman bann lekipman spesyalize menm, dan nou arsiv pour nou kapab kontinyelman akseler sa prose. Lenportans se pou kontinyelman akseler sa proses, pou nou kapab *digitalize* nou bann koleksyon.

Akoz arsiv i annan plis ki 400ekek mil dokiman. E parey ou konnen pou nou *digitalize* sa *process* i en keksoz ki pou toultan kontinyel. So avek sipor

bidzeter ki nou pou gannyen, nou a kapab aste kekfwa ankor de trwa bann *book eye scanner* - bann *scanner* spesyalize ki nou bezwen. E la nou kapab osi akseler, sa prose.

Lo kote *staff training* parey ou konnen Onorab lokalman napa en lenstitisyon ki kapab ofer *training* spesyalize pour arsiv. Alor laplipar nou bann *training*, nou bezwen rod atraver nou bann partener e aletranze.

E tou le lannen nou fer en *training plan* pour ki nou *staff* i kapab benefisyé atraver bann tel *training*. Selman avek sa dernyen 2an la, avek bann sityasyon *COVID* sa i pa'n posib. Sa lannen osi nou'n refer sa demann. E nou ava regarde avek zot sipor nou Bidze ki vini byento, pour nou kapab osi anmenn nou bann *staff* lo sa bann *training* spesyalize.

E an menm tan atraver nou bann partenarya ki nou annan ek bann zanmi pei, nou osi fer demann ki bann *staff* i ganny bann *attachment* osi.

Sa i ed zot osi, pou ganny *hands-on training* parey zot dir. E osi pou kontinyen ogmant zot *skill* e kapasite. So tousala i bann zefor, ki nou, nou pe travay lo la an se moman. E nou ekspekte ki lannen prosenn nou ava vwar, en pe sa

bann *training* e *attachment* pe materyalize. Mersi.

MR SPEAKER

Mersi. Wi klarifikasyon Onorab, al vitman.

HON EGBERT AGLAE

Mersi Mr Speaker. Zis pour petet Minis ki la VP. Petet sa lekipman ki zot pe demande, Minis si nou ti kapab en pledwari ki zot ti kapab gannyen, parey SFRSA in kapab ganny laponp ase vitman.

An vi ki ler ou nonm sa *relocation* devlopman, letan zot pe *relocate* bann dokiman ki'n arive dan lepase, pour zot bouz Ile Du Port, i annan serten dokiman ki ganny andomaze.

So nou pa anvi ki keksoz i pli kontinyen ganny andomaze avan zot bouze pour zot nouvo lokasyon, *at least* sa *process* i kapab konplet *at least* 80poursan. Mersi.

MR SPEAKER

Mersi. Vis-Prezidan in note sa pwen, mon pa konnen si oule azout en remark. Wi?

THE VICE-PRESIDENT AHMED AFIF

Non mersi Mr Speaker. Wi mon dakor avek ou nou devret pran tou prekosyon. E fer tou sa ki nou kapab pli vit posib pou

ganny bann lekipman spesyalize. Nou servi tou nou mwayen ki nou annan. Mersi.

MR SPEAKER

Mersi. Kestyon Onorab Pillay.

HON SEBASTIEN PILLAY

Mersi. Mon ti a kontan demann Vis-Prezidan, prenon kont ki sa size Arsiv Nasyonal e osi enkli bann travayer larsiv. E ti annan sa size, konpansasyon pou bann travayer.

Eski Vis-Prezidan i kapab dir Lasanble, ki zistans ki Gouvernman in arive, avek size konpansasyon pou bann travayer larsiv. E si zot annan plan pou rezourd sa size konpansasyon, pandan sa lannen ki la? Mersi Mr Speaker.

MR SPEAKER

Mersi Onorab Vis-Prezidan.

THE VICE-PRESIDENT AHMED AFIF

Mersi bokou Mr Speaker. Onorab, tou bann travayer ki annan en letid ki t in ganny fer *assessment*, en revi pour etablir lekel ki'n ganny afekte. E selon sa rapor tou bann dimoun ki ti'n ganny afekte in ganny peye pou fer zot *settlement* dan en Lagreman.

Me si annan lezot ki pa dan sa rapor, sa se en keksoz ki

nouvo. Mon mazinen Gouvernman i ava etidye, i a *find out* ki kapab fer dan sa bann ka. Me selman pour lemoman, sa se lenformasyon ki mon annan mersi.

MR SPEAKER

Wi Onorab Pillay.

HON SEBASTIEN PILLAY

Mersi pou ou la repons. Eski nou kapab ganny en *commitment* avek bann dimoun ki la devan, ki zot pou fer serten travay, pour etablir lekel bann dimoun ki pa ankor fini ganny peye.

Akoz baz lo sa ki ou pe dir nou vi ki annan en rapor, e i annan en lalis. I paret poudir, i annan dimoun ki pa ankor fini ganny peye. So i enportan ki si zot kapab fer sa travay, e rapport avek Lasanble, lo ki zistans sa size konpansasyon in arive. Parski sa size in en size ki'n monte a plizyer repriz e ou a rapel byen ler ou ti asiz lo sa kote latab dan Lasanble Nasyonal.

E mwan mon ti a kontan fer sir poudir finalman i kapab ganny rezourd. Espesyalman an ki konsern travayer larsiv, mon pa kapab entrodwir lezot travayer akoz kestyon napa sa.

Me i osi annan lezot travayer anba Departman

Kiltir, ki ti ankor pe esper size konpansasyon. Mon pa konnen, si Speaker ou pou *allow* Vis-Prezidan vi ki annan zis de kestyon lo *Order Paper* pou fer en komanter lo sa bann travayer osi. Lefe ki nou annan sa dimoun, ki ansarz Lenstiti Kiltir dan nou Lasanble.

Mon pe demann ou permisyon pou *allow* sa komanter. Si ou pa donn ou permisyon *then* mon *ok* avek. Dimoun deor pe ekoute. Mersi Mr Speaker.

MR SPEAKER

Delegasyon i a, *panel* i a reponn ou premye si zot annan en langazman ki zot kapab donne, dan sa soz. Apre Vis-Prezidan i kapab adres sa dezyenm pwen briyevman. Nou pa pou pas bokou letan lo li, me i kapab adrese.

THE VICE-PRESIDENT AHMED AFIF

Mersi Mr Speaker. Mersi Onorab. Wi definitivman, Gouvernman i konsernen kan dimoun i annan konplent, oubyen dimoun i annan kek problemm ki zot santi, i a la baz ki annan pou fer ek zot travay oubyen ek Gouvernman. Par egzanp kot la nou pe koz, kot Arsiv Nasyonal.

E mon pa'n ganny met okouran tou bann demars ki pe ganny fer. Me selman mon ganny dir poudir i annan demars ki pe ganny fer, vizavi sa bann dimoun pour etablier enn pti pe parey dan premye rapor pou etablier *scope*, pour etablier kwa ki'n arive egzakteman.

E wi mon kapab donn ou lasirans poudir nou pe fer tou evalyasyon neseser. E nou ava swiv bann rekomandasyon ki mete dan sa evalyasyon, avek en sel bi pour nou trouv en solisyon akseptab pour tou dimoun. Mersi.

MR SPEAKER

Mersi lo size Minister Kiltir, Vis-Prezidan. Eski i annan okenn keksoz ki ti kapab azoute. Wi Mr Andre.

<u>SECRETARY</u>	<u>GENERAL</u>
<u>SEYCHELLES</u>	<u>NATIONAL</u>
<u>INSTITUTE FOR CULTURE</u>	
<u>HERITAGE AND THE ARTS</u>	
<u>DAVID ANDRE</u>	

Wi si mon kapab azout en keksoz. Se ki sa size letan, mon'n pran latet Lenstitisyen nouvo Lenstitisyen Kiltir. Size ki n la depi en pe letan, e parey in dir i annan evalyasyon ki'n ganny fer.

I annan serten dimoun ki'n ganny peye zot

konpansasyon e i annan serten lezot, ki ankor si oule pe *assess byen*. Akoz i annan serten ka i ankor kot *Attorney General*, pou vwar sa bann dimoun ki pa ankor ganny peye, si vreman zot merite pour ganny peye, si zot merite ganny peye.

I annan demars ki pe ganny fer legalman *through AG's Office* ki zot pou ganny zot konpansasyon. Bit Lenstiti se pour fer sir ki tou dimoun ki merite ganny konpansasyon i ganny zot konpansasyon. Sa zot kapab dir.

MR SPEAKER

Mersi. Mersi Mr Andre kestyon Onorab Adelaide.

HON FRANCOIS ADELAIDE

Mersi Mr Speaker. Bonzour Mr Speaker. Bonzour tou Manm Onorab. Bonzour Minis avek ou delegasyon, Mr Speaker donn mwan 10segonn pour *remind* Sesel ki ozordi se Lafet Baie Lazare le 4 Oktob. Lafet parwas Baie Lazare. E mwan koman François dan Lasanble, mon le swet zot tou en bonn fet *Saint Francois*. E nou annan en gran lanmes tanto ki zot tou zot monte zot vin, akonpanny nou pour ki n ou vreman reste bann lenstriman lape parey *Saint Francois* ti dir.

(APPLAUSE)

HON FRANCOIS ADELAIDE

Mersi bokou pour sa aklamasyon, dimoun Baie Lazare i vreman apresye. Minis mwan mon kestyon, pour zot i *comme* swivan. Vi ki nou konnen poudir sa bann, petet sa bann dokiman parey zot pe dir. I annan pe ganny ranmase ou pa konnen petet ki i annan petet pe deteryore. E petet la deor Sesel i annan bokou bann dimoun ki annan en arsiv kot zot. Menm petet i kapa en pe - pa pli alaoter - me annan plis lenformasyon, ki dan sa enn nou Arsiv Nasyonal.

Petet eski i annan okenn *incentives*, ouswa i annan okenn fason ki nou kapab fer sa bann Seselwa kontribye, swa atraver enn pti larzan, ouswa enn pti keksoz pour zot kontinyen anbelir nou Larsiv Nasyonal? Mersi.

MR SPEAKER

Mersi. Wi Vis-Prezidan.

THE VICE-PRESIDENT
AHMED AFIF

Mersi Mr Speaker. Mersi Onorab, Onorab mwan konnen poudir i annan bokou Seselwa ki annan bann dokiman, oubyen bann lezot keksoz ki ti ava dan lentere pour bokou

lezot dimoun kapab vvar e sirtou dan en arsiv.

Wi i en keksoz ki en lide ki enteresan. Me avek ou permisyon mon a demann PS Kalebi pour petet donn en pe. Ki fasilité Gouvernman i kapab fer pour dan bann tel sityasyon. Mersi.

MR SPEAKER

Mersi wi PS ou kapab adres sa.

PERMANENT SECRETARY
CECILE KALEBI

Mersi Mr Speaker. Mersi Onorab, pour sa kestyon. Wi Onorab kot arsiv nou annan bokou Seselwa – annefe *even aletranze* ki kontakte nou arsiv e zot pare pour zot parfwa donn nou sa bann dokiman, san ki zot met en kou finansyel avek.

Akoz i enportan pour note ki arsiv i vin koman en *repositoire*. Laplipar letan, parfwa zot donn ou en kopi ki nou gard kot nou e zot, zot gard en kopi. Si okenn keksoz i arive zot garanti ki zot kopi zot dokiman i la. E zot kapab reganny li pli tar.

Alors nou fer serten Lagreman osi pou bann dimoun prive, ki anvi osi depoz zot bann dokiman kot arsiv pour en serten letan. E la nou fer serten Lagreman lo ki mannyer nou

pou servi eksetera. Ki mannyer nou prezerv li.

Me par kont osi nou'n fer demann, lannen prosenn pour nou komans kapab aste detrwa bann dokiman en pe rar, ki kekfwa osi dan nou arsiv nou napa. Parey mon'n dir oparavan, nou kont lo zot sipor ler sa Bidze i vin devan, pour kapab donn nou sa fasilite pour nou kapab enplimant sa bann tel prosedir. Mersi.

MR SPEAKER

Mersi PS. Onorab Gill kestyon *please*.

HON CHURCHILL GILL

Mersi Mr Speaker. Bonzour VP ek delegasyon. Mon kestyon se donnen lenportans, sa bann dokiman, e lakantite zot ki annan, e *speed* ki prosedir *digitalization* pe pran, e lakantite letan pour nou, ki nou pe pran pour en novo bilding, eski zot krwar poudir ler sa novo bilding pou'n pare. Leta ki sa bann dokiman i ete ozordi ek sa bann *process*, eski i garanti ki zot pou ankor *safe* zot tou?

I napa posibilite kekfwa pour nou perdi okenn sa bann dokiman, donnen zot lenportans? Mersi.

MR SPEAKER

Mersi. PS mon vvar Minis in endik ou. *Go ahead.*

PERMANENT CECILE KALEBI

Mersi Mr Speaker. I enportan pour note Onorab osi ki bann *staff Arsiv* pe travay vreman dir;- pe fer zot mye pou asire ki bann dokiman i ganny garde dan en Leta ki limit sa deteryorasyon ki ou pe koz lo la.

E i dan zot manda, pour asire ki nou gard zot dan en pli bon kondisyon ki nou kapab. Nou annan bann bon teknisyen kot Larsiv. E zot parey Onorab Georges in dir, sa bann travayer i kit zot travay a ker. E mon asire ki zot pou fer zot mye, pour limit kantite deteryorasyon ki pou arive dan nou arsiv.

E sa osi i depan parey mon dir lo bann resours ki nou ganny yen. Akoz tou sa bann travay i annan son bann lekipman. Bann materyo adisyonnel, ki nou bezwen pou asire ki sa bann dokiman i reste sen. Mersi.

MR SPEAKER

Mersi. Wi Onorab Gill.

HON CHURCHILL GILL

Mersi PS pou ou larepons. Me selman ou'n fer nou konpran, ki

sa posibilite annan serten poursantaz deteryorasyon i la. Me dan lenstans kot vre i arive, ki nou fer? Oubyen i annan en retonbe en keksoz ki nou kapab fer pou rekiper sa bann ki'n ganny deteryore? Mersi.

MR SPEAKER

Mersi Onorab. PS ou a kontinyen.

PERMANENT SECRETARY CECILE KALEBI

Mersi Mr Speaker. Onorab dan arsiv i annan en prose ki nou bann travayer i fer, sa i vin parey en *triage*, kot nou idantifye bann dokiman ki pli dan en kondisyon, en pe pli vilnerab.

E alors nou komans travay lo zot ase boner. I sa bann premye ki komans ganny *digitalized* pou asire ki parey ou dir si annan okenn det deteryorasyon nou annan en kopi *digital*. So i annan en travay *triage* ki nou fer, ki nou target zot avan. Mersi.

MR SPEAKER

Bon nou a pas lo prosen kestyon. 159 Onorab Georges.

HON BERNARD GEORGES

Mersi Mr Speaker. Mr Speaker prosen kestyon i annan pou fer avek *Presidential Library State*

House. Depi ki mon'n anvoy sa kestyon, avek Madanm Clerk, mon'n ganny nouvel ki permet mwan ozordi demann ou permision pou pa *proceed* avek sa kestyon.

Lenformasyon i la, e etandonnen ki sa lenformasyon i annan pou fer avek Lenstitisyon *State House*, e pli partikilyerman avek Prezidan an legzersis. A sa moman ler dan sa lepok ki nou pe koz lo la 2008-2010, mon prefere avek ou permision ki mon pa demann sa kestyon ozordi pour Vis-Prezidan reponn.

Mon le asire ki mon satisfe avek respons ki mwan mon'n gannyen. Lenformasyon ki mon'n gannyen, e mon ti a prefere parey mon'n dir an vi respe pou lenstitisyon ek Prezidan, an legzersis a lepok, ki se Prezidan ozordi, e kekfwa Prezidan an legzersis an 2008 ki ava fer en deklarasyon. E ki ava enform nou Nasyon lo Leta *Presidential Library*.

Alor Mr Speaker avek ou permision, mon pou *withdrawn* sa kestyon bomaten. Mersi.

MR SPEAKER

Mersi Onorab. Mon pa, premye fwa mon ganny kestyon retire *on the floor*. Me selman mon mazinen, i annord. Madanm

Clerk, Madanm Deputy Clerk. A question may be withdrawn by a Member at any time. Mersi.

Onorab Pillay nou ankor lo sa pwen kwa?

HON SEBASTIEN PILLAY

Mersi Mr Speaker. Nou lo sa pwen prosedir ki pe ganny swiv.

Mon krwar depi bomaten mon'n egzers en kalm monimantal pou mwan kapab fer sir poudir mon demann mon kestyon, e mon pa soulev konfli pou mwan ganny sityasyon kot mon pou bezwen sorti ouswa ganny met deor. Akoz zisteman mon pe demann en kestyon lo lapar Seselwa.

Onorab i annan tou drwa fer sa ki i pe fer, napa naryen ki anpes li. Me selman mon bezwen demann ou lendilzans konmsi, si sa ti en lenformasyon ki Onorab ti'n gannyen, vi ki kestyon i pou tou Manm ler in ariv lo *Order Paper* i pou tou Manm sa kestyon la.

Akoz in pas tes admisibilite i lo nou *Order Paper* nou ti'n devret ganny enformen poudir Onorab in ganny son lenformasyon e i pe *withdraw* son kestyon. Sa i premye pwen.

Prezan mon dezyenm pwen Mr Speaker. Bomaten ou'n- Atraver presedans en privilez ki'n ganny etablir dan Lasanble Nasyonal, e sa ti

ganny etablir sirtou pandan letan ki Prezidan Ramkalawan ti *Leader Lopozisyon*, koman *Leader Lopozisyon* i ti toulstan demann son bann kestyon siplemanter apre ki tou Manm in fini demann zot kestyon.

I en privilez ki'n ganny akord li pandan tou sa lannen ki in *Leader Lopozisyon* dan Lasanble Nasyonal e sirtou dan Sizyem Lasanble.

Bomaten ou'n fer mwan fer diferaman. Ou konnen ki mon bezwen demann ou Mr Speaker, en kestyon tre senp. E mwan mon konnen ki kantmenm ou pou met mwan kot miray ou pou sey trangle mwan atraver prosedir mon pou kontinyen *fight back* pou mon demann kestyon pou dimoun. Me selman mon ti a kontan demann ou, eski nou kapab atraver ou ganny en fonksyonnman Lasanble ki pli *fair* e ki pli ekitab pou tou Manm?

E ki menm konpromi menm en dirzans ki ganny avanse avek serten Manm i ganny avanse ek tou Manm dan sa Lasanble.

MR SPEAKER

Mersi Onorab.

HON SEBASTIEN PILLAY

Bomaten mon annan Manm ki'n lev lanmen pa'n ganny sans demann kestyon ditou kantmenm zot in lev lanmen avan.

MR SPEAKER

Wi. Mersi Onorab. Ou pwen i -

HON SEBASTIEN PILLAY

Mon met sa bann pwen devan ou Mr Speaker.

MR SPEAKER

Mon pe koze silvouple. Ou pwen- ou premye pwen i konsern kestyon Onorab Georges.

Parey mon'n lir dan sa *Standing Orders* i kapab *withdrawn* son kestyon *anytime*. So *anytime means any time before it has been put to the floor*. Lo ou dezyenm pwen i napa rapor avek sa biznes ki nou la, la ou'n fer sa pwen avan. Mon zize ki mon direksyon Lasanble i *faire ekitab pour tou Manm*. Mersi.

Mersi Vis-Prezidan e ou delegasyon pou zot partisipasyon mon a envit zot en bon depar e bon kontinyasyon dan zot travay. Mersi.

(THE VICE-PRESIDENT AND HIS DELEGATION WAS EXCUSED FROM THE HOUSE)

MR SPEAKER

Mon pa konnen si bann manm i okouran si zot in ganny enformen par bann *Leaders Caucus*, nou dan en sityasyon ki nou'n ti'n prevwar depandan *Assembly Business Committee* ki apre kestyon nou pou bezwen prosed avek Mosyon. Akoz nou pa ti ankor pare pou *Bill* ki nou ti'n met pou demen.

Alor nou a prosede avek Mosyon ki lo *Order Paper* e mon a demann en Manm pou entrodwir Mosyon pou nou sanz Lord Biznes pou pran Mosyon la avan *Bill*. Onorab Georges.

HON BERNARD GEORGES

Mersi Mr Speaker, Mr Speaker anba *order 97(1)* mon pe *move* pou ganny ou permision pou nou sispann *Order 25(2)* pou permet nou pran en Mosyon avan ki nou termin en *Bill* ki lo nou *Order Paper*. Mersi.

MR SPEAKER

Mersi. Mon a ganny segonnman silvouple? Onorab Arissol. Sandy.

HON SANDY ARISSOL

Mersi Mr Speaker. Mon segonn Mosyon propoze par Onorab Georges. Mersi.

MR SPEAKER

Mersi. Manm a vot lo sa Mosyon silvouple. Sa ki aprouve lev lanmen. Mersi. Manm ki kont. Lo Mosyon anba *Standing Order* 97(1) pou *suspend Order* 25(2) pou nou kapab pran Mosyon avan nou terminen avek *Bill* - 20 Manm in vot pour, 0 kont e 8 in *abstain*. Donk Lasanble in aprouv sa e nou kapab prosede avek sa Mosyon.

Mosyon i dan non Onorab Waven William. Onorab mon pou demann ou pou zou zis prezant ou Mosyon e nou a segonde e apre ou ava kapab adrese silvouple. Onorab.

HON WAVEN WILLIAM

Mersi Mr Speaker. Mosyon i lir *comme swivan*;

Sa Lasanble i demann Gouvernman ek Labank Santral, pou fer en letid lo bann difikilte ki antreprenier i fer fas avek pou fasilit akse pou en kredi kot Labank Developman Sesel. Mersi.

MR SPEAKER

Mersi. Mon a ganny segonnman pou sa Mosyon silvouple. Onorab Labrosse ki'n lev lanmen.

HON RICHARD LABROSSE

Bonzour Mr Speaker. Bonzour tou Manm preznan. Tou dimoun ki a lekout. Mr Speaker mon

segonn sa Mosyon anmennen par Onorab William.

MR SPEAKER

Mersi. Onorab William ou a kapab adres ou Mosyon.

HON WAVEN WILLIAM

Mr Speaker, mon sezi sa loportinite pou remersi Bondye pou son surveyans, gidans, e benediksyon lo Sesel e Nasyon Seselwa.

Mr Speaker tou loner ek laglwar i pou li e pour li tousel. Mon osi sezi sa lokazyon pou felisit tou Seselwa ki pe kontribye pozitivman dan Sesel e aletranze. Mr Speaker mon osi salye tou Seselwa ki dan biznes swa koman en endividé tousel, e ouswa dan en lakonpannyen.

Mr Speaker i pa fasil pou en mazorite dimoun la deor dan sekter prive ki pe *struggle*, pou zot biznes sirviv dan sa moman difisil e enserten ki lemonn pe pas atraver enkli Sesel.

Mr Speaker rezondet sa Mosyon se ki dan sa transformasyon ki pei pe pas atraver sa novo lapros ki Gouvernman in pran, bann lord ki pe sey mete dan plizyer nivo e sekter Gouvernman an rekonesan ki sekter prive i moter lekonomi, Gouvernman pou bezwen fasilit sekter prive koman fasilitater.

Gouvernman pou bezwen kre e mentenir en lanvironnman apropriye pour ki sa masin i ganny bennzin, eskize non, e delwil pou li devlope e kre larises dan pei, enkli lanplwa.

Ki sa *rating Ease of doing business* par Seselwa i amelyore. Annan osi en ladministrasyon ki sa enn tou lede ladministrasyon zot rekonnet ki laspe finansyel dan laform kredi labank i kritik, pou soutenir ankouraz sekter prive grandi e devlope.

Gouvernman atraver differan Lakor ek devlopman, i met a dispozisyon endividé dan sekter prive e piblik, pou ganny akse ek kredi. Mr Speaker par egzanp i annan bann tel *Scheme* anba labank devlopman Sesel sa se pou lagrikiltir, lapes, fabrikasyon, tourizm, lenerzi renouvlab, lenvestisman dan lenfrastriktir, teknolozi lenformasyon ek komunikasyon, transportasyon, lendistri kreativite, aktivite lwazir e lezot servis.

Mr Speaker sa i detrwa bann *Scheme* ki anba Labank Devlopman Sesel. Mr Speaker se sa bann *Scheme Finansyel* ki pe ganny ofer par Labank Devlopman Sesel, pou bann dimoun ki anvi antre dan biznes. *DBS* ki annan 44an

legzistans e in asiste 8825 kliyan e en kour R3bilyon atraver diferan sekter, pou sa kantite letan ki egziste Mr Speaker.

Mr Speaker sa bann lenformasyon in fer referans dan en dokiman en rapor en *corporate* dan Labank Devlopman Sesel ki'n ganny fer sorti. Sa bann sif i ganny enterprete *comme* swivan;

Setadir par an *DBS* i dil ek anviron 200 proze, kestyon se dan sa 200 proze konbyen aplikan ki'n fer laplikasyon, konbyen ki'n reisir e konbyen ki'n fail.

Mr Speaker sif osi baze lo lenformasyon sa Lakor i endike anba sa differan *Scheme* dan anviron 11 *Scheme* setadir 200 ka par an diviz par 11 i donn ou 18 case dan sak sa bann differan *Scheme*, ki dapre sif i annan anviron R6.1milyon *Scheme* par an Mr Speaker.

I donn anviron R68milyon par an. *DBS* pa donn detay lo ki groser sa bann biznes akoz i annan en lenformasyon ki mon'n sey fer fason pou gannyen mon pa'n reisir. Mr Speaker moto *DBS* se pou "Partener dan Devlopman." Pou donn lasistans finansyel affordab pou lenvestisman soutenab e dan diversifikasyon

e dan novo sekter dan lekonomi.

Bann valer sa lenstitisyon banker se fer kliyan e son bezwen pa *focus* servis banker pou devlop relasyon soutenab e prodiktiv. Anliny ek novo aktivite lanvironnman aktivite ekonomik, ek bi pou zwenn bezwen kliyan, me reste konpetitiv dan marse lokal.

Mr Speaker gran lobzektif Nasional DBS se pou siport lekonomi Sesel. Pou apiy tandans gran devlopman Sesel par donn sipor finansyel bann differan proze relevan sa plan e promosyon lefikasite, konponan endistriyel Sesel parmi lezot.

Mr Speaker en rol Lenstitisyon Parlamanter, se regarde ki fason e ki mannyer nou kapab ede atraver idantifye problem;- met devan Gouvernman atraver rezolisyón Mosyon pou evalye e kot i merite parey dan ka demann pou fer sa letid lo difikilte, ki aplikan Seselwa pe rankontre dan prosesis ganny en *loan* administre sa *loan* e ki petet son proze atan.

Mr Speaker an pasan menm si Mosyon pe koz lo letid, lo *DBS*, me ki bann lezot labank osi dan sa evalyasyon e letid i ganny osi enkli pou bann lezot *loan* pou aste propriete

rekonstrir lakaz i osi ganny fer Mr Speaker.

Akoz dan sa bann lezot sekter osi Seselwa pe rankontre serten difikilte. Akoz laba osi kliyan i osi vwar ki prosedir e legzizans labank i tro for. Sa ki pa gou se ki move kliyan e bon kliyan, i ganny mete dan en menm sak tretman Mr Speaker e sa i *unfair*. Kestyon se ki si mon en bon kliyan ki pran plizyer *loan* repey tou a ler e san aryeraz omwen konsider mon ka si mon en bon kliyan.

Mr Speaker labank koman en biznes wi, i bezwen protez son lentere pou asire ki i re anmas son larzan e lentere ki i ganny enpoze lo sa kliyan, ki li kontan pa kontan i bezwen aksepte Mr Speaker. Labank i rod garanter, i pran *mortgage* lo en propriete e fer ou pran en lasistans, pou ankor asire ki naryen pa vin en baryer pou anpes li rekiper son larzan.

Parey koze i dir labank i *ringfence* son lentere pou sekiriz serten degré e garanti ki i anmas son larzan. Mr Speaker sa aplikan bon ouswa pa bon i *at the mercy of the bank*. Tou pouvwar e Lotorite i baskil dan lentere labank Mr Speaker.

Sa ki pa gou ditou e i pa en *fair deal* dan sa tranzaksyon, se ki ler sa *loan* finalman i ganny aprouve dan lespri sa

kliyan i trouv li ek en det ki'n ganny amplife e ogmante ek prosedir e kriter i kout tel parey prosesis aktivite pou *mortgage* anrezistreman. Finalman sa *loan* ki ou pou rann i ganny kontrole par labank.

Ki dapre li pou asire ki kliyan i servi sa larzan pou sa proze selman. Ki i byen Mr Speaker dapre serten pou kliyan pa al pronmnen *Dubai* ouswa diverti kontan. Pou bann kliyan ki senser, ki serye zot pe dir mon pe pran en *loan*, mon pa'n demann en *Grant* ouswa fer en demann gratwit Mr Speaker.

Si mon pou re peye, akoz ki mon en bon kliyan mon bezwen sibir tou sa bann latitud dominer e sa tandans si ou pa kontan kite ale? Mr Speaker me ler ou napa swa, ou bezwen kapab kontinyen avek sa prosesis akoz ou bezwen.

Gouvernman koman fasilitater i bezwen regarde ki fason i larg lanmen Seselwa an term fason fer. Sa ek bi pou ankouraz partisipasyon, motiv lantreprenarya, fasilit prosedir akse ek resours finansyel.

Mr Speaker prosesis pou akse kredi i merit ganny revwar san ki labank pa sekiriz repeyman son *loan*. Seselwa napa problem ek sa. Problem se k en pratik en pwa de mezir

pe ganny pratique dan sa prosesis, ki bezwen ganny revwar. Letan kliyan i krwar in fini ek prosedir, ou ganny met retar akoz lezot demann ki labank in anvi kliyan i prodwir.

Mr Speaker dimoun pe ganny fer ale vini akoz pa donn kliyan en *checklist* byen boner kwa ki i bezwen pou li soumet avek labank avan ler ki *loan* i ganny aprouve.

Ki kliyan e konnen ki i a fer sir ki letan i vin kot labank tou son bann lenformasyon akoz i ava annan en *checklist* ki in pas lo la pou li fer sir ki ler i vini tou lenformasyon posib in ganny met devan. Me pa ozordi dir li ki *a,b,c e d* i manke. Ou dir li anmenn *a,b,c,d* i anmennen, epi demen ou dir li anmenn *e,f,g*, Mr Speaker sa i pa normal. Alor Mosyon pe demande ki sa bann keksoz i ganny revwar.

Mr Speaker i annan plizer konplent par endividé ki pe akse ouswa anvi akse sa bann *Scheme Finansyel* ouswa *loan*. Par egzanp prosedir formalite i tro ankonbre.

Lenpresyon vann sa bann prodwir lo medya ek realite ki pe ganny pratique ler ou al devan Mr Speaker i totalman diferan avek sa ki ganny *advocate*.

I mank en *checklist* inisyalman pou evit ale/vini

pou donn lenformasyon. I mank differan tretman anver kliyan i serser e serye. Depans personnel ogmante pou satisfer kriter pou ganny sa kredi, labank i tro dominer e mank konpasyon. Seselwa pe ganny *rip-off* Mr Speaker, serten dimoun pe dir.

Mr Speaker sa Mosyon pa merit ganny vwar koman en fason negativ ver kraz *staff*, ouswa bann lenstitisyon banker. Sa Mosyon pe demande ki lenzistis i ganny korize e ki ankor plis *fairness* i ganny konsidere Mr Speaker dan sa dil.

O kontrer akoz nou valoriz travay sa bann lenstitisyon ki lentansyon se pou li pou fer pli byen anver satisfaksyon son kliyantel e sanzman dan fason fer e travay ki ganny fer avek sa kliyan.

Mr Speaker atraver sa Mosyon, mon pe fer sa bann rekomandasyon swivan;

1) Ki lenstitisyon banker i pa met tou kliyan dan e sel sak. Sa ki pey en ouswa sa ki pa pey byen pou onor bann langazman, bon kliyan i ekspekte en differan tretman.

2) Ki en stil *one-stop shop* i ankor ganny revwar ki prosesis pran desizyon pa tarde.

3) Ki otan posib sa bann lenformasyon ouswa dokiman neseser o premye lye i ganny donnen, ouswa vin koman en checklist kler, pou evite annan sa ale vini part bann kliyan.

4) Ki apard ki labank asir repeyman e proze konplete i reste azour ek realite ek difikilte ek sa kliyan, pour ki i osi donn lespas kliyan pou ganny son larzan pa zis dapre kondisyon labank, me osi sa kliyan anver sa kliyan ki serye.

5) Ki lentere osi i ganny revwar pou pran kont e fer zistik e *fairness* lo la kantite larzan an plis, ki labank pou anmase an plis lo ledo sa malere.

Mr Speaker sizenmman ki labank dan sekiriz son lentere e *mortgage* propriete, ki annan en fleksibilite lo sonm ki propriete i vo. Mr Speaker parfwa ou war ki ou pran a *loan* me ou propriete ki'n ganny *mortgage* i vo plis ki sa *loan* ki ou'n pran. Alors mon santi poudir i devret annan serten konsiderasyon.

Mr Speaker setyenmman ki Gouvernman i osi revwar Lalwa ki govern bann lenstitisyon lasirans, ki si dan 5an, 10an, 15an ouswa 25an ki kliyan pe pey lasirans anyel, ki letan kliyan i fini pey son *loan* ki serten porsyon i ganny rann

kliyan, ki okenn lensidan pa'n ariv avek son proze Mr Speaker.

Ouswa ki serten porsyon i ganny re pey pou son *loan*, akoz Mr Speaker letan ou regarde i pa en *fair deal* ditou sa zafer lasirans. Akoz koze deor la se ki Seselwa i vwar ki konmsi i pe ganny vole dan gran kler Mr Speaker.

Mr Speaker ki *FPAC* ki Komite Finans Lasanble, i fer en swivi lo demann sa Mosyon Mr Speaker e ki zot demann pouvwar sa bann diferan *MOU* ki'n ganny sinyen par bann *line ministry* avek labank, ki gouvern sa bann diferan *Scheme* Mr Speaker.

Mr Speaker Mosyon pe demann Gouvernman pou inisyé sa letid ek Labank Santral, par lefe ki se Gouvernman ki pli gran *share holder* dan *DBS*. Gouvernman i annan li 60poursan *share*. 4 lezot aksyonner zot form parti 39.5poursan.

Setadir pouvwar i ek Gouvernman. Mr Speaker la mon pa konnen si enternman dan labank en sistem banker i annan bann lezot keksoz ki anpese ki Gouvernman avek son 60poursan, i pran bann desizyon mazer.

Me solman Mr Speaker letan ou regarde avek sa 60poursan nou santi poudir

Gouvernman koman fasilitater i devret kapab fer serten keksoz, pou soulaz en parti pe bann prosedir e bann lefe atraver bann *loan* ki bann antreprenor ouswa Seselwa i pran avek bann labank.

Mon osi demande ki sa bann *MOUs* ki'n ganny sinyen pou sa bann *Scheme*, i ganny anvoye kot Lasanble pou konn konteni pou vwar si serten kriter dan sa bann *MOUs* pa kapab ganny sanze Mr Speaker. Ki lenstitisyon banker i osi pran en pti pe an konesans sa laspe *corporate social responsibility*.

Mr Speaker avek sa 2 mo, mon'n etablir rezondet, mon pa anvi monopoliz deba e koz lo tou bann pwen. Mon asire poudir ki tou bann Manm Elekte, ouswa bann Manm dan Lasanble zot okouran sa bann problemm.

Alors mon ekspekte en deba an resit e mon anvi tou Manm pou vreman, vwar lesansyel par deryer sa Mosyon. Ki anfen kont nou ava kapab lenfliyans Gouvernman atraver rezolisyon pou kapab revwar ankor sa bann prosesis ki gouvern aplikasyon pou en *loan* dan Sesel. Mersi.

MR SPEAKER

Mersi Onorab. Eski mon annan lot Manm ki pou entervenir.

Segonder Mosyon ou pou adres sa Mosyon? Onorab Labrosse.

HON RICHARD LABROSSE

Mersi Mr Speaker. Ankor enn fwa bonzour tou dimoun a tous ki pe ekoute. Mr Speaker Mosyon devan nou ozordi pe demann Gouvernman pou fer en letid lo bann difikilte ki antreprenier pe fer fas avek, pou zot fasilit akse avek kredi kot Labank Devlopman.

Selman avan ler nou al lo tousala Mr Speaker, mon ti a zis kontan koz en pe lo Labank Devlopman li menm.

Labank Devlopman parey loter Mosyon in fer resorti i ti ganny kree an 1977. Sa ti vin atraver en partenarya avek Gouvernman ek bann sekter prive sa letan. E parey ankor in fer sorti bomaten ki an se moman Labank Devlopman Gouvernman i annan li 60 bout dan *share* ladan e sa dan li menm li i fer li vin sa dimoun ki pe kontrol plis *share* dan sa labank li menm.

E ler Mosyon pe al lo sa laliny ozordi kot i pe demann nou pou fer en letid lo difikilte ki antreprenier pe fer fas avek. Mwan mon ti a kontan Mr Speaker kekfwa pou ouver li en pe plis pou nou osi get e pe bann keksoz ki bann

lenfrastriktir ki annan ozordi pou biznes dan Sesel.

An se moman dan Sesel ler nou pe gete Labank Devlopman i sa moter limero enn ki pe, ki nou kapab dir ki bann business i pli familye avek i pli friendly avek ki zot al tap laport vitman lo la. Se le senp rezon ki mon mazinen se ki son to lentere li menm pou zot rann sa *loan* parey ek bann lezot Labank Komersyal i en pri pe pis soulaze.

E ler mwan menm mon'n al rod en pe resers li menm lo Labank Devlopman Mr Speaker mon'n kapab konstate osi ki dan tou sa bann difikilte ki bann lenstitisyon finansyel pe fer fas avek ozordi, se ki Labank Devlopman li menm li in seye pou li lager en pe dan sa bann *struggle* ki pe arive dan lemonn ozordi lo kote biznes.

Sirtou ler nou pe koz finansman, apre ki lemonn antye in ganny sibir avek sa maladi *COVID-19*. Si mon pou al return ankor lo Labank Devlopman menm li menm Mr Speaker, mon pou kapab dir ki lenformasyon ki mwan mon annan avek mwan, se ki mon vwar ki depi le 31 Desanm 2015 ziska le 31 Desanm 2021, ler nou pe koz lannen pase lo kote sekter ki mon pe gete ki zot in asiste en pti pe plis.

Sa se dan sekter lagrikiltir li menm li en devlopman ki mon krwar dan Sesel an se moman i demann bokou. Nou kapab dir ki 159 aplikan ti ganny asiste zis pou 2021. E sa dan li menm li in fer ki Labank Devlopman i annan li en *outstanding* 42milyon ankor lo la.

E sa in swiv Mr Speaker par dan sekter lapes kot li osi laba i annan en *Scheme* ki apel *Development Fund Scheme*. Kot la ankor enn fwa 2021, 33 aplikan ti ganny asiste.

E lot *loan* ankor ki en pri pe popiler laba ki bann pti biznes i kontan soutenir lo la i sa *SBFA Scheme* ki'n transfer kot Labank Devlopman. E la li i annan 108 aplikan li menm li ki'n depi lannen pase in ganny asiste. E sa i fer ankor ki i annan ankor larzan ankor 17milyon.

E apre osi zot in fer en *COVID Relief Scheme* kot la ankor lannen pase 28 aplikan ankor ti ganny aprouve lo la. E lot biznes, lot prodwi ankor ki bann biznesmenn i kontan al rode ankor i *Small Business Support Fund Scheme*. E la li i annan 190 aplikan.

E sa bann sif li menm dan li menm Mr Speaker, i montre ki i annan en pe travay ki pe ganny fer. Me selman nou santi ki kekfwa i merite annan en pe

plis travay kekfwa lot kote osi, lo kote ledikasyon osi ler nou pe koz nou bann pti antreprenier pou zot apres bann Lenstitisyon Finansyel.

Ki mon pe sey dir par sa? Mon santi ki parfwa bann dimoun ki pe al dan biznes zot mank e pti pe sa parey nou dir sa *market research*. Ki nou'n war dan Sesel, sa i en fe ki tou dimoun mon krwar i war, se ki parfwa i annan bann dimoun osi zot pe plizoumwen zot pa pe fer sa *market research*. Zot pe kekfwa swa zot in war en dimoun dan en domenn swa zot pe vwar li pe *succeed* ladan zot osi zot antre ladan.

Me dan zot menm zot, zot pa konnen ki sa dimoun ki'n antre ladan ki bann devlopman ki in fer, ki bann resers ki li in fer pou li menm li antre al dan sa laliny. E la mon kapab dir kekfwa Lenstiti Guy Morel ozordi mon krwar i annan en lot non si mon pa tronpe, kekfwa zot osi mon konnen dan lepase ti annan bann kour ki ti ganny organize kot la bann dimoun ti kapab vin aprann diferan metod.

E mon konnen Mr Peter Rosalie ti fer sa tre byen Mr Speaker, kot i ti ankadre bann dimoun ki ti annan sa lentere pou antre dan biznes ansanm kot zot ti devlop bann serten

kour ansanm e la sa kour ti ale pou 2an. E apre sa, sa ti vin osi en bagaz en sertifika dan lanmen sa bann dimoun ler ti pe apros lensitisyon pou vwar poudir *at least* zot annan en keksoz zot konnen lo ki laliny zot pe al ladan.

E ler nou pou retourn ankor ler nou pe demann osi Gouvernman Mr Speaker, pou refer en letid osi ankor enn fwa mon reouver ankor. Mon pou relans en lapel osi kot parey non dir oparavan kot nou al en pti pe plis lo sa laliny edikasyonnel osi, akoz par ler osi ler en dimoun in apros en lensitisyon osi, ler i vin rod en facilite apre i war li dan diferan problemm.

La kot parfwa i annan bann dimoun ki zot in rod en *guarantor*, kot parfwa bann *guarantor* zot fer sa avek en bonn volonte kot zot osi zot vwar zot dan bann sityasyon par ler, kot i annan dimoun ki - bann sityasyon ki nou bezwen ariv Ankour par ler pou nou ganny en solisyon.

So ankor enn fwa la mon santi ki ledikasyon i enportan. E apre osi fodre ler nou pe ante dan en biznes osi fodre nou'n fer sir nou'n konn byen nou *market research*, pou nou pa vwar nou dan bann sityasyon kot parle dan biznes osi nou

bezwen annan en plan ler nou santi nou pa pe al lo *succeed*.

E Mr Speaker sa ti 2 mo ki mon ti a kontan dir lo sa Mosyon. E mon pou aport mon sipor. Mersi.

MR SPEAKER

Mersi Onorab. Onorab Egbert Aglae, ou entervansyon.

HON EGBERT AGLAE

Mersi Mr Speaker. Bonzour tou dimoun a lekout. Mr Speaker Mosyon ki devan nou prezante i fer referans avek akse, fasilit akse avek kredi pou bann pti antreprenier. I bon note tou Mr Speaker sa i enn bann defi ki i pa fek prezant son lekor.

Me selman i enn bann defi ki'n touzour la e nou ladministrasyon oparavan in sey rod bann diferan mekanizm ki mannyer i a kapab adrese sirtou pou annan antreprenier ki fek komanse, e osi bann osi ki pas dan serten difikilte fas avek bann sok ekonomik;- par egzanp reform ekonomik 2008.

La nou'n pas dan bann letan pandemik *COVID-19*, ki'n fer ki bokou bann biznes in war zot dan bann detres finansyel e zot rod tou fason pou zot reste a laflot, pou zot kapab sirviv. E enn bann fason se pou kapab annan bann enseksyon kapital dan zot biznes pou zot kapab pa

fermen, retenir travayer e kontiny en loperasyon.

E sa i en keksoz ki i serye akoz mon rankontre bokou bann pti lantreprenarya, antreprenyer ki pe sey lite, pe sey kit sa sirtou sa sekter prive a laflot pou zot a kapab anmenn sa servis ki pei i bezwen.

Now Mr Speaker, sa bann lantreprenarya ouswa sa bann kategori ki bezwen dan sipor, byensir zot bezwen al ver bann lenstitisyon finansyel akoz se zot ki mandate pou kapab donn akse ek kredi.

E dan Mosyon li menm li pe koz lo fer en letid, atraver Gouvernman ek Labank Santral. E mwan pour mwan Mr Speaker mon pa pe war a sa pwen la pou nou kapab petet pou fer sa letid, akoz pou bokou letan sa bann lenformasyon, sa bann leokri i deza la li. *Ok?*

E sel keksoz se ki pou demande, se ki pou annan en zorey ki pou ganny ekoute zot pou kapab fasilit sa prosedir. E la ki pou anmenn mwan, mon pou koz en pti gin lo zerans ouswa lobzektif *DBS*. E *DBS* dan lepase in transform en pti gin li.

E Gouvernman in war nesesite pou anmenn li lo en kad avek bann Labank Komersyal, pou li kapab anmenn en loperasyon parey

bann lezot lenstitisyon finansyel.

Sel keksoz ki li i pa kapab fer se pou li kapab pran larzan avek ou anmase parey bann lezot lenstitisyon finansyel i fer, kot i kapab *raise* apre donn bann endividé prete parey bann lezot Labank Komersyal i fer. Sa i zis en distenksyon.

E *DBS* li menm li, i swiv bann menm Polisi, bann menm kad regilasyon ki ganny etablir par nou sistem finansyel, sa i atraver Labank Santral ki li i regilater, pou li kapab kontiny son loperasyon lo en kad legal.

E nou'n war dan lepase la fason ki *DBS* i *operate* lo sa menm nivo ki'n ganny set, in kre serten - mon kapab dir - pa neseserman de-balansman me selman sa in pri in anpaye dan serten prosedir akoz en labank, en lenstitisyon finansyel son lobzektif li se pour fer larzan, pret larzan e redwir maksimonm risk pou li fer pert avek sa larzan ki i annan e ed son kliyan osi pou pa fer pert, dan nenport ki moman.

E se la problem ki ozordi *DBS* pou li pret ou larzan pou ou enzekte dan ou biznes ouswa pou komanse, i annan bann bokou *layers of checks and balances* - mon kapab dir bann birokiasi ki egziste - ki

parfwa i kre bann legzizans ki pa *meet* sa kriter premyerman.

E dezyenmman ou kapab pa reisir, ouswa ou menm ou avek sa bann legzizans ki ou ganny demande, ou *give up* akoz ou pou napa serten sa bann demann ki pe ganny *set requirements*.

Sirtou avek sa bann kolateral ki ou pou bezwen pe met a dispozisyon pou garanti sa lagreman kredi ki ou pe demande. E se sa mon konpran lespri par deryer kot Gouvernman ti bezwen antre, kre bann *sub institution* ki kapab pret larzan avek mwens birokrali, pou kapab donn bann endividé en pti pe pli fasil pou zot kapab ganny akse.

Menm si i annan petet apre pou koze pou dir fason fer petet in ouver laport pou labi, mwan mon pa pe al dan sa *polemics* la ozordi. Me selman mon anvi etablir poudir i ti annan son merit pou annan, kre bann pti lenstitusyon bann *sub institution*, ki kapab pli fasilité san swiv sa gran lalis *checklist* ki ou pou bezwen avek bann labank ki pe ganny reglemente par CBS, Labank Santral baze lo zot Polisi ek régulation akoz si ou pa swiv koman en lenstitusyon, byensir ou pou annan ou bann penalise ki pou vin avek.

So pou mwan Mr Speaker mon krwar ki nou, nou regard en pe sa lansonm finansyel ki egziste ozordi dan pei e regard son realite. E ler mon pou dir la realite Mr Speaker, mon pou sit en legzanp, byen kler;- Seselwa ordiner ki anvi komans en biznes i war li dan bokou difikilte, akoz serten legzizans ki ou pou bezwen e i tou depan ki sekter ki ou pe al antre ladan, ouswa ki deza ladan.

Premyerman ou annan ou bann, si petet ou dir ou pe al antre dan en *manufacturing industry* ou pou bezwen annan en bout later, mon pou bezwen annan en *building*. E mon pou bezwen al rod lekipman e osi rod travayer pou mon kapab komans mon loperasyon.

Me si ou napa premyerman akse ek son kare later, la premyerman ou pa pou kapab komans en biznes. E pou ou kapab ganny en kare later swa ou pou bezwen al aste en an prive. E si ou gannyen i depans ki ou'n deza fer koman kapital apre pou mont en bilding lo la pou ou ne lot depans ankor, apre pou ou kapab met lekipman tousala Mr Speaker i vin avek en bann *step* ki bezwen larzan. E sa larzan ki ou, ou napa ou.

Now ou apres en lenstitusyon parey DBS ou dir

mon anvi koman sa biznes dan *manufacturing* petet en legzanp, e la premyerman si ou pou al aste en later ou pou bezwen swa ou pou bezwen koman ek en *loan* pou met sa later, angaz premyerman. E *by then* son kou ki i vin avek ou pou bezwen war ou pe al pran en dezyenm *loan* pou ou kapab mont en biling li la. E si ou napa lekipman re negosye ankor.

So ou vvar poudir lo komansman li menm i annan bann defi e ki nou pe *set* petet serten kondisyon anba sa bann kalite demann parey kot ou kapab dir ek en kliyan ouswa en Seselwa byensir vwala ou anvi al dan tel domenn, vwala *package* ki nou kapab met devan ou depi komansman *step 1, step 2, step 3*.

Be selman i pa touzour fasil pou kapab fer sa arive. Me ki nou war ozordi Mr Speaker, bokou i perdi lespwar dan sa rev ki zot, zot ti annan pou zot kapab soutenir sa biznes, akoz difikilte ek fasilit kredi. Me dan en lot kote ou pou annan ou bann ki'n byen etablir ki zot pour zot en telefonn ouswa anvoy en pti *email* deswit larzan i ganny mete a zot laporte, pou zot ganny sa plizyer milyon ki zot bezwen.

Ki fer ki ou pou annan ou 2 distenksyon la, si mwan

koman en endividé ki fek komanse, mon pa pou ganny regarde dan sa fason ki ou pe regard sa non ki li in byen etablir, par son non, son non biznes ki fer ki ozordi bokou nou bann pti endividé ki pe debout ki pe komanse pa pou *make it*. E tou kou sa ki annan ki pou kontinyen.

So nou war bann legzanp Mr Speaker en biznes ozordi i kapab si i pe fer byen i pou agrandi, i pou kontinyen agrandi i pou aste propriete isi, propriete laba avek sa menm larzan, dan sa menm lenstitisyon ki sa enn ptipti li i pe demande ki li i pa gannyen me sa lot i gannyen.

So lala i deza annan en problem la. I annan en gro problem la. Mon konsyan poudir i annan bann endividé ki'n vin demann pret larzan kredi, ki pa'n onor zot langazman. Me selman pa tou ki parey, pa tou ki pe mazin fer parey. Sa nou bezwen konpran byen dan sa distenksyon ki nou pe koz lo la.

En lot *alternatives* Mr Speaker se, eski Gouvernman li menm li pa pe mazin vvar dan sa klima ki nou ladan, dan sa lenstiti finansyel ki annan, petet konsider entrodwir serten bann nouvo *Scheme* avek bann plis *stringent measures*, ki pou

anpeste ki i ava annan labi. E ki i ava annan swivi.

Akoz parfwa bann keksoz ki serten i *fail* se, sa sipor ek sa swivi ki pa'n ganny fer e ler in arriv lo dernyen-r-er kort zis labank li i konn zis get lo son liv, lo son sistem, i war poudir tann kantite mwan ou pa'n pey li, e li i pa konsernen ki'n arrive avek ou li. I pa konsernen ki dan ou loperasyon ou'n annan serten defi, ouswa in annan serten pwen mazer lekonomi ki pe anpes mwan kapab bouze, li i pa konsernen ek sa li.

So i bann refleksyon ki bezwen ganny fer, pou vwar lakoz bann retonbe ki arrive avek bann pti lantreprenarya. Lot keksoz Mr Speaker dan laliny *Scheme* mon krwar ki enportan se osi konpran en pti gin marse pe demande isi dan pei.

E souvandfwa nou war bokou nou, nou tay ver menm keksoz ki ou war mon frer ou war mon ser i fer petet li *I'm succeed* e li osi i anvi al fer parey ki apre *in the end* 2an, 3an, 4an *down the line* nou annan tro bokou lenvestisman dan sa menm kalite sekter ouswa demann, ki fer ki i kre en satirasyon finansyel e la ou war poudir keksoz pa bouze pou serten. So sa i enn bann defi ki

i vin avek ledikasyon mon krwar selman i enportan.

E lot pwen Mr Speaker se ki ler en dimoun en endividé i prezant en son proze pou son biznes. Mon krwar tou lenstitisyon i rod tou fason, ouswa i merit rod tou fason pou gid kliyan lo *the best approach* pou li kapab komanse, e ki bann laliny aveni ki i kapab eksplwate pou li kapab arriv ver sa merit ki li i santi i krwar dan son rev son biznes.

E mon santi poudir sa i annan en pe *lacking* ki pa pe arrive. Se souvandfwa ou vini, mon prezant ou mon proze pou mon biznes ki mon pe komanse, mon kapab *succeed* pou mwan ganny akse finansyel e apre zis i *down the line* nou war poudir i annan bann lezot konponan ki devret antase e se la kot i pou pri la li.

Sa bann konponan pou li atase i pou demann li ankor serten enzeksyon kapital, parey mon ti dir o komansman e war poudir la i bite. Ouswa i bezwen taye al rod en partner. Partner pa serye ou se si al tap e lot laport, ouswa demann prete, ki petet kondisyon ki ganny set parey Labank *DBS* i donn ou bann *grace period*, kot laba li i pa a kapab ganny sa li. E la kot i vin bann presyon.

So i annan bann diferan eleman ki si nou dir nou pou fer letid, nou bezwen eksplwat tou sa bann kalite keksoz ki atase avek devlopman avek bann pti lantreprenarya bann pti biznes.

So avek sa Mr Speaker mwan mon krwar poudir Mosyon i annan son merit, akoz tou resaman i annan sa dimoun i ansarz sa labank lo nivo Lafrik in koze poudir Sesel in byen avanse pe fer byen. Me nou pa kapab koz zis lo sifras. Wi lemonn i war be nou pe fer byen, lekonomi pe avanse.

Me nou bezwen get anba, get en kou anba ki mannyer bann pti tranzaksyon prosedir pe ganny fer, pou kapab lev bann ki kapab anvi leve, anvi debourye, anvi komans son prop pti biznes e si i annan bann ki pe tonbe ki laport i ouver pou zot ki kapab reserse.

So pou konklir Mr Speaker mon anvi tous sa dernyen pwen. I annan bann lantreprenarya ki i in pran *loan* petet i an defo e ozordi sistem nou annan sa sistem *CIS* an plas, sa *credit rating system* ki an plas. Ki fer ki i deza an defo koman en lakonpannyen. Malgre i anvi sorti kot i ete, fas a serten sityasyon ekonomik ki'n pas atraver e ki relye avek klima global, ouswa klima ki nou fer fas avek, i pa war ki

kapab ganny akse avek sa kredi akoz i ganny *discredited* baze lo sa *CIS Credit Information System* ki egziste.

So eski la osi nou pa kapab parey nou'n fer ek later, annan en pe konpasyon pou sa bann dimoun sa bann biznes ki dan sa kategori, i fer sa bann *assessment finansyel*, pou vwar si reelman mon pou pret ou sa larzan ankor ou pou kapab *survive*, pou ou kapab retourn lo en semen re pey ou kredi e retourn lo en semen profi osi.

Sa i bann letid ki mon krwar ki enportan e i bezwen ganny fer lo ban baz endividyle, ouswa akonpanny pou vwar eski san ki nou zis pini zot kot lenstitisyon finansyel i dir ou drwa mwan mon pa pe donn ou ziska ler ou pey mwan. Be i napa pou pey ou, *either* ti pou bezwen fermen al anploye pou li kapab zis re pey ou a ki i dwa.

Eski nou, sa i model ki nou anvi adapte? Ouswa nou sanz sa model nou vin model en pti pe pli konpreansiv konpasyon, konpran, adres sityasyon parey i ete e donn li en lot louvertir.

So sa i bann refleksyon ki nou bezwen fer koman en pri lekonomi ki mank lekonomi dan sekter prive pou nou kapab kontinyen reste lo en semen

prosperite. Avek sa Mr Speaker mon pou dir ou mersi.

MR SPEAKER

Mersi Onorab. Mon asire bann Manm i reste okouran e mon apel zot pandan ki nou annan en legzersis pandan *lunch break* lo sekirite, ki pou enkli reget bann mezir sekirite prosedir evakyasyon.

Alor mon a profite mon a pran poz la pou nou rezwenn, i demen sa? *Ok eskiz mwan.* Mon'n tronpe eskiz mwan, mon'n tronpe i demen sa? *Donk me toudmenm mon krwar nou a pran poz la e nou a repran travay 2er.* Mersi.

(BREAK)

MR SPEAKER

Zis en pti mo leksplikasyon pou nou piblik. Nou retar i akoz bann Manm in ganny tenir dan travay Komite ki'n la pli long ki previ. Nou a kontinyen avek Onorab Desheila Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker. Bonn apre midi tou koleg Onorab. E bonn apre midi tou dimoun a lekout.

Mr Speaker Mosyon prezante par Onorab William i en Mosyon ki pou tous bokou dimoun an zeneral dan Sesel.

Akoz ozordi staz ki nou pe pas ladan bokou dimoun i annan bann bon proze e zot anvi bouze. Me bokou lenstans zot pa kapab, senpleman akoz zot pri atraver bann serten prosedir ki labank i met an plas.

Mr Speaker Mosyon i lo DBS, me permet mon koz en pe lo fasilite kredi an zeneral. Mr Speaker ozordi laplipar biznes dan Sesel i ganny soutenir e zot menn komanse atraver en fasilite kredi, ouswa parey tou dimoun i apel li en *loan*.

Sa ki'n sanse in fer li, me atraver bokou difikilte pou arive met tou zot dokiman ansanm poi fer ki zot kalifye pou en *loan*. E malgre difikilte ozordi bokou biznes *person*, mon pe *mean* bann zom ek fanm ki zot tou zot dan biznes pe rezouir zot lapenn ek rezulta zot travay dir pou re pey zot *loan* e osi arive gard laport zot biznes ouver.

Mr Speaker mon pa pe dir ki bann labank pa'n ed bann dimoun ki'n vin devan pou en *loan*. Bokou dimoun in benefisyé atraver en *loan*, swa avek Labank Developman li menm ki Mosyon i santre lo la, ouswa atraver lezot labank. Me akoz ozordi nou pe koz lo sa Mosyon, akoz bokou bann *business person* ozordi i war li difisil pou arive konplet zot tranzaksyon, akoz pli ale

aplikasyon pou en *loan* - sirtou *business loan* - i vin pli difisil e bokou konplike.

Mr Speaker mon konnen ki mon a pe dir ki mon pe koz lo al, akoz pandan letan ki mwan mon ti pe travay dan labank bokou kliyan in apros mwan pou demann led. Swa ed li ranpli don form, ki mannyer pou asiste li avek son bann dokiman, ouswa en senp *advice* pou li arive fer en bon desizyon.

Mr Speaker sa ki vreman tousan se ler en kliyan i dir ou mon pe vin *apply* en *loan*, me labank pe demann mwan en kontribisyon. Ler nou pran kont bann depans ki en *business person* i oblize fer e komans avek tel ki;- annan serten *landlord* ki demann *deposit* 3 a 6 mwan lo son *building* e ankor en mwan davans lo son lokasyon depans pou *setup* sa landrwa dapre kalite natir sa biznes, met bann meb neseser.

Letazer e osi vitrin, pey koneksyon elektrik, delo ek lezot fasilité. Alor parfwa zot demande eski sa bann tel depans pa kapab ganny konsidere koman en kontribisyon lo li menm? Eski labank i pare pou konsider sa bann tel depans deza?

Mr Speaker ozordi ankor depandan lo kantite *loan* ki labank pe rekomande ki sa

kliyan i pey en lasirans lo sa *loan* ki pe ganny *apply*. E byensir i depan lo sonm ki sa *loan* pe ganny *apply* e ki sonm sa lasirans pe sarz li.

Lot sityasyon pli difisil se *guarantor*. Annan i demann enn, annan i demann de depandan lo groser *loan* ki ou pe pran. Ouswa mem *mortgage* lo later depandan lo sonm ankor. Tou sa bann rekomandasyon kot bann labank in vin obligatwar e in antre dan Lalwa laplikasyon *loan*.

Pou ban rezon kree par nou bann move zanfan nou menm, parey nou kontan dir. Akoz letan zot in ganny zot *loan* parmi annan serten zot, zot komans byen peye e apre zis zot deside aret peye. Mr Speaker ozordi si nou bezwen *apply* en *loan*, nou pou bezwen fer fas avek en nenport sa bann rekomandasyon sekirite kontan ou pa kontan.

Mwan ankor rapel dan lannen 1987 an montan letan mon ti travay avek *Barclays Bank*, kot pou ganny en *loan* ti ase fasil ti annan serten sonm ziska R100mil kot pa ti bezwen *collateral* oubyen okenn sekirite. *Mortgage* lo later ti ganny rekomande si sa kliyan ti a pe aste en morso later a en

sonm vreman o, oubyen *pledge* lo en transpor.

Me ki ti arive, bokou dimoun pa ti kontinyen onor son Lagreman e zot ti zis aret re pey zot *loan* kot apre 7an dan sa lepok *Barclays Bank* pa ti anmenn personn Ankour. Me *loan* ti ganny klasifye anba *bad debt*. Alor bokou zot in fer sa bann malonnet, zot in menm dan zot lespri ki sa pou kontinyen e pou zot kapab kontinyen fer li dan nenport labank.

Mr Speaker ler mon ti komans travay kot *Seychelles Credit Union* i ti osi preski lo menm lareg. Akoz ozordi nou pe war ki i obligatwar pou aplik sa bann tel rekemandasyon sekirite? Larepons i senp akoz bann aksyon malonnet ki serten dimoun zot blyie ki ler zot fer sa bann keksoz mal zot ferm laport zot frer ek ser, ki en zour zot osi zot pou bezwen bann tel servis parey.

Mr Speaker i enportan ki nou realize ki i annan biznes *person* ki vreman serye e senser. E atraver zot senserite, zot in ede pou kree bokou lanplwa. Ler nou koz *ease of doing business*, aplikasyon pou en *business loan* pa pe vin sitan fasil. Formalite i gran. E i annan serten dimoun ki

senpleman perdi pasyans e zot kit dan semen.

Sa Mosyon ki devan nou pe demande ki Gouvernman ansanm avek Labank Santral, i fer en letid lo bann difikilte ki antreprenier pe fer fas avek pou fasilite akse pou en kredi *loan* kot Labank Devlopman Sesel.

Mr Speaker Mosyon i tous spesifikman Labank Devlopman Sesel. Akoz plis bann *business person*, zot santi zot annan plis sans ganny en *loan* avek sa labank akoz an premye son non i dir tou. E osi i ti sa labank ki ti ganny konsidere pou siport devlopman dan pei.

Mr Speaker mon mazin Labank Devlopman Sesel tre byen ki ti sitye dan en batiman deryer vye Lakour, ki pli tar ti ganny servi koman *Court C Victoria*. Ozordi i en batiman abandonnen. Mon rapel sa labank byen menm akoz mon manman i ti enn parmi sa 8 premye travayer ki ti komans travay dan sa pti labank e mon ti temwanny son kouvertir an Fevriye 1978.

Mr Speaker Labank Devlopman Sesel, in siport bokou dimoun atraver *loan* pou biznes tel ki;- lagrikiltir, lapes elevaz zannimo. E pandan ki sa bann kliyan ti pe re pey zot *loan* tre byen, sa ti permet *DBS* bouz

dan lezot diferan kalite *loan* ankor tel ki bann dimoun i ti oule mont miray, fer lakaz domestik, *guesthouse*, taksi, bis, *pickup*, e bokou ankor.

Mr Speaker nou ava aksepte ki bokou, e bokou dimoun in ganny *loan* avek Labank Developman Sesel. Kot menm i annan ki'n ganny sans repran ankor en *loan* adisyonnal, menm si zot pa ti ankor fini pey sa enn premye. Me malerezman sa ki'n azir malonnet pa'n respekte zot kondisyon pou repey zot *loan* in fer ki ozordi nou pe war li difisil pou ganny akse avek en *loan*. Pa zis dan Labank Developman Sesel me dan lezot labank osi.

Mannyer sityasyon ti pe ale ti fer ki bann labank dan Sesel ti oblize bouz dan en lot direksyon e etablier bann novo fason fer, pou annan sekirite lo bann *loan* ki piblik ti a pe vin *apply*. Ozordi nou pe demande atraver sa Mosyon pou fer li vin pli fasil, pou donn sipor bann pti biznes *person* pou zot kapab debourye atraver en kredi.

E parey mon'n dir pli boner sa i ava osi ede kre lanplwa pou nou bann frer ek ser kontribye dan lekonomi nou pei. E an menm tan ogmant reveni pou sa bann labank zot menm ki zot ava kontinyen ede

Lepep Seselwa ki bezwen en *loan*.

Mr speaker mon sipor anver sa Mosyon, i pa avek le bi ki Labank Developman i devret donn *loan* nenport ki aplikan ki zis vini pou vin *apply* en *loan*. Labank i devret annan son Lalwa, son bann regilasyon e i devret annan sa garanti dan ki fason i pou arive rekiper son larzan dan okenn evantyalite, kot sa aplikan pa pe respekte son Lagreman.

Byensir tou labank i bezwen annan son bann kondisyon. Me parey loter Mosyon in dir i enportan ki Labank Developman Sesel i transform dan en fason anmenn bokou priyrite, pou bann pti *business person* ki vreman serye e ki pe vin tap zot laport pou ed zot debout lo zot de lipye.

Mr Speaker mwan mon pou donn mon sipor sa Mosyon, pour ki en tel transformasyon e facilite i arive pou siport nou bann frer ek ser. Mersi.

MR SPEAKER

Mersi Onorab. Mon ava apel preznan Onorab Norbert Loizeau.

HON NORBERT LOIZEAU

Mersi Mr Speaker. Bonzour tou Manm, tou dimoun a lekout. Mr

Speaker mon'n ekout prezantater Mosyon ek lezot Manm.

Mon war i annan merit dan son Mosyon. Me selman i enportan parfwa pou nou konnen kwa ki'n kre sa sityasyon ozordi kot serten aplikan i war li difisil pou zot kapab akse ek *loan* kot DBS. E la Mr Speaker mwan lo mon lentervansyon, mon pou tous en pti pe an zeneral lo bann lezot Labank Komersyal.

Mr Speaker sa sityasyon in arive senpleman ki akoz serten nou Seselwa nou bezwen *être* fran, nou pa'n serye, nou pa'n serye ditou. E atraver ki nou pa'n serye in fer ki aprezan lezot dimoun i sibir le konsekans ki zot pa'n serye, atraver Mr Speaker bann mezir ki bann labank pe mete.

Ozordi Mr Speaker pa zis DBS dan bann lezot Labank Komersyal, sa bann prosedir ki'n mete pou ou kapab ganny en *loan* Mr Speaker i telman fatigan mon kapab dir. Me selman Mr Speaker zot, zot in fer sa pou zot pa rankontre problemm avek zot kliyan petet dapre leksperyans ki zot in pase.

Ozordi Mr Speaker apre ki ou'n fer tou sa ki zot in dir ou fer, ler in ariv ler pou ou vin pran sa *loan* Mr Speaker pa ni

demann ou pran sa *loan*. Enn; en legzanp Mr Speaker ozordi kot labank komersyal si meton pou al fer en lakaz, ou napa larzan ou pe demande zis avan ou ganny sa *loan* pou ou fer ou kapab ou bezwen depans ou environ plis, environ R300mil

Mr Speaker.

Ou napa ou pe rode, selman atraver bann prosedir lasirans, pres R140mil, ou bezwen pey isi laba, rod QS pou fer ou soz ava ou ganny sa *loan*, plan lakaz plan. Mr Speaker ou depans ou en ta larzan e ou ki napa larzan ou, ou sipoze pe vin rod lesanz prete, a lafen ou bezwen rod larzan pou ou kapab mete pou ou kapab ganny sa larzan prete.

E sa i fer ki dimoun parfwa ler in ariv pou zot pran sa *loan* apre tou sa bann demars zot in fer, zot degoute. Ozordi en senp dimoun Mr Speaker, en senp dimoun en dimoun par egzanp i a rod prete en R20mil i napa ou dir li met 20poursan i bezwen annan R2000. I napa ou dir li met R2000 be kot i pou ganny R2000, i pou al vole pou li mete?

I napa i pe vin rod *loan* ou donn li, ou fasilit li. E Mr Speaker sa i fer bokou dimoun ankoler e dekouraze. E DBS par kont Mr Speaker DBS parfwa mon konpran DBS pozisyon ki i

ete. *DBS* in anmas en fardo li. *DBS* in anmas en fardo lepase mon kapab dir. Mon pa pe akiz personn, me selman se sa ki mon pe panse.

DBS ozordi tou sa bann *loan* pti biznes ki ti donn tousala in refoul lo li akoz *loan* pa'n kapab ganny re peye. Rezon se ki oparavan Gouvernman presedan Mr Speaker in les tou Seselwa krwar ki tou Seselwa i kapab vin *businessmen* se sa ki'n arive dan Sesel.

Tou Seselwa in ganny dir zot tou zot kapab vin *businessmen*, *seed capital* in donnen *left right and center* Mr Speaker. Konbyen ki'n fer biznes? Mr Speaker mwan mon konn dimoun ki'n ganny *seed capital* R25mil akoz son dalon ti anvi fer biznes, akoz in ganny dir tou Seselwa i kapab vin *businessmen* ozordi i pa'n fer en sou biznes. Selman *seed capital* in donnen.

La i fer mwan Mr Speaker mazin *Yes Scheme* ler mon pe koz sa fardo ki *DBS* in anmase. Ozordi *DBS* pe travay pou li rekiper larzan ki'n ganny donnen depi 1996 an montan ler *Yes Scheme* ti ganny entrodwir, ler zot ti dir ki tou Seselwa i kapab vin biznes. I annan ki'n pran 50mil, 18mil, i an in pran 4fwa 50mil, zanmen

in peye. E ozordi *DBS*, tousala in transfer kot *DBS*.

Mwan mon ti pran 50mil Mr Speaker, mwan mon ti peye. I annan in pran pa'n peye e tou sa fardo in vin lo *DBS*. I fer mon mazin *SBFA* Mr Speaker *SBFA* Mr Speaker ki Onorab Andre ti vin avek en skandal apre ou apel, kot larzan ti ganny donnen san kapab rekouver kot i ete.

E tousala ozordi in tonm lo *DBS*, e alors *DBS* lo Mr Speaker i bezwen rod en fason pou rekiper sa bann larzan. E se la rezon ki petet *DBS* li i santi ki i bezwen aranz son sistenm donn *loan*, akoz anba sa bann pti Lantrepriz *Yes Scheme*, *SBFA*, ti tro fasil pou ou ganny sa larzan, kot apre ou bezwen tay deryer dimoun pou li kapab peye.

Be, en ta dimoun Mr Speaker ki'n pran larzan pou fer sa bann pti biznes mazorite in *fail*. Selman par kont Mr Speaker i annan ki'n serye. Mon konn en ta ki'n serye Mr Speaker. Akoz zot in responsab zot in responsab dan keksoz ki zot anvi fer, zot in annan en plan pou zot fer. E i annan zot fanmir in asiste zot avek sa pti bout ki zot in pran pou zot kapab fer zot biznes.

I annan bann ki'n komanse Mr Speaker a lafen dizour parey plizyer nou in dir,

se *guarantor* ki'n pran defet. Ozordi i annan dimoun ki'n *guarantor* pou serten zanmi, pou seren lezot dimoun, ozordi se zot ki pe pey le konsekans. I annan sa bann dimoun zot en senp travayer dan en landrwa. Ozordi zot, zot pa kapab ganny akse ek en *loan* akoz zot pe anmenn fardo zot kanmarad Mr Speaker.

Mon mon'n dimoun ki anvi pran en *loan* pou fer lakaz, ozordi pa kapab akoz in ed son dalon e son dalon ozordi in kit li dan salte e li, e labank li labank pa enterese li labank i vin kot sa *guarantor*.

Me souvandfwa Mr Speaker i annan serten dimoun i ganny difikilte labank ek *DBS*, senpleman akoz parfwa kan i annan en problem zot pran li a la lezer. Zot pa pas kot labank pou al gete ki problem, menm si labank parfwa i ekrir zot, zot pa vini pran li alalezer.

E ler labank i sezi zot transpor, i sezi zot keksoz se la ki zot, zot vin devan. Mon souvandfwa i annan en bon pe dimoun Mr Speaker i vini ou konnen la mon ganny sezi mon zafer - soz. Ler ou *call* Labank Devlopman li i akont ou en zistwar, me ler ou *call* kot Labank Devlopman ou tann sa zistwar ki lo kote ki Labank

Devlopman i akont ou Mr Speaker, ou a reste sezi.

En ler ou krwar labank ki problem me parfwa sa dimoun ki problem. I pa'n kominike, i pa'n pran li serye, e aprezan ler labank i pran ka avek zot ankoler. Mr Speaker mwan mon menm mon'n deza pran *loan* ek Labank Devlopman mwan, pou mwan aste en pe lekipman refrizerasyon pou mon al travay.

E mon ti peye e mon rapel ti annan en fiy, Ms Talma i ti ed mwan. E sak fwa mon ti ganny en pti difikilte ki mon peyman pa pe ratre Mr Speaker, mon pa ti asize a lekar laba mwan.

Mon ti vini, mon ti vini Ms Talma ou konnen la mon annan en pti problem mon peyman ki mon'n travay ki mon pti *invoice* in avoye pa pe antre konmela. Me selman ler mon vini mon a kouver sa. Be zot ti konpran, zot ti konpran e mon ti fini.

E ozordi Mr Speaker mwan mon Labank Komersyal nenport ki ler mon oule en *loan* mon ganny akse avek. Akoz Mr Speaker, akoz mon onor mon komitman.

Sa problem ek nou Seselwa nou bezwen onor nou komitman. Responsabilite i enportan, nou pa kapab antre dan en lagreman apre selman nou pa onore. Apre ler nou

tonm dan problem nou kriy lasasen. Tousala i annan la deor.

Selman Mr Speaker mon pa pe dir keksoz pe al sitan roz kot Labank Devlopman i annan problem. Me selman li osi parey mo pe dir problem parfwa i avek nou, nou sa Seselwa. E ou bezwen sanz sa.

Me selman Mr Speaker parey mon'n dir an terminan akse avek *loan* pa zis avek tou bann lezot labank, i pa fasil, i pa fasil akoz i annan serten bann kondisyon kot pe ganny mete ki a lafen i kout ou pou ou kapab ganny sa *loan*. Avan ou ganny sa *loan* i kout ou en larzan.

E i annan en pake demars ki ou bezwen al fer e parfwa mon konpran petet mon kapab konpran bann labank. Zot pe fer sa akoz zot pa anvi sa move leksperyans ki zot in pase avek serten kliyan ki an serye. Alors zot pa anvi pas ankor ladan e alors sanmenm sa petet ki zot pe met sa bann lobligasyon,

Me prezan Mr Speaker dan tousala mwan mon anvi dir ek Seselwa, nou bezwen fran dan Sesel, nou bezwen pran nou responsabilite. Si nou anvi fer keksoz nou anvi bouze, nou anvi ki nou labank i ed nou, nou bezwen lir byen bann kondisyon.

Parfwa labank i vini i donn nou en papye ki annan tou sa bann kondisyon zis nou sinyen. Nou bezwen lir si nou pa pe konpran nou anmenn en dimoun ki kapab konpran pou eksplik nou, lala kondisyon ki pe mete devan nou.

Bokou nou Mr Speaker mwan mon'n zwenn dimoun ki ler i anmenn en dokiman mon'n fir li be ou okouran in dir ou sa.

Mon dir be lala in ekrir sa, e apre ou sipoze fer sa e si ou pa fer sa, sa ki pou arive. I annan bokou nou pa pe war sa prezan ler zot santi zot dan difikilte nou kriye.

Alors Mr Speaker parey mon'n dir mon koz en pe an zeneral, mon konnen ki pa tou ki parfe kot Labank Devlopman, malgre mwan ler mon ti ganny asiste mon ti sorti byen, sa i mwan me petet i annan ki pe ganny difikilte lezot difikilte ki mwan mon pa pe konnen.

Alors an siportan Mosyon anmennen par Onorab William, mon pou repet ankor en keksoz nou bezwen pran nou responsabilite. Ler nou antre dan en dil avek okenn Labank Komersyal swa *DBS*, oubyen lezot Labank Komersyal. Mersi Mr Speaker pou akord mwan sa pti gin letan.

MR SPEAKER

Mersi Onorab. Mon aprezan apel Onorab Wavel Woodcock.

HON WAVEL WOODCOCK

Mersi Mr Speaker. Mr Speaker Mosyon ki devan nou i enn ki tre kler. Parey i pe dir Mosyon pe demann Gouvernman pou fer en letid lo bann difikilte ki bann antreprenier in fer fas avek, pou zot kapab ganny akse avek kredi, avek *loan* sirtou kot Labank *DBS*,

Si sa Mosyon in ariv devan nou Lasanble ozordi, i kler poudir i annan serten konsern dan piblik. E annefe Mr Speaker parey entervenan avan mwan in dir osi bann entervenan avan mwan in dir apard ki Onorab Loizeau. I annan sa konsern osi kot bann labank prive, bann Labank Komersyal kot i difisil.

I en defi ozordi pou bann diferan biznes bann pti antreprenier mwayen, pou zot ganny akse avek kredi, avek *loan*, ennler menm pou *startup* zot pti biznes ouswa pou zot ganny sa kapital pou zot enzekte dan zot biznes pou zot biznes progrese.

Ouswa enn er pou fer envestisman dan *RND* ouswa pou zot ganny sa parey mon'n dir sa *cash flow* pou zot kapab *move*, bouz zot biznes *to the next level*.

Mr Speaker en keksoz i kler ki nou Gouvernman pe met bokou lanfaz dan ede pou fasilit akse avek finansman pou bann pri biznes, bann pti e mwayen biznes, par lefe ki me ler ou pou get dan nou Bidze 2022, ou pou war bann facilite ki Gouvernman in met an plas.

Annefe sa i pa zis lo kote larzan pou donn *loan*, me i osi i annan bann facilite parey bann *seed capital* ki i malere pou nou dir ki i ti'n arete pou en bon pe letan, *well* pou 2 rezon. Annefe pandan letan *COVID* sityasyon ekonomik ki pei ti fer fas avek.

Me osi par lefe ki dan lepase kot i konsern *seed capital*, in annan bokou labi ki Onorab Loizeau in elabor en pe lo la dan lepase kot i malere sirtou ler bann eleksyon ti pe aprose, kot en sel kou i dir ou i annan *seed capital* i ouver, serten larzan i ganny donneen - bann *Grants*.

Me apre ou pa zanmen war okenn *startup*, napa okenn biznes ki komanse e i napa bon swivi pou regarde si vre sa bann larzan ki'n ganny donneen koman *Grant*, pe ganny servi pou komans en biznes.

Mon pa dir poudir napa benn dimoun akoz mon konn detrwa dan lepase ki mon'n ede mon ankouraze, pou al rod sa larzan pou *apply* pou ganny sa

larzan i annan enn ou de dimoun. I annan detrwa bann dimoun ki'n serye ki zot in servi sa larzan byen.

Me annefe i annan bann ka osi kot bann i annan en bann ki ganny larzan zis in diverti kontan monte desann *Dubai*, fer *shopping*, sa ki'n aste loto marsaye ladan. Me zot pa'n servi sa larzan dan en fason apropriye, dan en fason ki pou benefisy'e zot e pou ed zot pou zot devlop ouswa pou zot *startup* zot biznes.

Si in annan enn bann labi e ozordi nou Gouvernman in *reinstate* parey mon dir sa *seed* kapital, sa bann *Grants* ki *in fact* la mon konnen aktyelman la i annan en serten sonm larzan ki pe ganny donnen - si mon pa tronpe dan en R4.8milyon environ en 200ekek ki donn *up to* 200, R200mil pou bann sirtou bann biznes ki annan pou fer avek *tourism*, *lagrikiltir* avek *fisheries*.

I annan plizyer bann diferan *Grants* ki ennler i adres devlopman plizyer bann sekter, e sa lokasyon la ki annan la aktyelman la ki pe ganny donn en i pa aktyelman target plizoumwen *tourism*, *agriculture* and *fisheries*.

E si ou pou get dan Bidze 2022 osi ou pou war a *blue bond* *DBS* en sonm

R30.3milyon e i osi enkli en *bond* lavaler R150milyon ki Gouvernman in garanti pou *DBS* pou donn *loan* sa bann sekter bann sekter.

Bann sekter kle parey nou pe dir dan transformasyon nou lekonomi, pou relans lekonomi pou ed bann pti biznes kapab ganny akse avek finansman, parey mon'n dir pou zot envestir dan zot biznes e osi pou zot *startup* zot bann biznes.

Sirtou Mr Speaker pou bann biznes ki inovativ e osi parey mon'n dir pou anmenn-pou bann antreprenier kapab anmenn zot biznes pli devan.

Mr Speaker me parey Onorab Desheila in al en pti pe an detay lo la, bann *challenges* ki bokou bann antreprenier pe fer fas avek, se ozordi se bann kriter ouswa bann sekirite, bann kondisyon ki labank i demande pou ganny *loan*, sa i enkli i aplik pou Labank Komersyal me osi *DBS*.

I annan bann kondisyon, i annan bann sekirite ki an plas ki fer li parfwa vreman difisil pou plizyer dimoun ganny akse avek *loan*. Zisteman mwan dan lespas i annan bann dimoun ki'n vin kot mwan bann pti antreprenier, e menm bann dimoun ki annan zot biznes i en mwayen.

Zot in vin kot mwan e zot in met devan mwan bann defi kot zot pe fer fas avek, e sa i enkli en defi. Parey mon konnen *DBS* aktyelman i pe demann bann *guarantors*. E ozordi la mazorite bann labank komersyal pe demann en *guarantor*.

E menm *DBS* zisteman i annan en imsyé pa bokou letan in apros mwan, i dan bann biznes *craft* i fer bann diferan size. Bann meb ki vann avek bann letablisman touristik, sirtou bann letablisman touristik - i ti pe eksplik mwan defi ki in fer fas avek ler in al rod *loan* in ganny difikilte, akoz labank in demann li pour li i dir fodre ou annan ou 2 *guarantor*.

E sa i en *challenge* konmela ozordi e in dir mwan mon nou kapab ganny en *guarantor* me selman in difisil pou mwan ganny de e akoz sa mon pa pe ganny sa *loan*. E ozordi dan sa *era* ki nou pe viv ladan, bokou bann *labank* enternasyonal pe *move away from* sa zafer *guarantor*.

E dan lepase nou tou nou konnen ki'n arrive dan lepase ki fer li difisil ki bokou dimoun ozordi pa oule garanti en lot dimoun, se akoz parfwa dan lepase kot sa di moman garanti en lot dimoun ki'n pran *loan* ler sa dimoun pa re pey sa *loan* i sa

guarantor, sa dimoun in garanti sa lot dimoun li ki bezwen *end-up* re pey *loan* sa dimoun ki'n pran *loan* ki pa'n re pey son *loan*.

E sa ki i fer ki ozordi bokou dimoun ozordi pa oule garanti en lot dimoun, akoz i pa anvi anmas sa defet akoz i konn plizyer lezot dimoun ki'n pas ladan dan lepase. Ki fer alors sa i *qualify* plizyer dimoun pou ganny en *loan*, akoz zot pe war li difisil pou zot ganny en dimoun pou garanti zot. E sa i en keksoz ki nou bezwen gete.

E ozordi i fasil pou en labank *anyway* si ou annan ou en kont avek en labank, sa labank i war larzan ki pe antre lo ou kont i war ou *cash flow* kapital ki ou annan. E ou pou e definitivman kapab *ascertain* poudir sa dimoun i pou kapab re pey son *loan*, par lefe ki otour le mwam, tou le de semenn i annan serten larzan ki pe antre lo son kont ki i pou definitivman kapab re pey son *loan*.

Akoz ki ou bezwen demann en dimoun pou rod en *guarantor* kan ou labank ou war kot sa dimoun, ou pou war bann tranzaksyon ki pe deroule lo sa kont, ou war bann larzan ki pe antre pe sorti lo sa kont, e ou war poudir sa dimoun i kapab re pey son *loan*, yet ou pe

fer li difisil pou sa dimoun ou pe dir li ar fodre ou *still* al rod 2 *guarantor*, 2 dimoun pou garanti ou.

Sa i enn bann defi bann *challenge* ki bokou dimoun ozordi ater pe fer fas avek, ki pe fer li difisil pou zot kapab ganny en *loan*. E ki anmenn mon ver en lot size ankor dan lepase ki'n arrive osi e sa in ariv kot *DBS* osi, kot *in fact* mon osi ase resaman mon fer en pe vizit kot enn de bann etablisman Gouvernman. *In fact* ti' annan envite osi ki nou ti fer ki Prezidan ki ti la.

Ler nou ti al kot *DBS* mon ti pe demann enn de kestyon *DBS Praslin Pension Fund* anler kot zot ti pe dir mwan enn bann pli gran defi *DBS* lo Praslin e Mahe se bann *non-secured loan* ki zot in donn dan lepase ki napa sa bann sekirite.

E sa osi in kre en defi en *challenge* ki ozordi petet i annan serten krentif en fler ki bann labank pe per pou donn larzan, akoz bann *unsecured loan* ki ganny donne dan lepase bokou dimoun pa'n re pey sa bann *loan*. E sa bann det in akimile. E *DBS* ler i pe donn larzan i pa en kado ki i pe donne. I pe ekspekte sa bann larzan i ganny rann avek sa en lentere, ki sa lentere ek sa larzan ek lezot pe anmase i ava

al anver finansman pou bann lezot dimoun, ki'n anvi antre dan biznes, ki bezwen kapital ouswa larzan pou li *startup* son biznes, ouswa pou li envestir dan son biznes.

En lot defi ankor Mr speaker ki bann dimoun deor in fer resorti, se sa *issue deposit* ki ou bezwen mete pou ou kapab *secure* pou ou kapab garanti en *loan*. Ennler pou ou fer en lakaz or *even* si oule Onorab Loizeau osi in tous lo la - parey si oule fer en lakaz or *even* si oule komans en biznes *I don't know* kekfwa oule fer en pti *guesthouse* or petet oule envestir dan nenport - *I don't know* petet en restoran or en *takeaway* or *I don't know* dan en proze bato ekskirsyon.

Sa en legzanp ki mon pe donneen kot ler ou pe al rod sa *loan* i dir ou bezwen met en *deposit* 30poursan sa *amount* ki ou pe demande, so ki i fer li *very difficult* parfwa kot sa dimoun i napa sa larzan.

E wi i annan serten larzan ki pe antre ki pe sorti i kapab re pey son det. Me selman sa gro kopo larzan, sa poursantaz ki labank pe dir li mete pou li kapab *secure* sa *loan* i en pti pe tro bokou, i tro eleve, i fer li difisil pou sa dimoun kapab *secure* sa *loan*.

Me sa dimoun i pou kapab avek son *cash flow* son kapital ki pe antre, pou li re pey son det, me akoz sa *deposit* akoz sa poursantaz ki pe ganny demande, pou li mete pou ganny sa *loan*, i pa pe war li posib pou li kapab fer li ki fer ki bokou dimoun i *struggle* ler pou li ganny sa larzan, pou li antre dan sa biznes ki i anvi antre.

E Mr Speaker en lot konsern osi se lo sa size lentere. E sa i sirtou lo kote Labank Komersyal kot lentere pou peye i vreman tro o, kot parfwa ou'n pran en pa'n ler pou ou fini repey sa *loan* ler ou fer levanter ou'n pey preske lanmwatye sa larzan ki ou'n pran, ouswa *30percent or 25percent* kot *interest is too high* pou repeyman sa bann *loan*.

E sa i en keksoz ki dekouraz bann dimoun ennler pou pran *loan* avek labank. Ouswa ler zot in fini peye zot in perdi en bon pe zot perdi en bon pe avek sa bann gro, gro lentere ki zot bezwen peye *end up* ou war zot pe pey lapo kase.

Mr Speaker en lot konsern ankor parey mon'n dir, ki petet ki'n fer ki nou Gouvernman in *tighten up* lo bann sekirite ki'n fer li en pe difisil e menm bann Labank Komersyal, e *case in point* si nou pou get lo kote Gouvernman i malere pou dir,

me selman nou bezwen koz lo la;- in annan bann diferan labi, in annan bann diferan labi ki nou'n war kot i konsern donn *loan*.

Ozordi se *DBS* ki pe *take the lead* pou donn bann *loan*, bann pti biznes e bann pti antreprenier. Me dan lepase se *SBFA* ki Onorab Loizeau in koz lo la ki ti donn *loan* bann pti antreprenier. Me parey mon dir *small, medium*, e menm bann en pti pe plis larzan me nou'n war bokou labi dan lepase.

E pa bezwen *case in point* Mr Speaker parey mon dir *SBFA*, nou'n war dan lepase kot nanm ek fantonm dimoun mor, dimoun ki pa egziste ti pe ganny *loan*. Mon rapel sa fanmir Saga kot Charlot, Charlie, Charla ti pe ganny *loan* kot manman, piti, mari. Konmsi nou'n war bokou bann labi dan lepase dan bann lenstans dan Gouvernman dan lepase, kot bann landrwa ki donn *loan* kot ou'n war bokou bann labi.

Parey mon dir e mon ler sa *issue* ti vin devan Lasable annefe atraver kestyon ki Onorab Clifford Andre ti demande kot nou ti war ki mannyer bann nanm, bann fantonm ti pe ganny *loan*, bann dimoun ki'n mor sepa konbyen lannen ti ankor pe ganny *loan* tou.

E nou ti war annan ka osi dan lepase Mr Speaker kot *loan* bann gro *loan* detrwa milyon *loan* i ganny *write-off*, nou'n war an *ex Minis* ki'n pran *loan*, bann *ex MNA*, bann *ex Leader* dan Gouvernman avan - ki ti Lasanble avan ki'n ganny sirtou dan Lopozisyon ozordi ki sa letan ti dan Gouvernman.

So i ti ganny bann gro, gro *loan* apre *loan write-off*. *Loan* ti ganny *write-off*, e zot repren en lot *loan* ankor zot gannyen. I annan en bann ki'n ganny *loan* in ate loto, in aste lakaz, in aste bato. Napa kalite keksoz ki zot pa'n fer sa bann ki'n monte desann *travel* diverti, kontan in annan sa bann kalite labi ki fer ki nou Gouvernman ozordi i bezwen fer sir i met en lizye en pti pe pli pros, en pti pe pli profon.

Me fer sir ki zot swiv pou fer sir ki sa bann *loan*, sa bann larzan ki zot pe donne, i ganny servi dan en fason ki byen kot napa labi;- kot nou pa pou war bann lenstans ozordi kot ler kestyon i vin devan Lasanble, sa ki dwa *loan* i taye pou al pey en porsyon sa *loan*. Ouswa kot *file* i disparet, *hard drive* i ganny detri ou pa war *hard drive* ankor.

Ki fer ki prezan lezot dimoun ki pti pe pey zot *loan* byen, ler pou rod en

lenformasyon napa lenformasyon lo *loan* ki zot dwa e nou *end-up* perdi plizyer milyon Roupi. Parey dan sa ka mon krwar ti'n ariv *over R85million* ekek ganny bage Mr Speaker.

So parey mon dir i enportan ki Gouvernman in met an plas bann fasilite *loan*. Parey mon dir nou'n deza dan Bidze sa lannen, i annan en R150ekek milyon ki'n ganny, Gouvernman in fer provizyon pou donn *loan*. E nou, nou bezwen fer sir ki sa bann larzan i ariv kot sa bann dimoun ki'n bezwen.

Kot nou pa fer li difisil pou bann dimoun ki'n ganny, bann dimoun ki ser ten bann dimoun ki nou war i annan sa lanvi, i annan sa dezir i annan sa pansion, e i annan son *project memorandum*. I annan son plan pou li fer son Bidze ki ler i ariv kot *DBS* i war li pe ganny difikilte pou li ganny akse avek sa bann kredi.

Parey mon'n dir swa en *startup* son biznes ouswa pou li ganny sa *cash low*, sa kapital pou li envestir dan son biznes pou fer son biznes vin pli gro, kot i kapab anploy plis dimoun, plis travayer e ki li menm li i ava kapab pey plis taks ki nou Gouvernman i kolekte ki pou

benefisyé nou pei e nou tou, tou Seselwa.

Avek sa 2 mo Mr Speaker definitivman mon pou siport sa Mosyon ki devan nou e mon pe demann Gouvernman mon osi pou fer sa letid. Sa *survey* pou sey *find out* en pe bann fristrasyon bann defi ki la deor, e rod en fason pou gete ki mannyer en *middle ground* ki mannyer zot pou kapab koz avek bann Labank Komersyal. *Central Bank*. E osi *DBS* pou gete ki mannyer zot kapab fasilit sa bann *loan*, sa bann kredi pou fer sir ki bann biznes la deor ki vreman bezwen sa larzan, sa larzan i ariv kot zot.

Avek sa 2 mo Mr Speaker mon pou siport sa Mosyon. Mersi bokou.

MR SPEAKER

Mersi Onorab. Mon a demann Onorab Sandy Arissol.

HON SANDY ARISSOL

Mersi Mr Speaker. Bonn apre midi tou dimoun ki pe ekoute e bonn apre midi spesifikman bann dimoun Bel Ombre.

Mr Speaker Mosyon Onorab William i demann Gouvernman ansanm avek Labank Santral pou fer en letid lo bann difikilte, mon repete lo bann difikilte ki antreprenier i fer fas avek pou fasilit akse pou

en kredi kot Labank Developman Sesel.

Nou pe rod plis fasilit. Nou pe rod akse pou nou bann antreprenier dan distrik, dan pei pou zot kapab devlope. Selman i enportan pou nou koman en Lasanble Nasional, koman en pei rekonnnet e aksepte poudir Labank Santral in asiste plizyer dimoun dan nou pei.

Parey Onorab Desheila in fer resorti pli boner letan labank ti ouver, kantite dimoun in ganny ede. Kantite dimoun in ganny sa led pou zot sorti napa biznes pou zot kre en biznes, pou zot sorti lo en pti biznes pou zot vin lo en mwayen oubyen en pli gran biznes letan Labank Developman ti vin an loperasyon zisteman pou ed zot avek sa travay.

Sa ki enportan osi pou nou note osi Mr Speaker, dan nou pei i enportan pou nou aksepte e rekonnnet poudir nou koman bann Seselwa nou annan bann latitud malonnet. Sa osi nou bezwen koz lo la, kot nou bann Seselwa nou annan bann latitud malonnet.

Akoz mon pe dir sa? Bann ki pli vye, bann ki pli aze letan zot pe koute zot a rapel zot konnen poudir dan Sesel en lepok ti annan bann magazen ki ti donn nou Seselwa sa ki nou apel kredi.

Kot tou bann fanmir en lepok ou ti annan en pti karnen, kot nou manman ti anvoy nou laboutik pou a rod en kilo zonnyon, pou al rod en kilo disik. E sa ti ganny mete kilo karnen, parske ler papa lafen di mwan ti ganny son larzan i ti donn manman e nou ti al peye kot nou ti pran nou kondisyon lo sa karnen ki ti ganny rikord tou kommisyon, ki nou ti pran.

E sa ti en keksoz ki ti mars tre byen e ozordi sa in fini Mr Speaker. Sa zenerasyon rekonnet e aksepte poudir ou'n ganny en kredi ou bezwen rann, in fini.

Ozordi dan Sesel nou tou nou konnen i dir si ou anvi fase avek enn ou frer oubyen enn ou ser, pret li en pti sonm larzan. Apre i pou pase lot kote semen i pou get ou karakter, konmsi ou ki drwa li sa pti zis larestan. Sa i nou Sesel. E ozordi letan ou koz avek bann mazorite, bann pti antreprenier ki fer biznes aste revann ler ou pou koz avek li premye problem ki i pou dir ek ou;

“Ou war sa ki pase laba la kantmenm i pe demonstre, i dwa mwan en larzan li! Ou war sa enn ki lo televizyon la kantmenm i pe koze in farde in barbote la, i dwa mwan en pti larzan li!kkkkkkk Ou war sa

lenz ki lo li ki i pe pas ladan i pa ankor pey mwan li”.

Tousala ozordi i annan dan nou pei Mr Speaker parske Seselwa nou'n sorti lo sa mantalite kot nou paran ti montre nou, ti elve nou, letan ou drwa en dimoun son keksoz rann li. Si ou pa pou kapab rann li pa vo lapenn ou demann li oubyen ou prete.

Alor ozordi nou'n ariv dan en sityasyon dan nou pei kot labank osi an mezir labank i en biznes li nou bezwen aksepte sa. Labank i en biznes i zener larzan pou li kapab ed nou pou ed ou biznes an menm tan pou li pou rann zisteman pou li kapab asiste en lot dimoun ki dan bezwen.

E ozordi Onorab William pe demann egzakteman sa pou nou ansanm avek Gouvernman, ansanm avek Labank Santral pou nou fer en letid pou nou rod tou bann difikilte ki bann pti antreprenier dan nou distrik. Bel Ombre mon annan en kantite pe fer fas avek, pou nou fasilit akse kredi pou zot kot Labank Developman.

Letan mon lo sa Mosyon Mr Speaker mon ti a kontan ki Gouvernman i ekoute sa Mosyon, nou Mosyon i sorti kot Lasamble i al kot Mrs *Deputy Clerk* e zot fer le neseser pour ki L'Egzekitiv i ganny nou Mosyon,

pour ki en travay i ganny fer parey i pe demande ek Labank Santral ek Labank Devlopman pou nou ed nou bann pti antrepreneur laba deor ki pe ekoute.

Letan bann pti antrepreneur pe ekout nou laba deor ki anvi en pti larzan, alor mwan mon lans en lapel avek zot akoz mon pou vote lo sa Mosyon. Mon pou anvi ki Labank Santral i fer en travay ansanm ek Labank Devlopman pou ed zot bann pti antrepreneur deor.

Alor mon anvi lans en lapel ek bann pti antrepreneur ki pe ekout mwan, letan mon vot lo sa Mosyon, en travay i ganny fer ou ganny asiste avek en pti larzan ki pa pou ou, silvouple ale rann sa larzan pou en lot ou frer kapab ganny asiste.

Pa zwe ou pa konnen, pa zwe ou pa kapab selman ou'n pran ou'n servi, en lot ou frer i ganny anmare parske mwan senpleman mon vin en dimoun malonnet an relasyon avek en *loan* ki labank in donne.

Mr Speaker sa ti mon premye, mon lentrodiksyon lo sa Mosyon. Prezan mon anvi koz lo bann antrepreneur. Lekel bann antrepreneur ki nou annan dan nou pei ozordi? Lekel ki nou konsider koman bann

antrepreneur bann dimoun ki bezwen ganny lasistans?

Eski par egzanz letan nou pas obor kot *Codevar* par egzanz annan dan bilding *Codevar*, *Codevar* ti ganny fer pour kwa? Pou asiste bann pti antrepreneur? Pou donn zot en louvertir pou zot komanse pou zot vin mwayen? Pou zot vin gro apre pou zot sorti dan *Codevar* po les plas pou en lot ki komanse pran sa *step* apre pou li sorti? Eski sa ki pe arive kot *Codevar* ozordi pou bann pti antrepreneur?

Oubyen sa ki'n la mil an pase li menm la ki la ziska 2000 zanmen? Eski in grosi, in ganny lasistans, in ganny sa led pou li bouze? Pour ki en lot ki pli pti i kapab rantre menm laport pou ganny menn lasistans, pou li vin gro parey ou? Sa osi nou bezwen rode kalite led nou pe donne. Ki kalite difikilte nou bann pti antrepreneur pe gannyen.

Letan mon pas dan Lesplanade obor *National Library* sa bann pti antrepreneur ki dan *kiosk* la konbyen letan zot la? Eski zot pe ganny sa led, sipor neseser pou zot kapab kontiny sa biznes ki zot pe fer? Konbyen letan ki zot la? Ki dernyen fwa in annan en renovasyon lo sa lespas ki zot lwe zisteman pou atrakte sa

dimoun ki pou vizit sa biznes pou li kapab grandi?

Lekel ki sorti dan sa bann biro zisteman pou zot kapab vizit sa bann pti antreprenier. Pou ekout li, get ki son difikilte, rode kwa ki mannyer, ki gidans ou kapab donn li pou anpli son bann dokiman, ki gidans ou kapab donn li pou li vin devan pou li propoz en plan travay avek li pou li sorti lo sa ptipti, pou li vin mwayen, pou li en zour vin en gro.

Sa i bann difikilte sa, ki bann antreprenier pe fas avek ki Mosyon pe demande Mr Speaker.

Difikilte; letan nou pe koz difikilte bann pti antreprenier, i retourn ankor lo sa ki nou apel konpetisyon. Ozordi letan ou get en pti madanm dan distrik ki pey son *license* i al kot sanniter zot vin vizit son landrwa zot dir li fodre i met *tiles* depi ater ziska dan son plafon. Met en novo lavabo.

Re aranz son striktir, repenn e i fer tou ban prosedir neseser, pou li kapab fer detrwa pti gato pou li kapab kanmenm dan laboutik, dan magazen pou li vann, pou li zisteman kapab pey son *license* soutenir son fanmir e pou li fer sir ki i pe ganny son lavi parey Gouvernman in dir zot

debourye fodre ou depan lo ou lekor pou ou kapab travay.

Be ki difikilte Mr Speaker i fer fas avek? Ozordi dan nou pei, bann madanm, bann endividé bann msye, ki fer sa bann pti prodwi bann gato pou zot anmenn dan magazen pou vann zot pe fer fas avek bann konpetiter deor. Lekel konpetiter zot pe fer fas avek?

Zot pe fer fas avek bann travayer etranze ki pe travay dan *GOP* dan nou pei. Swa i pe fer lekol, swa i dan konstriksyon, swa i travay en lot landrwa li osi i pe fer gato piman, i pe fer samousa, i pe fer gato parey sa Seselwa ki li i pey son *license*, ki li in al kot sanniter, ki li ou vizit li tou lazournen.

E li i war li an konpetisyon, parske dan magazen pou li i ganny met anba kontwar e pou son dalon i ganny met anler i ganny vann e pou ou si i ganny en pti letan avan ler i fermen i met lo kontwar. Sa i bann difikilte ki bann pti antreprenier i fer fas avek ozordi.

Be i enportan pou bann dimoun bann Zofisyen parey Mosyon pe demande pou nou vwar bann difikilte ki nou bann pri antreprenier pe fer fas avek Mr Speaker. Sa i pou

konpetisyon ki zot pe fer fas avek.

Prezan ozordi lokasyon i vin en lot problem. Par egzanp mon get Bel Ombre mon annan Mrs Margaret Larose ki bat isi i bat laba, parske li i en madanm ki leve 4er bomaten i fer tou son bann prodwir naturel ki pe ganny demande e i ganny difikilte pou li kapab avek bann Lotorite konsernen ganny en landrwa pou li zisteman kapab vann son prodwi.

I pa pe aste revann sorti *Dubai* pou modifye li, i pe servi keksoz naturel dan pei parey in ganny demande pou li fer, pou li kapab vann pou li sonny son zanfan e rod son lavi.

Mon annan Denise Scholastic Mr Speaker en madanm ki leve 3er bomaten i fer tou son keksoz naturel, i servi later i servi fildefer, i fer tou. E ozordi dan son lakaz in montre mwan kantite prodwi ki in fer.

Me problem k i pe gannyen se letan i koz avek *Codevar* pou li ganny en pti akse en pti landrwa, letan i koz avek lezot landrwa i war li difisil pou li kapab vann donn prodwi koman en dimoun ki'n leve e pe debourye san tap laport san rod lasistans avek personn, san fatig personn.

E letan li in leve in debourye, i war en miray debout devan li parske i ganny difikilte ganny en lokasyon zisteman. pou ed li koman en pti antreprenier apre ki ki'n fer tou le neseser pou li kapab arive ozordi. Lokasyon ozordi i en problem.

Me letan Onorab William in anmenn sa Mosyon mon krwar la i le moman letan letan Gouvernman i ava ekout nou Mosyon seryezman, avek lezot Lazans ki ed bann pti antreprenier pou nou kapab vwar ki mannyer pei i bouze ki mannyer keksoz i bouze.

Se pour sa rezon Mr Speaker mon'n servi legzanp *Codevar*. Parske *Codevar* ti la ti ganny entrodwir avek bi pou ed bann pti antreprenier kapab bouze. Alor i enportan pou nou gete lekel bann dimoun ki la dan *Codevar* ozordi. Lekel bann dimoun ki dan bann pti landrwa antreprenier ki'n ganny dir sa pou bann pti antreprenier.

Sa osi i ava enportan letan nou lo sa Mosyon pou nou koz lo bann lokasyon kot sa bann dimoun i gannyen, pou zot fer sa travay apre ki zot in leve zot in debourye ansanm avek Labank Devlopman, pou zot kapab kontinyen sa ki zot in fer.

Mon lot pwen Mr Speaker pou nou bann pti antreprenere se lankourazman. Ki lankourazman ki annan la deor pou zot? Eski letan in vin kot labank par egzant si in ariv kot Labank Developman in ganny en pti *loan*, alors nou dir in gannyen 50mil.

E ler ou donn li son 50mil i ale ek son 50mil e i perdi *dans le néant* personn pa vizit li pou gete, be ki zistans ou'n arive? Ki bann difikilte ki ou pe fer fas avek? Kwa ki nou kapab ed ou, kwa ki annan *available* pou nou ed ou nou bouze, agrandi, e pli gran lespas en pli mwayen biznes, en pli gro biznes pour ki ou osi ou kapab anploy 2 dimoun?

Ou donn manze de fanmir, ou kontribye taks dan pei, i ed nou pou nou kapab aste plis latizann pou fer bann enfrastriktir dan distrik e sa i ed developman pei.

Ki bann lankourazman ki annan la deor ozordi, pou bann pti antreprenere kapab bouze, devlope, konnen letan i fini sa tel kote i ale. E ki bann alokasyon i annan kot bann labank par egzant Labank Santral ki bann lokasyon i annan apre serten 5an, apre 10an letan ou'n antre dan biznes, pou nou kapab ed ou pou ou bouze?

Eski bann dimoun ki dan biro ozordi dan sa bann biro konsernen zot pase zot vizit par egzant Justin Morel dan mon distrik ki travay avek kafoul? Pou gid li zisteman pou dir ek li, Justin ou kapab fer sa ou kapab ganny sa aplikasyon ou kapab ganny sa lasistans, avek lala kondisyon pou ou bouz de lavan.

Lekel ki sorti dan bann biro ki vizit Marcel Bacco dan mon distrik en sarpanye eksperyanse. Pou li konnen poudir be lala nou kapab asiste ou ek sa pou ganny masin, akoz sa lansar ki ou pe servi in fini, be la ozordi ou pou servi sa kalite masin i annan sa kalite prodwi ki pe ganny vann.

I annan en latelye ki pe vid laba pou ou met ou bann lekipman pou nou kapab zisteman gid sa bann dimoun dan sa bann demars ki nou pe fer.

Lekel bann zofisyen ki sorti ki vin koz avek Reginald Hoareau ki li i dil avek bann po fler ki fer avek later i aranze byen zoli e tou dimoun i apresye pou dir ek li Mr Hoareau zisteman lala i annan en landrwa vid la, nou pou donn ou oubyen nou kapab asiste ou avek tan finansman pou ed ou agrandi, parske nou vwar ou pe

prodwir en kantite prodwi ou bezwen lespas alor lala ki arive.

Mr Speaker nou pe koz lankourazman pou bann pti antreprenier apre ki in ganny son lasistans avek Labank Developman, kote i bouze apartir la? Lekel bann dimoun *from* anndan ki sorti ki vin koz ek zot an relasyon avek sa bann developman pou li kapab bouz de lavan?

Me par kont Mr Speaker i enportan pou nou osi aksepte poudir pa nou tou ki kapab fer biznes dan pei, parey Onorab Loizeau in dir pa nou tou ki kapab fer biznes. I annan dimoun ki annan son lespri biznes i konnen ki i pe fer. Me i enportan pou bann dimoun konnen laba deor ou pa kapab nou tou leve demen bomaten dir mon pou fer biznes.

Alor swa ou vin kot ou MNA pou vin *guarantor* ou, mwan mon pa pou *guarantor* personn, mon dir byen kler la - pa sey vin kot mwan pa sey telefonn mwan ou ti vot pou mwan. Alor mon pou vi *guarantor* - non mon pa pe *guarantor* personn, mon pa pe *guarantor*. So pa vin *call* mwan, pa ekrir mwan, pa sey rod mwan kantmenm ou ti vot pou mwan.

Parske parey mon dir ozordi *guarantor* i ganny bokou

difikilte. Parske letan en dimoun in fini *enjoy* son larzan, demen i zwe pa travay oubyen i dir ek ou komans malad apre se sa *guarantor* ki parey nou dir an term Kreol anmas sa fardo.

So tousala in ede, in kree ozordi bann difikilte ki'n fer fas avek bann developman ki parfwa bann antreprenier i vwar li ladan pou ganny en lasistans swa avek Labank Developman, swa avek labank bann lezot labank kot li son larzan i ete pou ed li pou li agrandi.

Mr Speaker dan bann difikilte ki bann antreprenier i fer fas avek i annan osi sa ki nou apel *proof of address*. *Proof of address* labank i demann ou ozordi en *proof of address* e *proof of address* en lepok MNA ki sinyen ki fer, en lepok DA ki i fer la mon krwar in donn en lord in dir ni MNA ni DA.

La mon pa konnen si lapolis ki pou fer, si kot SCAA kot *Airport* ler ou antre i fer ou fer, mon pa konnen. So tousala i bann difikilte ki bann antreprenier i fer fas avek.

Letan nou pe koz Labank Santral mon krwar Labank Santral ki donn sa gidans bann Labank Komersyal, zisteman parey zot in donn sa enn pou *proof of address*, pou nou etablir, rode ki mannyer nou kapab fasilit sa travay, pour ki

nou bann pti antrepreneur dan nou distrik enkli partou lo Mahe, Praslin avek La Digue osi zot a kapab kontinyen benefisyé avek nenport ki larzan ki i annan.

Si i annan bann pti *Scheme Mr Speaker*, pou bann pri antrepreneur i bezwen ganny *advertise*, i bezwen ganny dir lo medya, nou bezwen ankouraz nou bann dimoun pou vin devan. E ler nou ankouraz zot pou ganny sa bann pti *loan oubyen* sa bann facilite la, i pa kapab annan bann lanmaraz papye.

Parfwa i annan tro bokou ban lanmaraz papye, parey kot *SeyCCAT* ler nou ti ganny sa pti diskisyon ki ti fer pou *MNA*, *DA* dan ladministrasyon Distrik Roche Caiman, bann dimoun ki ti la ti fer resorti i annan tro bokou lanmaraz papye pou asiste ou pou donn ou en pti finans pou ed ou devlope ou osi epanouir, parey ou kontan dir met divan anba ou lezel pou ou kapab anvol pli lwen.

Alor Mr Speaker mon santi poudir Mosyon anmennen par Onorab William i fer bokou sans. Parske nou annan en kantite bann pti antrepreneur dan nou distrik. I annan en kantite dimoun ki *involve* dan lekonomi pei, zot fer serten kontribisyon. E zot ed nou dan

distrik parske parfwa zot anploy en dimoun, de dimoun e zot vizib dan bann landrwa sirtou letan zot pe travay avek bann keksoz ki annan pou fer ek touristikman, ki atrakte touris nou distrik pou bouze e pou asire ki i annan devlopman dan pei.

E an menm tan pou ede ki pou zot osi koman bann pti antrepreneur zot ganny serten lasistans pou ed zot bouze. E letan mon lo sa pwen, nou'n pas 2an pandan *COVID*, ti a bon konnen ki dernyen letid ki'n ganny fer parey Mosyon pe demande la, pou nou zisteman pas lo bann pti antrepreneur pou nou gete pandan *COVID* ki difikilte ki in fer fa avek e ki mannyer i pe ale la ozordi apre *COVID*.

Konbyen ki'n fermen, konbyen ki pe bouze, e konbyen ki'n ganny lasistans e kwa ki nou kapab ed zot pou fer zot vin bokou pli gran Mr Speaker?

E mon ti a kontan dir Onorab William en bon Mosyon Onorab William. E mon krwar i ava enportan poudir ki letan nou Mosyon i ganny vote Madam Clerk ava fer le neseser poudir ki Egzekitiv i tande e konpran.

E Labank Santral avek Labank Developman zot ava annan sa travay pou ed nou

dan sa ki nou pe fer zisteman pou nou bann pti antreprenier pa ganny kit deryer. Me pou zot osi sorti parey mon dir Mr Speaker lo sa premye *step* bouz de lavan lo dezyenm, menm mont trwazyenm menm al bokou pli o pour ki zot osi zot a grandi e parey mon dir *flourish* dan lasosyete.

Pour ki Sesel osi i benefisyé avek kontribisyon ki zot fer an relasyon avek taks. Avek sa detrwa pti parol Mr Speaker, mon ti a kontan remersi pou prezant mon sipor avek Mosyon Onorab William. Mersi bokou.

MR SPEAKER

Mersi Onorab. Mon aprezan don laparol Onorab Johan Loze.

HON JOHAN LOZE

Mersi Mr Speaker. Mr Speaker mon pa pou long. Mon pran laparol ozordi apre midi *primarily*, akoz Onorab William i en dimoun ki mon konn li profesyonnelman ase byen mon travay avek li pandan lontan.

Nou'n ganny sans fer en bon pe konversasyon *over the years* e non, zanmen mon deza *threaten* pou fer li sot par lafnet. Be selman mon kapab annan en balans, peze letan mon war li vin ek en Mosyon mon

konnen sa i senser sa enn, sa i li sa, sa Waven sa.

Because I've been having years of conversation avek en dimoun, ou konnen ki son bann fields de préférence, kote son leker i ete e ki bann keksoz ki li i enterese avek e sa i enn. Sa i li sa, sa Waven William sa mosyon ankor i annan. So...

Mon dir sa akoz mon premye baz pou mon siport sa Mosyon se zisteman sa. Akoz mon konnen kot Mosyon i sorti, mon konnen akoz e mon krwar mon konnen aepre kwa ki pe *prompt* li pou li fer sa.

Dezyenm keksoz mon anvi dir lontan letan dimoun ti malad la ti annan sa bann boutey *lucozade* klate kouler lor ek en pri plastik zonn, zonn kouler lor lo la, la.

Ou ti war li partou lopital lo tou sa bann *Cabinet* kot en dimoun i malad ou ti war sa bann boutey *lucozade*. Mon krwar rezon ki nou ti rod sa nou tou nou ti fermeman krwar, ki i pou ed en dimoun rekipere i pou *booster* son iminite e i pou ed li geri pli vit, byen pli vit. Mon ler en lekonomi en pei osi i parey.

Nou'n pas dan en maladi ekonomik terib, ki pa ankor fini dayer e i bezwen en *lucozade* mon krwar la pou ed nou rekipere. E so going further ki

Onorab William in dir dan son Mosyon Mr Speaker, mon konvenki ki Gouvernman i bezwen pe komans antre dan en *thinking*, donn en serten *economics stimulus package* pou stimil lekonomi Sesel.

Pou sistenm aport sa gerizon e byennet pou bezwen, sansan lekonomi pou langi, lekonomi pou langi sa akoz pou trenn lipye ziske dan son 2027 par la nou pou ankor lo serk parey nou ete la. So *unless* Gouvernman li menm li osi *step in* avek serten mezir pou *stimulate the economy*, pou aport sa gerizon ekonomik ki nou pei i bezwen, mon prevwar difikilte.

En lot keksoz ki mon ti oule adrese, i annan en parol mon'n tande taler poudir *Seed Capital Grants* pe donn dan *fisheries, tourism*. Nou bann sekter tradisyonnell. I byen, mon pa dir i mal be selman Mr Speaker nou pa santi ki nou'n pri dan bwat konmsi, pou bann dimoun ki kontan dir *think outside the box* la, nou pa santi nou'n pri dan bwat?

Akoz sa i nou bann sekter tradisyonnell i byen zot la, me selman letan ou get en keksoz parey *seed capital* - en antreprenier par son definisyon set en dimoun ki pran risk

finansyel pe *set up* biznes, dan lespwar ki i ganny serten profi.

Be plis *risk* i vin dan bann *ventures* novo;- i vin dan bann sirtou dan bann zenn antreprenier ki pe, zot idantifye en problem dan sosyete. Zot idantifye en mankman dan sosyete e zot *setup* en *business model* pou aport en solisyon. Ou get sa bann zenn ki pe *food delivery*, ou get bann *website* ki'n *setup* byen zoli kot ou kapab *order* manze, zot vini zot depoz kot ou lakour.

So mon panse ki nou pou bezwen bouz dan direksyon siport en pe sa bann linisyativ en pe pli fortman osi. E la Mr Speaker mon oule dir ki lannen prosen mon pa pou fer li sa lannen naturelman nou annan Bidze pe vini *and everything*.

Mon pe anmenn en Mosyon e petet mon ti a kontan boner demann zot, zot sipor e mon pe retourn avek sa nide ki *Grants* i devret R1milyon, pa sa bann zafer 50mil, 200mil la en *Grant* i devret R1milyon.

E ankor mon pou re koz lo mon largiman ki mon'n deza met dan sa Lasamble. Nou anvoy en zenn a laz 16an, 17an 18an, 20an nou anvoy li etidye lo en *Scholarship worth millions, worth millions*. I siny en *bond* a kondisyon ki i retournen be i en

lenvestisman i en *Grant* li osi - i en *Grant*.

Be kwa ki pou kase si nou aplik menm lozik lo en zenn antreprenier Seselwa lo en *middle-aged*, i en antreprenier Seselwa ki annan li *years of experience* pe travay i stab, e i vin avek en bon propozisyon e i *bid*, i fer son *pitch* i *bid* pou i ganny en *Grant up to R1million*.

Mwan personnelman mon krwar ki Gouvernman i kapab, e i devret pe met en 10 a R15milyon bidzete pou *Grants*. Kot ou kapab annan ou en 10, 15 ouswa menm plis Seselwa, si i pa pe kalifye 1milyon petet i a kalifye 500mil, 800mil, ou ganny plis *but* sa i fason ki mwan mon vvar li.

E i a *take care* en pe of sa bann problem ki dimoun i gannyen ek labank akoz en dimoun i kapab annan li en proze 3milyon si i ganny li en *Grant* i kalifye *that is* pa gannyen i kalifye pou en *Grant* 1milyon, deza i met li lo en *better standing* avek son labank.

Mon konnen i annan nou ki pa krwar dan sa zafer *Grants*, pa oule tann parle, mon pa pe neseserman dir la anndan me dan nou sosyete. Be *mes chers amis* i en pratik kouran konmela. E pou sak *Grant* ki ou'n donnek kot sa biznes i go

forth and be successful, ou envestir 1milyon, be konbyen milyon eski ou pou regannyen koman sosyete dan 10an, dan 15an dan 20an *natural lifespan* sa biznes?

So i en *Grant* R1milyon mwan pou mwan, mon get li i zis koman fimyen ki ou pe servi pou fertiliz *growth*, pou fertiliz. Annou dir en leksplozyon ekonomik dan nou pei, kot nou kapab *release* lenerzi nou bann zenn, *release* lenerzi nou pep. E mwan mon fermeman krwar ki dimoun i kapab fer biznes. Dimoun i kapab *venture* dan lantreprenarya.

E zis kestyon disiplin, i annan bokou nou, nou mank disiplin. Nou mank abilite lev granmaten e nou mank abilite kontrol nou depans personnel. So en dimoun deza si ou santi ou pa disiplinen ou pa kapab lev ou granmaten. E ou napa kontrol lo ou depans, ou devret seryezman kalkile avan ou al antre dan bann *ventures* biznes avek lantreprenarya, akoz sansan nou pou *end-up* ek tou sa bann problem ki bann Manm lot kote latab pe etale depi boner, ki nou pei pe pas ladan dan sa bann keksoz.

Enn bann problem ki nou pei pe fer fas avek, e la sa i mon lot rezon ki mon pe siport Mosyon Onorab William. Ozordi

Sesel mes chers amis make no mistake. Nou annan envestiser ki pe vini ki pe ganny li akse avek kapital *the tune of* 4 poursan lentere, 5poursan lentere dan son pei lorizin kot li i pe vini.

E la i vin sa problem konpetisyon ki Onorab Arissol ti pe koz lo la *but on a much larger scale*. En envestiser i vin Sesel avek *loan* a 4poursan, a 5poursan lentere dan son pos i prezant en *massively unfair competition* pou okenn pti antrepreneur Seselwa.

E pa neseserman pti antrepreneur, menm nou bann gro *businessmen* nou ganny difikilte *compete* e zot pe gannyen difikilte *compete* avek sa bann sityasyon. Akoz i la ater ek nou sa deza - bann ki dan biznes zot konnen ki mon pe koz lo la zot.

E tousala i bann keksoz ki nou, nou pou bezwen sers fason pou adrese koman en sosyete. Nou pa pe kapab kontinyen zis *turn a blind eye*. Mon konpran mwan tou bann kontrol restriksyon, Polisi ki an plas akoz *history*, rezon ki'n arive, ki pa'n arive.

Be ziska kan ki nou pou kontinyen sant sa sanson? Bat lizye zour nou ouver nou pou war tou sa ki pou nou dan lanmen etranze. Pe flote pe ale

dan larad lo lapo koko laba. Akoz nou Seselwa nou pa pe kapab ganny akse ek kapital. E bann ki gannyen zot pa kapab ganny akse a en to lentere ki favorab pou zot *compete* avek envestiser etranze dan pei.

Sa i en keksoz ki nou bezwen adrese sa, e mon pa vreman *care* ki kote latab ki nou asiz lo la be selman nou bezwen get sa problem an fas drwat dan son mizo ek son ta ledan. E fer nou bann desizyon ki nou pou fer.

So avek sa Mr Speaker mon anvi eksprim mon sipor pou Mosyon anmennen par Onorab William. Mersi Mr Speaker.

MR SPEAKER

Mersi Onorab. Mon ava donn laparol Onorab Pillay.

HON SEBASTIEN PILLAY

Mersi Mr Speaker. Bonn apre midi tou dimoun. Mr Speaker pandan letan ki mon'n vwar sa Mosyon lo *Order Paper* mon'n bezwen admet pour mon plizyer lannen dan Gouvernman mon osi.

E ozordi ki nou pe diskit en Mosyon ki konsern akse ek kredi e nou pe mansyonn rol DBS e rol Labank Santral i enportan ki Lasanble nou pa fer parey nou'n abitye fer e retourn

ver en retorik li menm ki konfiz son lekor. Les mwan eksplike Mr Speaker premyerman, premyerman lo en kote mon tann bann Manm ki in koz lo donn kredi, donn larzan apre zot koz lo labi.

Ler ou koz lo labi, ou koz donn kredi ansanm, en konsekans inevitab ler ou pe administre sa lorganizasyon se ki ou sanz prosedir e Polisi ki ou met an plas e ou fer li vin pli rigore. Par egzanp atraver ou Mr Speaker Onorab Woodcock ki'n reganny son lavwa apre midi, in *remind* nou ki mannyer nou annan bokou labi, dan lepase, me osi an vi ozordi ki *DBS* i donn ankor larzan.

So pou mwan mon krwar sa i antite, mon konpran akoz *mover* Mosyon in anmenn sa Mosyon e mon ti a kontan zis demann ek Lasanble pou nou sitye nou byen lo kot nou ete ozordi e si vreman koman en Lasanble nou oule fer keksoz marse.

Premyerman Mr Speaker kwa sa *DBS*? *DBS* ti ganny kree atraver en Dekre e sa Dekre i ankor la ziska ozordi e sa Dekre i date depi 1978. Ou konnen bann keksoz ki'n ganny kree pandan letan bann kales ki'n kase selman i parey i ankor bon la. Parey sa bann Minis Zafer Etranzer ki mon ti war pe ganny

onore, ki ti bann Minis dan en Gouvernman kales kase, me ki'n ganny onore, akoz i paret mwan zot in byen travay.

So i enportan Mr Speaker-mon kontan ler Onorab Henrie i ankoler Mr Speaker ler mon dir sa bann keksoz. I enportan Mr Speaker - i enportan Mr Speaker ki nou sitye akoz, akoz sa Dekre ti ganny kree, e prezan eski ozordi i ankor relevan dan konfigurasyon pou mentenir sa Dekre e sa formil ki'n kre *DBS* oubyen eski nou bezwen sorti e regard ver en novo formil?

Lenformasyon ki Lasanble i bezwen dir Manm piblik i se ki premyerman *DBS* i en Lenstitisyon Finansyel ki tonm anba ziridiksyon Labank Santral. E dayer mon krwar se pour sa rezon *mover* Mosyon in koz lo Labank Santral fer en letid.

Me eski *DBS* antyerman poi Gouvernman Sesel? E larepons pou sa Mr Speaker se non. *DBS* pa antyerman apartenir a Gouvernman Sesel. *DBS* i apartenir an poursantaz pou Gouvernman Sesel e serten lezot antite.

Gouvernman Sesel li menm i annan apepre 60.5poursan dan *DBS*, *AFD* mon krwar Labank Afriken pou Developman i annan 20poursan. Labank Lenvestisman Eropeen

i annan 15.9poursan. E *Nouvobanq* atraver *Standard Charterered Bank* i annan apepre 1.59poursan, e i annan 2poursan i paret ki i *unallocated*.

Me a en moman mon krwar ti menm koze ki *Barclays* i annan en pou poursantaz dan *DBS*. E ki sa i kree Mr Speaker pou nou deba la apre midi? I kre 2 eleman *funding*. En premye eleman *funding* i ganny kree se en eleman kot *DBS* i annan bann larzan ki pou zenere li menm li koman kapital, ki Gouvernman pou donn li e ki i pou *manage*.

E ki i pou kapab prete e li menm li ki dil avek parey en labank pou dil avek. Be apre i anmenn en lot konponan larzan ki vin atraver sa bann baryer de fon, ki antre dan *DBS* ki *DBS* preznan i bezwen *manage*.

E se la mon krwar kot Onorab i bezwen regarde ki rol li menm li koman *Chairman IAC* i annan pou zwe, an relasyon avek ki mannyer preznan sa kredi, sa larzan, sa mwayen finansyel ki sipoze al ver bann biznes, i kapab pas atraver sa sistenm ki'n ganny etablir, pou ariv kot sa antreprenor oubyen sa biznesmenn ki pe vin rod sa fre oubyen sa larzan.

Pou lenformasyon Lasanble Mr Speaker, resaman

atraver tou nou bann demars an sa ki konsern *blue bond*, an sa ki konsern tou bann keksoz. Ler nou ti demann Minister Finans e Onorab Sekreter Zeneral *LDS* Mr Speaker Onorab Henrie ti preznan dan sa.

MR SPEAKER

Ou'n remarke poudir Onorab Henrie in deza obzekte ki ou apel li Sekreter Zeneral *LDS*. E mon krwar i annan en rezon la, akoz mon krwar ou pe fer sa, mon ti ava apresye si ou ti ava apel li par son non Onorab Henrie.

HON SEBASTIEN PILLAY

Onorab Deputy Speaker Mr Speaker ti dan sa miting ansanm avek mwan. E i ava rapel ki ler nou ti demann SS lo konbyen antite biznes ki'n ganny akse avek sa bann *loan*, i ti dir nou mon krwar i annan detrwa aplikasyon me *in terms of disbursement* si i annan enn oubyen de, me selman napa plis ki sa.

E sa bann konponan *loan* se en keksoz ki Minis pou Finans ti koz ladan pandan Bidze 2021, ki petet mon krwar ban Manm Lasanble lo kote Gouvernman zot pe aport latansyon lo la ki nou lo sa kote latab, nou ti dir ki son fason ki ganny mete pou fer li restriktiv

pou dimoun kapab ganny akse ek sa larzan pou fer biznes.

So kestyon prezan ki vini se ki Onorab in demann en letid. Mon krwar sa ki Onorab i bezwen osi pe demande se ki i devret pe re demann en *re assessment* lo ki rol *DBS* i bezwen zwe, dan nou lekonomi aktyelman. Mazinen ki depi 1978 ziska kot nou ete ozordi 2022, en kantite keksoz in pase, en kantite rol ki ti pe ganny zwe par *DBS* in ganny zwe par diferan Lazans enterimer pandan sa bann letan.

E li menm li Gouvernman in menm met bann facilite atraver bann Labank Komersyal, pou fer bann antreprenier ganny akse avek *loan*. So nou pou bezwen regard sa rol ki *DBS* i zwe. Akoz? Spesifikman akoz Mr Speaker set akoz si *DBS* pou konport li parey en Lenstitisyon Finansyel, mon pa pe war bokou antreprenier ganny *loan* avek *DBS*.

Akoz si nou regard la fason ki *DBS* pou bezwen konport li, e napa sa pa problemm *DBS* sa. I problemm sa sekter ki *DBS* i ladan. I pou annan bann diferan eleman ki *DBS* li i pou bezwen konsidere. Par egzanp lekel sa dimoun ki i pe prete, i pou bezwen *assess*

son kredibilite e son abilite pou li *manage* en biznes premyerman.

Dezyenmman *DBS* pou bezwen assess bann risk e vyabilite e menm soustenabilite sa proze ki sa dimoun i oule enplimante. Trwazyenmman e sa i enportan mon krwar Onorab Loizeau in tous lo la, e serten lezot Manm in koz lo la, i pou annan sa ki ou a pe, en kontribisyon oubyen *equity* ki bezwen ganny mete par sa dimoun ki oule promot son biznes pou li fer.

Katriyenmman i pou enportan prezan pou *DBS* etablir *cash flow*, pou li kapab idantifye lekel bann resours lenvestisman oubyen bann sours repeyman ki sa proze pou anmennen, e ki abilite sa dimoun pou re pey sa larzan. E dernyen byensir pou annan kolateral oubyen sekirite ki sa dimoun i bezwen mete, ki pou kouver sa sours repeyman si sa dimoun i *default* lo sa *loan*.

E dan sa konteks alors *DBS* pe akt zisteman parey en labank pe *react* dan nou sekter finansyel. E vwala kot nou problemm i ete prezan nou dan sekter finansyel Sesel. E sa i napa naryen pou fer avek en kantite keksoz ki nou'n koze la, me i annan pou fer avek *whether* Gouvernman, pou

annan sa *political will* pou li *tackle* sa sityasyon *lending* ki egziste avek bann labank ki dan nou sekter finansyel.

En keksoz ki Onorab i bezwen fer *Central Bank* konsidere osi, se lefe ki nou deza osi annan en *Financial Consumer Protection Act* ki Lasanble in pase.

E sa Lalwa ler ou regard son konponan proteksyon konsonmater, i kler ki poudir lanfaz i ganny mete pour ki bann lenstitisyon finansyel i demann avek en dimoun ki pe vin rod kredi, plizyer keksoz avan ki sa dimoun i menm kapab antre dan laport pou ganny akse avek sa kredi, *unless* sa dimoun i deza en biznes etablir.

So ki sa i vedir Mr Speaker? Sa i vedir poudir mon pou servi non detrwa biznes *ok*, plito mon pa servi zot non, sa i vedir poudir si ou, ou deza annan en biznes kot ou pe fer *DMV*, ou pe fer lezot *DMC* ek lezot keksoz, labank pou regard ou kredibilite bokou pli byen li par egzanp Onorab Monthy ki pe vini ki pe vin rod larzan oubyen en *loan* pou li fer en biznes.

Or i pou regard diferaman Onorab Aglae ki pou vini pou vin fer en biznes. Mon pe koz la ki sa de dimoun i pa de Onorab

e i de dimoun normal ki pe vin rod en finansman pou en biznes. Savedir sa ki etablir pou toulstan ganny priyorite lo sa ki rekomanse. E sa pou kre en deba de balansman dan lafason ki sekter i performen.

En lot pwen pertinan Mr Speaker, se sa size *cash flow* ki vin en eleman enportan dan tou bann deba ki nou gannyen. Par egzanp ozordi Mr Speaker lekel bann biznes ki *DBS* pou oriyant son lekor pou li siporte lo en gran lesel?

Si nou pran ban biznes valer azoute dan sekter lekonomi ble k sipoze benefisyé avek sa bann provizyon finansman ki nou met an plas, nou kapab war poudir ozordi en *minimum* bines ki pe al benefisyé ek sa konponan finansyel. Me par kont i annan biznes ki'n deza benefisyé atraver *DBS* e la nou pe koz depi dimoun ki'n aste bato, ki'n fer son biznes lapes ziska donk in fer proze valer azoute avek pwason.

Eski preznan ler ou annan sa kantite akter ki pe in dan en menm sekter, i pa *fair* ki ou napa en diversifikasyon lo baz ekonomik. E se la ki mon ti pe koz lo rol ki *IAC* i annan pou zwe, akoz *IAC* i bezwen ede pou li *drive* en sanzman *mindset* e pou fer sir ki sa mo

diversifikasyon ekonomik pa vin zis en mo ki nou koze, me i en mo ki *translate* son lekor dan bann *inputs* tanzib ki ganny mete atraver *DBS* pou fasilit biznes.

Ozordi bann *inputs* i relye mazoriterman avek Sekter Lekonomi Ble. Me selman nou pou oule diversifye lekonomi, *but at the same time* bann *inputs* a pase pou dimoun kapab fer sa ki zot pe fer.

Dezyenmman Mr Speaker, eski *incubation model* ki egziste ozordi pou biznes dan Sesel, i enn ki fasilit bann pti antreprenier? Koman en parti nou'n realize poudir enn bann keksoz ki nou'n fer byen dan sa pei, se ki nou'n tir en kantite dimoun dan *working class* e nou'n anmenn zot dan laklas mwayenn.

Ozordi en kantite dimoun ki annan zot biznes in fer li atraver en sistenm ki ti la an plas. Byensir zot in travay dir, me sistenm an plas ti'n ed zot grandi. Be kestyon ki sa Gouvernman aktyel li i bezwen demande de *what's next*. Ki lot nivo, ki lot *gear* ki ou bezwen pase pou ou kapab al lo sa lot nivo?

E se pour sa rezon kot mon dir ki en lanaliz i osi enportan ki annan en *reassessment* en re evalyasyon,

ki rol lo nou pou zwe an relasyon ti avek sa bann sekter biznes. E *whether or not* nou devret komans separ sa bann sekter, e anmenn bann *inputs* ki pou al spesifikman dan domenn Lekonomi Ble e pa *mix* tou keksoz ansanm.

Kot apre prezan ler ou pe vini ou ganny drwa war ou en fason en balans ki de balanse, kot nou pou vwar la mazorite dimoun i oule al dan en sekter meton lapes. Me *at the same time* Gouvernman i oule entrodwir bann mezir pou kontrol e *manage* nou *fish stock* pli byen.

So bann zefor ki nou oule mete dan sa sekter, nou fer bazar, nou oule ankouraz dimoun pou rod *loan* pou fer bato, i ogmante. *But at the same time* nou oule dimini la kantite *output* ki sa sekter pou *generate*. E pour mwan sa i kre en de balansman dan lafason ki nou oule fer keksoz.

So Mr Speaker mon swete ki sa Mosyon i vin en Mosyon kot i vin en pwen depar pou en diskisyon kontinyel ki kontinyen annan ant Lasanble Nasyonal, pour ki reelman nou kapab annan en *input* direk dan ki mannyer nou kapab sanz sa *landscape* ki pe *provide* kapital pou biznes.

E etablir en baz pou prouve akoz ki Labank Komersyal i pre dominaman, i *predominantly* oubyen i favoriz serten akter dan biznes. Mon dir sa avek serten rezervasyon Mr Speaker taler mon a ganny en *Right of Reply*.

Me i paret poudir i annan en diskalifikasyon ki ganny fer avek serten akter, ler zot pou al ver Labank Komersyal e ki fer ki tou dimoun prezan i bezwen vir ver *DBS* pou li ganny akse avek kredi.

Ou a realize Mr Speaker konklizyon ki mon pa'n koz lo bann prosedir entern *DBS*. Rezon pou sa, *set* akoz sa bann prosedir entern i bezwen satisfer konteks ki *DBS* i trouv li ladan e lafason ki in ganny kree ozordi.

Savedir pou nou fer sa bann prosedir entern koz en lot fason, nou pou bezwen revwar son konteks dan ki in ganny kree. E nou bezwen revwar la fason k i pou fer sa ki i fer e se la *challenge* kot ou Mosyon i vini Onorab.

Ki mannyer ou pou *achieve* sa tout an fer sir, ou gard en serten nivo *accountability* e transparans dan lafason ki sa bann fon i ganny zere, pour ki i benefisy le mazorite dimoun ki oule fer zot biznes. Mwan mon annan

mon langazman personnel Mr Speaker. E sa i en keksoz ki mon anvi war.

E si nou kapab *come up* avek en keksoz ki tanzib i en keksoz ki mon parti i toulstan koz lo la, in koz avek nou. Pa tou keksoz ki nou'n fer byen mon pou aksepte wi. Me selman nide, konsep, e direksyon i enportan ki nou konnen ki ou pe favoriz Seselwa pou li devlope dan biznes.

E mon pou termin lo sa not Mr Speaker. I annan en danze reel pou nou sekter lantreprenarya Sesel par lefe ki dimoun an deor ozordi dan plas anmenn lenvestisman dan nou pei, i vin rod akse avek kredi dan Sesel, pou fer bann devlopman lo gran lesel dan plas ki nou ti pe dir zot bezwen vin ek zot prop larzan.

Lo en lot kote i osi annan en konpetisyon ki de-balanse kot antreprenier ki sorti an deor, akoz nou'n ouver akse avek nou sekter ekonomik. Antreprenier ki sorti deor ki kapab ganny akse avek kredi a en facilite bokou pli rezonnab pou zot, i annan en lavantaz lo nou antreprenier lokal pou antre dan serten sekter.

So nou bezwen regard sa danze ki sa i poze pou nou. E *going forward* vi ki ler nou lekonomi i kontinyen vi ki nou

bezwen kontinyen devlope. Ki mannyer nou kapab fer sir nou protez nou bann antrepreneur lokal *from* sa ki kapab en danze pou devlopman biznes Seselwa demen. Mersi Mr Speaker.

(APPLAUSE)

MR SPEAKER

Mersi Onorab. Nou ti pres pou terminen me selman i annan ankor Manm ki'n lev lanmen. Mon annan Onorab Cosgrow avek Onorab Gill.

Mon a termin avek zot e apre nou a pran *reply* lo devan, mon pou donn zot 15minit sak. Akoz pou nou fini atan pou nou pa ganny konplikasyon avek laranzman *staff* ki nou bezwen fer si nou pou al pli tar. Mersi. Nou a pran poz la nou a repran 4er30.

(BREAK)

MR SPEAKER

Bon tre byen. Onorab Cosgrow ou annan la parol.

HON WALLACE COSGROW

Mersi Mr Speaker. Bonn apre midi Mr Speaker. Bonn apre midi tou Manm Onorab e tou dimoun ki pe ekoute. Mr Speaker mon pou tre bref apre midi. Mon pran laparol Mr

Speaker apre midi en pe konfize en, pa ganny mwan mal kantmenm mon dir mon en pe konfize. Me les mwan eksplike Mr Speaker akoz mon en pti pe konfize.

Ozordi dan Lasanble nou pe ganny demande *or* nou pe demann Gouvernman ansanm ek Labank Santral, pou fer en letid lo bann difikilte ki antrepreneur pe fer fas avek an sa ki konsern facilite akse pou kredi e sirtou kot Labank Devlopman.

Par kont Mr Speaker tou loportinite ki Gouvernman i gannyen, tou lendikasyon ki Gouvernman i montre nou ozordi se ki lekonomi pe fer byen, lekonomi i dan bon semen, i annan logmantasyon dan pti biznes i annan prediksyon lekonomi ki lot fwa Minis ti dir i pe redwir krwasans *growth* a 7poursan sa lannen.

Me lo lot kote nou ganny en Mosyon dan Lasanble par en Manm lo kote Gouvernman, ki pe idantifye serten problematik. Serten sityasyon problematik.

Alors sanmenm sa ki mon dir mo en pri pe konfize, pou mwan sey konpran ki vre sityasyon ki vre realite la deor. Lo en kote nou pe koz bann sitasyon problematik, an sa ki konsern akse avek kredi lo lot kote nou pe koz logmantasyon

pti biznes. So mon pa pe vreman ganny en konpran ki kalite portre ki nou pe sey penn or ki kalite portre ki la realite ki la deor.

Lekel Mr Speaker ki analiz i bon? Eski Gouvernman ki analiz i bon, ouswa eski nou bann diferan komanter ki'n pase dan Lasanble apre midi, eski nou bann Manm Onorab, bann Manm ki annan bann distrik ki annan bann dimoun ki zot koz avek? Eski nou ki nou lenterpretasyon i bon Mr Speaker?

E Mr speaker ler mon ekout bokou bann largiman, mon en pti pe enkyet akoz ou a krwar i annan lenpresyon ki bokou bann Manm ki'n koze, i annan lenpresyon ki bokou dimoun i pe pran *loan* pa pe re peye. E se sa rezon ki labank ozordi pe *tighten* bann diferan prosedir, *or* ti pe fer li vi pli difisil pou dimoun ganny *loan*.

Me mwan mon pa krwar senserman ki sa i leka. Mon pa krwar ki sa i pli gro problem, i annan serten ka wi, i annan serten ka. Kantite dimoun in pas ladan, kantite dimoun ki mon konnen in pas dan sa bann sityasyon kot par egzanp zot garanti. Bokou in koz lo la zot garanti dimoun apre dimoun pa peye zot war zot dan en difikilte. *Or* i annan dimoun

ki'n pran *loan* e ki zot pa pe re peye.

I annan serten ka, me mon pa krwar nou devret zeneraliz sa e dir ki sa sityasyon ki nou annan, i en sityasyon baze lo move aksyon mazorite Seselwa, mazorite biznes. Akoz mon krwar en bon pe biznes ozordi i onor zot bann langazman avek labank, malgre difikilte ki zot pe fer fas avek.

Malgre par egzanp bann sityasyon *COVID* ki zot in pas ladan. Malgre sityasyon pri i monte an zeneral dan pei, kwa ki konsern pri karbiran, kwa ki konsern pri manze, bann diferan servis an zeneral.

Mr Speaker les mwan met en pwen devan. Ozordi bokou bann dimoun, bokou bann Manm Onorab ki la, i annan en bon pe zot ki ti dan Sizyem Lasanble e zot ava rapel i annan en kantite Lalwa ki nou'n pase en, *well* ki'n ganny pase dan Sizyem Lasanble mon pa ti la, me en kantite Lalwa ki'n ganny pase.

Bann Lalwa ki met bokou legzizans lo bann lenstitisyon finansyel bokou restriksyon lo Lenstitisyon Finansyel pou fer sir ki zot protez konsonmater, me osi protez lenstitisyon finansyel. Mon kapab mazinen ki demen bomaten si i arriv en kolaps lo nou a lenstitisyon

finansyel, akoz bann move pratik sirtou bann pratik pret larzan nou kapab mazinen ki pou arive avek nou lekonomi.

E dayer nou'n war bann kriz ekonomik mondyal sirtou 2008 ki bann sityasyon ki ti kre sa bann keksoz. E akoz lenstitisyon finansyel sekter finansyel mondyal in bezwen pran serten sa bann mezir. E nou Sesel nou war nou dan en sityasyon kot nou pa izole avek lemonn, malgre nou pti me nou pa izole ek lemonn.

E nou bezwen *follow* sa bann lenstriksyon ki ganny donnen enternasyonalman, pou fer sir ki demen nou pa perdi nou *correspondence bank* pou fer sir ki demen nou pa war nou bann lenstitisyon finansyel dan problem.

So nou bezwen mazin osi sa bann Lalwa ki nou koman ban lezislater nou'n pase dan lepase ki petet i met serten restriksyon lobstak lo Lenstitisyon Finansyel pou din lasistans.

Me sa i pa vedir ki nou devret aret la e nou devret zis dir poudir i difisil. Akoz mwan mon krwar senserman ki nou bezwen rod fason pou stimil sa lekonomi. Pou kre pti biznes e dayer mon konnen ki poudir ozordi Sesel nou sekter biznes i kategorize par apepre 80

poursan pti e mwayenn antrepriz, ki nou dir i moter nou lekonomi ozordi.

E nou devret rod tou fason pou kapab donn sa sekter en pti e mwayenn antrepriz sa loksizenn ki i bezwen ouswa sa *lucozade* parey mon koleg Onorab Loze in dekrir sa *stimulus* ki pou lev zot, ki pou bouz zot pli devan. Ki swa dan bann sekter tradisyonnal parey in ganny fer resorti.

Me osi pou ed zot idantifye e antre dan bann sekter inovan emerzan pou tir nou lekonomi en pri pe dan sa *practice* kot nou abitye e met li lo en kot *footing* ki fer li vin pli rezilyan.

So mon krwar i enportan Mr Speaker ki nou mazin bann diferan Lezislasyon. E nou menm nou koman en Lasanble ek Gouvernman mon pe enplor Gouvernman ozordi pou revwar petet serten keksoz, serten fason ki nou kapab fer pou nou remedye serten keksoz ki petet nou menm nou, nou'n met an plas.

Mr Speaker mon dezyenm pwen mon'n osi tann serten Manm koz lo bann diferan *Scheme*. E ler mon tann zot pe koz lo sa bann *Scheme* mon pa tann naryen nouvo.

Annefe mon tann *SME Scheme*, mon tann *Blue Finance Scheme*, mon tann *SeyCCAT*,

mon tann *SBFA – YES Scheme*. Mon pa tann naryen nouvo Mr Speaker, napa nouvo prodwi. Par kont Gouvernman dizour, ti vin avek en promes pou kapab fer keksoz diferan. Me nou ankor *still* pe koz lo bann *Scheme* etablir par Gouvernman presedan. So oli renovasyon?

Nou bezwen *build* sa ki lati form bann labaz. Bann diferan fason ki mannyer nou kapab asiste pti e mwayen lantrepriz, sekter biznes pou sekter biznes bouze. Me sa ti form bann labaz. Nou bezwen war inovasyon dan lafason ki nou *think* an term donn finansman, donn kredi bann pti biznes. Bann pti e mwayenn antrepriz.

Me nou pa pe war sa bann nouvo lide ki sipoze ti pe vin avek, nou pa pe war sa ba nouvo lide. Nou kontinyen anpandan lo tou sa bann *Scheme* e nou kontinyen kritik sa bann *Scheme*, ki dayer sa bann *Scheme* in fer bokou dibyen dan bokou ka pou bokou bann pti biznes.

E mon krwar bann pti biznes deor ki pe tande bann ki'n benefisyé ek sa bann *Scheme* zot ava dakor avek mwan. I pa'n parfe, pa tou ki'n parfe, me solman in annan bann nide ki'n ganny avanse,

pou nou kapab avans nou sekter pti e mwayenn antrepriz de lavan pou nou ariv kot nou war nou ete ozordi.

Mon trwazyenm pwen Mr speaker i relye avek mon dezyenm pwen. Mon krwar labank bann Labank Komersyal, Labank Developman i reste en pilye sekter finansyel Sesel. I reste en pilye e bokou ki swa bann dimoun ki al rod larzan prive pou bann keksoz prive, *household* e osi pou bann pti biznes.

Bann labank i reste sa *central solution* pou zot. Me nou bezwen sorti dan sa bwat. Nou bezwen travay en pti pe an deor sa bwat e *venture* en pe pli lwen e gete kwa ki bann lezot pei, bann lezot pti pei, Pti Leta Zil parey Sesel in fer pou zot kapab bouze zot lekonomi.

Annou get bann *innovative financing*. Bann diferan kalite finansman ki ozordi pa neseserman petet bezwen pas atraver labank, bann nouvo veikil mekanizm finansman ki pou zisteman ed sa sekter ki nou anvi ede, ki nou anvi i bouze ki nou anvi kre larises pou nou lekonomi.

Ler mon get sa Mosyon Mr Speaker, pou mwan mon krwar parey in ganny dir sa Mosyon i annan bon lentansyon.

Akoz nou pa kapab mazin krwasans, nou pa kapab mazin bouz devan dan biznes, nou pa kapab mazin grosi nou lekonomi san met a disponibilite nou bann biznesmenn ozordi avek nou annan biznesmenn fitir sa loportinite finansman pou zot kapab fer sa ki zot pe fer, or fer sa ki zot pou al fer.

Me ankor ler mon pe rezimen, tou i tourn otour nouveau fason fer;- nouveau fason fer nouveau fason finansman. Idantifye nouveau nide idantifye nouveau nide, *small* me konsekan, ki ankor dan 5an 10an i kapab vin bann pilye pti e mwayenn antrepriz. Nou bezwen sorti dan sa bwat.

Think an deor e donn loportinite zenn ki swa parey *SeyCCAT* pe fer dan bann domenn lanvironnman. Lontan nou ti krwar ki domenn lanvironnman nou pa kapab fer larzan avek. Lekonomi Ble ozordi i montre poudir i annan posibilité fer proteksyon. Me *at the same time* fer li vin en keksoz ki anmenn en reveni pou pei.

SeyCCAT pe montre nou in donn bann *Grants*, i donn bann *loans* atraver *blue finance*. E sa i enn. Nou bezwen idantifye bann lezot keksoz. I

annan dimoun i koz lo en kantite bann lezot keksoz.

So nou bezwen *going forward* pou nou kapab bouz sa sekter pti e mwayenn antrepriz Sesel. Re oriyant nou lespri lo bann diferan e nouveau prodwi. E Gouvernman i annan en devwar pou li fer sa travay e met a loportinite pa zis ban keksoz tradisyonnal, me bann keksoz nouveau.

So avek sa Mr Speaker parey mon'n dir mon pa pou long. Me mon swe e mon dezir ki nou ava kapab pandan sa bann prosen lannen ki vini prosen Bidze ki ganny prezante Bidze sorti Gouvernman i sorti *out of the box* e i donn plis sipor.

Ki swa *initially* atraver bann *stimulus package* pou lev biznes, donn li sa *lucozade*, but osi *think forward, think forward* dan bann sekter inovan emerzan ki pou anmenn nou pti pei en pe parey sa bann *Asian tigers* ler zot ti bouze zot ti'n vin bann lekonomi vibran.

Avek sa Mr Speaker mon a remersi ou. E mon aret lanmenm. Mersi.

MR SPEAKER

Mersi Onorab. Mon a donn laparol Onorab Churchill Gill.

HON CHURCHILL GILL

Mersi Mr Speaker mon osi mon pou tre bref. Mon le zis avan loter Mosyon i *wrap-up* met serten pwen lo rikord. Petet i ava ede ler nou pe, ler sa Mosyon finalman i al kot i devret ale pou pran desizyon.

Mr Speaker, donnek klima ekonomik lemonn e klima ekonomik Sesel ozordi, sa Mosyon i enportan. Dan en tel konzantir pou relans lekonomi pei.

Mr Speaker, i enportan ki ganny byen etablis ki group ki *DBS* i devret pe targete ozordi. Fodre pa ki *DBS* i vwar li i an direk konpetisyon avek Labank Komersyal donnek son manda ki li i annan.

Mr Speaker, eski sa group dimoun ki sipoze ganny targete. Zot pou kapab debout avek bann biznes ki'n fini etabli? Sinon en tel revizyon ki Mosyon pe demande i devret ganny fer.

Avek tou sa bann sok ekstteryer ozordi i kler ki okenn biznes pa pou neseserman demare dan en fason rapid parey ler sityasyon lemonn ti napa okenn problem mazer. Eski alor kriter ki ti ganny servi dan letan ki klima ti favorab ozordi i pa devret ganny revwar?

Kantite sonm ki kapab ganny donnek, lafason ki lentere i devret ganny kalkile.

Kantite letan ki repeyman i devret ganny pran. Prosedir pou akse sa bann kapital. Bann nouvo clause ki ti napa dan lepase ki reflekte realite ozordi, akoz nou bezwen konpran ki parey i annan serten Manm ki'n mansyonnen *DBS* ler ti formen i annan bokou letan pas, e ziska ozordi in annan bokou evolisyon.

E i kler ki nou bezwen get osi bann diferan clause dan sa bann Lagreman ki nou fer, ki labank i fer avek bann dimoun ki vin akse bann kredi. I annan en realite ozordi dan Sesel ki devret ganny byen note. E komans fer refleksyon lo la.

Si nou fer en analiz lo diferan biznes e propriete ki lo marse pou vann, lekel bann dimoun ki pe aste sa bann biznes? Konbyen Seselwa ki vwar zot annan abilite pou antre dan en tel loportinite? Mr Speaker, sa se akoz in toultan en problem pou serten group dimoun pa zanmen vwar li fasil pou akse avek kapital. Pou zot kapab al dan en tel konpetisyon. En revizyon dan fonksyon *DBS* alors i neseser e i merite. Mersi Mr Speaker.

(APPLAUSE)

MR SPEAKER

Meri Onorab. Mon ava redonn laparol Onorab William pou son konklizyon lo deba.

HON WAVEN WILLIAM

Mersi Mr Speaker. Mr Speaker o debi mon ti ava kontan remersi senserman tou bann Manm ki'n aport zot kontribisyon lo sa Mosyon.

Mr Speaker, i montre ki differan lide, differan fason panse e sizesyon in ganny anmennen pou anrisir deba lo sa Mosyon.

Mr Speaker, ki montre mon ki merit sa Mosyon in dekoul dan tou sa bann kontribisyon ki'n ganny fer par bann Manm. I evidan Mr Speaker ki ozordi lemonn e osi sityasyon Sessel lo en pwennvi sosyoekonomik, i totalman differan avek 44an pase.

E fas a bann sityasyon mondal an term lensertitud, bann pandemik e la nou pe koz osi lager, nou vwar ki i annan sa nesesite Mr Speaker ki size sa Mosyon i ganny trete avek bokou lenportans.

Par lefe ki sityasyon mondal, ekonomik ki annan en reperkisyon lo Sesel osi in sanze. E bann vye fason fer ozordi i bezwen ganny reevalye. Pou sitye nou dan sa konteks devlopman sosyoekonomik ki nou ladan.

Mr Speaker mon apresye ki i annan bann Manm lot kote latab ki aport serten bann pwennvi merit bann refleksyon ensi ki lot kote latab isi. Par egzanp Mr Speaker eski ozordi nou'n ganny dir poudir ti annan en Dekre ki'n ganny fer *so many years ago*.

Me eski ozordi sa dekre i ankor relevan? Eski ozordi *DBS* fas avek bann problem ki pei pe fer fas avek, an menm tan nou anvi kre bokou larises, ek bokou lanplwa.

Otomatikman i pou nesesit serten re evalyasyon. Serten revizyon ki sa letid letan i ganny fer i ava sorti avek bann rezulta ki pei ozordi direksyon i devret pe pran de nouvo.

Mr Speaker wi ozordi i annan bokou bann nouvo linisyativ ki bann zenn pe vin avek. E *IAC* lannen pase nou ti ganny sans zwen en group zenn. Me ozordi nou aprann i annan bokou sa bann nouvo lide ki pe sorti. E otomatikman Mr Speaker, pou zot kapab *take-off* i pou bezwen annan bann *stimulus* konsekan.

Konsekan Mr Speaker akoz rezulta ki, potansyel rezulta ki zot pou anmenn avek zot. I pou diversifye an menm tan anmenn plis larises dan pei.

Mr Speaker, me an menm tan mon'n koz osi lo koriz en pe

bann febles ouswa bann diferans an term par egzanp lo sa size lasirans Mr Speaker. Ou ganny en endividé pey en *loan over so many years.* I pey lasirans. Eski ozordi letan sa dimoun i a size i fer en kout kalkilasyon kantite larzan i pe peye par an. E dilon 30an ouswa 50an si i pe pey lasirans.

Me naryen pa arriv li ouswa avek son proze, me i zis e larzan ki in zis donnen. Me sa dimoun pa ganny naryen a lafen dizour. Me i kontinyelman re pey son *loan* byen. Eski pa in ler pou nou revwar sa. Pa in ler pou nou sey vvar ki fason ki sa dimoun, parey ozordi zot bann lezot lasirans lavi, ouswa lo kote *vehicle* zot donn pwen.

Me ki fason nou kapab rekompans sa dimoun ki'n pran en gro *loan* ki kapab ganny serten poursantaz sa larzan, pou li kapab re pey son *loan* pli vitman.

Mr Speaker, i annan en ta size la ki'n ganny leve. Me solman letan i tro kourt. E mon pa anvi prolong sa deba. Me solman letan i tro kourt e mon pa anvi prolong sa deba. Me senserman mon ti ava kontan ki nou kapab annan en kontinyasyon en deba ouswa sivre sa *case* Mr Speaker. Akoz i en Mosyon ki ase enportan ase

konsekan sirtou pou sekter prive.

Vreman si nou pe dir poudir sekter prive i moter lekonomi. Me nou pa kapab zis dir moter lekonomi san vreman kre sa lanvironnman konvenab pou li kapab fer sa ki i sipoze fer.

Mr Speaker, avek sa de mo, ankor enn fwa mon le remersi tou bann Manm. E lo kote *Chairman IAC* i annan serten keksoz ki mon pou fer swivi lo la.

E nou ava le konnen. Me ankor enn fwa mersi. E mon ava demann tou Manm pou vot an faver sa Mosyon. Mersi.

(APPLAUSE)

MR SPEAKER

Mersi Onorab. Mon ava apel bann Manm preznan pou vot lo Mosyon;

'Ki Lasanble i demann Gouvernman ansanm avek Labank Santral, pou fer en letid lo bann difikilte ki antreprenier i fer fas avek pou fasilit akse pou kredi kot Labank Developman Sesel'.

Manm ki an faver lev lanmen silvouple? Mersi. Okenn Manm ki'n vot kont?

Lo vot lo Mosyon ki mon fek lir, 30 Manm in vot pour, 0 kont e 0 abstansyon.

Donk mon annan gran
plezir pou dir ki sa Mosyon in
pase avek sipor inanim
Lasanble. Mersi. Felisitasyon.
Bon a se pwen nou ava *adjourn*.
Mon remersye bann Manm pou
zot kontribisyon ozordi. nou ava
repran Lasanble demen
bomaten 9er. Mersi.

(ADJOURNMENT)